

Mateo' pilla Diosa' mika ura kuinda

Jesúschi tinbu aa-apala
(Lucas 3.23-38)

1 ¹Jesucristo' tyui aa-apa millala, naa rei Davidnu bain, naa Abrahamnu bain sera' jimula entsalaa juntsa deeve:

²Abraham na deke' faawaañu, naa ya' kailla bain na deke' faawaañu, naa ya' pañala bain na deke' faawaañu, naa ya' tyuipañala bain na deke' faawaañu, kayu 14 bijee jingue na deke' faawaanshaa David faami. Entsalaa juntsa deeve:

Abrahamya Isaacchi ya' apa tiyamuwaami.
Tsenmala Isaac Jacobchi ya' apa tiyanmala,
Jacobyá Judáchi bain, naa kayu ya' vejan naatalalachi bain ya' apa tiyamuwaami.

³Judáya Tamarba, Faresnu bain, Zérahnu bain na miyandila.
Fares, Hesrónchi ya' apa tiyanmala,
Hesrónya Aramchi ya' apa tiyamuwaami.

⁴Aram, Aminadabchi ya' apa tiyanmala,
Aminadabya Nahasónchi ya' apa tiyamuwaami.
Tsenmala Nahasónya Salmónchi ya' apa tiyamuwaami.

⁵Salmón ya' shinbu Rahabba Booznu na miyandila.
Boozya ya' shinbu Rutba Obednu na miyandila.
Tsenmala Obedya Jeséchi ya' apa tiyamuwaami.

⁶Tsenmala Jeséya rei Davidchi ya' apa tiyamuwaami.

(Tsenmala Davidnu sera' jimu nala bain, paña defaaware'kera,
tyuipaña defaaware'kera kendu, 14 bijee jingue nakakare' jinshaa
Babiloniasha peesu dekaya' jinu tinbu jamuwaami.)

Tsenmala rei Davidya, Salomónchi ya' apa tiyamuwaami, Urías'
shinbu tiyamuba keñu na.

⁷Salomónya Roboamchi ya' apa tiyanmala,
Roboamya Abíaschi ya' apa tiyamuwaami.

Tsenmala Abíasya Asáchi ya' apa tiyamuwaami.

⁸ Asáya Josafatchi ya' apa tiyanmala,

Josafaty Joramchi ya' apa tiyamuwaami.

Tsenmala Joramya Ozíaschi ya' apa tiyamuwaami.

⁹ Ozíasya Jotamchi ya' apa tiyanmala,

Jotamya Acazchi ya' apa tiyamuwaami.

Tsenmala Acazya Ezequíaschi ya' apa tiyamuwaami.

¹⁰ Ezequíasya Manaséschi ya' apa tiyanmala,

Manasésya Amónchi ya' apa tiyamuwaami.

Tsenmala Amónya Josíaschi ya' apa tiyamuwaami.

¹¹ Josíasya naa Jeconíaschi bain, naa kayu vejan unbeena naatalalachi

bain ya' apa tiyamuwaami; Israel chachilla peesu kaya'

Babiloniasha detakanu tinbunu.

¹² Babiloniasha peesu dekaya' chudi' puitu, jungajte na dekakare'
paña mafaaware' jijiindu, 14 bijee jingue na mangakaanshaa Jesús
nakayami. Entsalaa juntsa deeve:

Jeconías, Salatielchi ya' apa tiyanmala,

Salatielya Zorobabelchi ya' apa tiyamuwaami.

¹³ Zorobabel, Abihudchi ya' apa tiyanmala,

Abihudya Eliaquimchi ya' apa tiyamuwaami.

Tsenmala Eliaquimya Azorchi ya' apa tiyamuwaami.

¹⁴ Azor, Sadocchi ya' apa tiyanmala,

Sadocya Aquimchi ya' apa tiyamuwaami.

Tsenmala Aquimya Eliudchi ya' apa tiyamuwaami.

¹⁵ Eliud, Eleazarchi ya' apa tiyanmala,

Eleazarsha Matánchi ya' apa tiyamuwaami.

Tsenmala Matánya Jacobchi ya' apa tiyamuwaami.

¹⁶ Tsenmala Jacobya, María' ruku tiyamu Joséchi ya' apa

tiyamuwaami. Tsenmala María, matyu Dioschi Mi'ke' Kayamu

tiitinu ruku Jesúschi ya' ama tiyamuwaami.

¹⁷ Entsaítaa Abrahamnu desera' ji' rei David nakayainshabi seratu, 14 bijee
maserala. Tsenmin Davidnu demasera' jimin Babiloniasha peesu dekaya'
takanu tinbu jinbera, kama 14 bijee maserala. Tsenmala Babiloniasha peesu
dekaya' takanu tinbu pulla' demasera' jimin, Dioschi Mi'ke' Kayamu janu
tinbubi jingue pensanguenmalaya, manen 14 bijee maserala.

Jesucristo' nakayanu malu

(Lucas 2.1-7)

¹⁸ Uwain Jesucristoya entsaitaa nakayave: María, Jesúschi ya' ama, Josénu
kayu palaa juwaami. Tsaaren kayu ya' rukuba bulu chui'mujchin na ma

puu katawami. Juntsa na pumiya Espíritu Santo tsanguikaañaa tsaimi.
19 Tsai' na ma puuñu, Joséya Dios naakesa tyañuba tsanguen chumu' mitya, Maríanu yujpewaandyai'tu, chachillanu na'baasa tsaa kuinda ki'mujchin dus ne mavelainu kemi^a ya' shinbu tinutsuminu. **20** Tsejtu umaa tsai' mavelanu pensangiñun, kipibi Bale Rukuchi ma anjee Josénu katawatu tsandimi: José, rei Davidnu sera! jimu ruku, Maríanu ñu' shinbu tirenu pensandyatyude; challa na puushu juntsa Espíritu Santochee tsai' navi' chuve. **21** Tsa' mitya María nakanu tsuve. Tsai' nakanmala juntsa nanu Jesús mumu pude, yaa ya' chachillanu livee kenu juñu' mitya. Tsanguenmalaa ya' chachilla ujcha delañu, juntsa kuipa' mitya livee kenu juve, timi.

22 Kumuinchi entsaa puimiya, Bale Ruku bene tsaa puinu tsuve ti', ya' mitya pamu rukunu naati pakaamuwañañu bain tsaa puitaa tsaimi: **23** *Naaju unbeelanuba tsa-i' kerajtu pannaren navi' kanu tsuve. Tsenmala juntsanu "Emanuel" momu punu detsuve.* Entsandishu juntsaa, "Dios laaba bulu chuve",^b titu. Tsa' mitya entsaa kuinda puitaa tsaimi.

24 Tsenñu José entsai kipi' dyatu, Maríanu ya' shinbu tiremi, Bale Ruku' anjee naati pañuba tsanguitu. **25** Tsejtu ya' shinbuba tsuindyumi, kayu nakaindyuya. Tsenñu José juntsa nanu Jesús momu pumi.

Pajlanu pasha aseetaju chumula Jesúsnu keejila.

2 **1** Rei Herodes chunu tinbunu, Judea tusha Belén pebulunu Jesús nakayami. Tsenñu pajlanu pasha chumu, makaratala keetadi' mijia mijaimu rukula, Jerusalén pebulusha jitu **2** tsandila: ¿Challan kayaimu judíola' rei naanain? Lala pajlainsha juntsa wainmu makara dekatatu, yanu balengure' teedinaa dejayu, tila.

3 Tsa' detiñu meetu rei Herodes nara tyai'mi, naa Jerusalénnu chumu chachilla bain naajulaba nara tyai'la. **4** Tsejtu Herodes, chachilla' mitya Diosnu kalen jimula' bale rukulanu bain millangue dewa'kare', naa Moisés' wandya lei mashturulanu bain dewa'kaake', nukaa Dioschi Mi'ke' Kayamu nakayanuu juñuba pake'meemi. **5** Tsenñu juntsa rukula pakatu: Judea tusha Belén pebulunaa nakayanu juve, tila, Diosa' mitya pamu ruku entsangue piike muwañañu' mitya:

6 *Judá tusha chumu, ñu Belén pebulu,
 vee mujtu aa pebulu chumulaba buute' pensangue' keeñu, ne balejtuu
 pebulu jutyuve;
 matyu ñu' junuren main bale chachi fale',
 kumuinchi in Israel chachillanu washkenu juñu' mitya, **c** ti' pillave, tila
 bale rukula.*

7 Tsenñu Herodes juntsa aseetaju rukulanu dus demika' pake'meetu, naamaa ura juntsa makara faañuba mijami. **8** Tsejtu bene yalanu Belénsha

a **1.19** mavelainu kemi titu, jumaa tinbunu judíolachiya, naa yala chunu palaa deke' chaiba bulu dechutyuñu bain, yala mavelanu tyee kenu dej'u'ba tsanguen uuya juwaala.

b **1.23** Isaías 7.14; 8.8, 10

eendo tsandimi: Ji' ura' depake'mera', juntsa kaananu kata' maja' inuba kuinda kikai, i bain ji' balengure' teedinu, timi.

⁹Rei tsandiñu umaa aseetaju rukula jila. Tsenñu yalanu fale' katawamu makara yala' ajkesha puu miya' jinduren, nunbanu kaana chuñuba juntsa deechu jiimiren dyaimi. ¹⁰Tsenñu aseetaju rukula, makara tsai' dyañu katatu mika sundyala. ¹¹Tsejtu ya juusha devitu, nanu katala ya' ama Maríaba. Tsejtu tsana kata' balengure' deteeditu, yala' babuu dejuuke', uru bain, aindyu chi pillu bain, naa bulutala munguentsumi mira pindyu bain me'la.

¹²Tsaaren juntsa aseetaju rukula, Herodes¹ chuinchaya manbuityudei, tiñu dekipitu, vee mujtu miñushaa miila yala' yasha miindu.

Egiptosha nepiya' jila.

¹³Aseetaju rukula yala' yasha demiiñu, Bale Rukuchi ma anjee Josénu kipibi tsandimi: Nanu ya' amaba ka' Egiptosha nepimishtide, tsejtu i mawandindyuya junga tsanade, matyu Herodes entsa nanu mi'ke' tu'nu kenuuñu' mitya, timi.

¹⁴Anjee tsandiñu, José kujtu, nanu bain, ya' amanu bain ka' tsaa keperen Egiptosha nepimishtikemi. ¹⁵Tsejtu junga ji' chudi' tsanala Herodes peyangama. Entsa puimiya, Bale Ruku bene tsaa puinu tsuve ti', ya' mitya pamu rukunu naati pakaamuwaañu bain tsaa puitaa tsaimi: *In na Egiptobi pu mamikayu,*^d timuñu' mitya.

Herodes unbeena kaillanu detu'nu uudenguemi.

¹⁶Juntsa aseetaju rukula kuinda demantyuñu' mitya, yaichi anbutikayaiyu tyatu, Herodes daran ajaatyami. Tsejtu kumuinchii unbeena kailla pai añu pullajtulanuya detu'kaakenu mandangue', Belénnu chumu kaa kaillanu bain, naa juntsa keesha kaa pebulutala chumu kaa kaillanu bain detu'kaakemi, juntsa aseetaju rukula tsantsa avenju juunu juve detiñu, juntsaalananu tene. ¹⁷Tsaaren entsaa puimiya, Diosa' mitya pamu ruku Jeremías entsandimuwañañu, tsaa puitaa tsaimi:

¹⁸*Ramásha main u'tandi' llakinbeyai' vishkiindintsu meejave.*

Juntsa tsandintsumiya Raquelya ya' nala' mitya tsandintsuve.

Yumaa ya' nala depeya' tsudenañañu, waredyai'taa tsandintsuve,^e timuwañañu' mitya.

José, Maríaba Nazaretsha miila.

¹⁹Bene Herodes peyañañu, Bale Rukuchi ma anjee Egiptosha Josénu kipibi katawatu tsandimi: ²⁰Nanu tu'nu tyamula yumaa depeya deiñu' mitya, nanu ya' amaba manga' Israel tusha mamiya' miide, timi.

²¹Tsandiñu José, nanu ya' amaba manga' Israel tusha miya' miimi.
²²Tsaaren Arquelaoya ya' apa Herodes' mitya Judeanu uñi manchuñu mijatu, José junga miinu jeetyami. Tsejtu kipibi Dioschi mijakaratu Galilea tushaa miimi. ²³Tsejtu junga Galileasha mavijitu, Nazaret pebulubi chumi. Junu chuimiya kaspee tinbunu Diosa' mitya pamu rukula, Jesús Nazaretsha chumu tikayanan tsuve timuwa deeñu, tsaa puitaa tsaimi.

Juan Mungaamu

Diosa' palaa mijakaami.

(Marcos 1.1-8; Lucas 3.1-9, 15-17; Juan 1.19-28)

3 ¹Juntsa malutala Juan Mungaamu Judeasha tiba den chutyuin tenasha katawa' Diosa' kuinda ke' ule' nepas nendu ²tsa tsandimi: Diosnu rei juu tananu malu kalen jave. Tsa' mitya veta' pensa demangue' Diosnu meenguidei, tiitimi.

³Juannu laapu' pataa Diosa' mitya pamu ruku Isaías entsangue piikemuwaami:

Tiba den chutyuin tenasha main entsandintsuve:

Bale Ruku' janu miñu sekuwangue' tsuudei,

ñulla' tenbukasha ya' miñu ura' mantse'kaadei, tintsuve,^f timuwaami.

⁴Juanya kameyu juchi keñu jallee panami, ya' ajpelenuya kika ajpeendee chuwaa telami, tsenmala ya' finu pandaya dendu-ishu jeendaa mishkibaa juwaami. ⁵Tsenñu Jerusalénsha chulla bain, naa Judea tusha chulla bain, naa Jordán pi keetala chumula bain Juannu meenanu jijiila. ⁶Tsai' yala' ujcha' mitya veta' pensa demanguenmalaya, Juan yalanu, Jordán pisha mungaakaakemi.

⁷Tsanguentsu naa fariseola bain, naa saduceo chachilla bain mungaakutinu pure' jjideiñu Juan katatu tsandimi: Ñulla piñi juuñuu anbutimu chachillanuba, ñmaa ñulla Dioschi taaju i' puinu kaledenashuba, engu jataa livee inu juve tiñaa dejayu? ⁸Veta' pensa mangue', veelachiba uwain entsala Bale Ruku' miñusha demaañuve tenna keewaadei, ⁹ne ñui tene, "Lalaya Abrahamnu sera' jamu deeyu" tyá!, daj pensaa keewatyudei. Matyu uwaindiyu Diosren tsanguendyatuya, naa entsa shupukanu bain Abrahamnu sera' jimu chachi juula bain tirenuu juve. Tsa' mitya tsandyatyudei. ¹⁰Chi tuumu jacha, telelebi ma tulekemu jacha yumaa tyayaa ma tsunave. Tsaju' naaju chi bain ura' puka ityuya dedala' ñinbaasha keviimu deeve. ¹¹Uwain iyaa, ñullanu veta' pensa mangue' Diosnu meenguidei, titu, pichi ne mungaakentsuyu, tsaaren bene in benesha jamuya ñullanu Espíritu Santochi bain, tsenmin ñichi bain mamungaakenu tsuve. Yaa inu pulla pudeve; tsaañu' mitya iya tiba juñu' jutyunchin naa ya' sandalia juuba taji' ne kuwa kenuba jutyuyu. ¹²Juntsa jamu rukuya trigu wa'kare' te'kamu jun tsaa ju!, trigu ñi ya' chiba devela' kalaanu, tyami puja'tee pala ya'

tyaapasha tanave. Tsangue' devela' kalaamiya trigu tsurensha uukare', ya' kuyaa naa-uwanuba manbetyu ñinbaasha kepu' ikakaanu tsuve, ti' laapu' pamí Juan.

Jesús mungarami.
(*Marcos 1.9-11; Lucas 3.21-22*)

¹³Jesús Galileasha puturen, Jordán pisha jimi Juan' junga, tsai' yachi mungaranu. ¹⁴Tsenñu Juan umanbeleya tsanguindyai'tu: Iyaa ñuchi mungaranuu juñuba, ñaa inchi mungaranu jatu iyu, timi. ¹⁵Tsenñu Jesúts sandimi: Tsaaren Dios tsaa mutyañu' mitya, challaya tsanguenuu juve, timi. Tsandiñu Juan Jesúsnu mungaami. ¹⁶Tsenñu Jesúts mungaratu pisha pu' maluinmalan, selu juruke tse'ke' Diosa' Espíritu ya' mishkai'tala paluma pajan tsaintsu' katawami. ¹⁷Tsenmalan selusha main entsandiñu meejami: Entsa in estyanu Nave. Ya' mitya yuj sundenve, tiñu meejami.

Dyabulu, Jesúsnu ujcha lawaanu kemi.
(*Marcos 1.12-13; Lucas 4.1-13*)

4 ¹Jesúsnu Dyabulu ujcha lawaanu ke'keesaa tyatu, Espíritu Santo bene Jesúsnu tiba den chutyuin tenasha miya' jimi. ²Tsenñu Jesúts 40 malu, 40 kepe panda fajtu puitu, umaa panda mutyami. ³Tsenñu Dyabulu ujcha lawaanu tya' mitya kalen jitu tsandimi: Ñu uwain Diosa' Natuya, entsa shupukanu pan tiyade tide, timi.

⁴Tsandiñu Jesúts pakatu tsandimi: Diosa' Kiikanu entsa pillave: *Chachilla panda findun chunanu dejutyuve, naa Diosa' pañu ya' fi'pakisha faamu palaachi bain chunuu dejuve,*^g tive, timi.

⁵Tsenñu Dyabulu, Jesúsnu Dioschin juu jumu pebulu Jerusalénshaa bene miya' jimi. Tsejtu aa elesha mishbui'sha kayu katyu tenabi miya' lu-i' uiakaatu, ⁶tsandimi: Ñu uwain Diosa' Natuya tusha yanbude, matyu Diosa' Kiikanuya entsandive: *Dios ya' anjeelanu ñunu washkekaanu eenu tsuve, tsenmala ñunu arjeela yallachi jiñu detsuve, ñu' neepa tusha tyuika' shupukachi tapan jutyu,*^h ti' pillave, timi.

⁷Tsandiñu Jesúts bain tsandimi: Diosa' Kiikanu entsa bain tsandive: *Ñu' Bale Ruku Diosnuya ti ken tsangue tirenu kityude,*ⁱ ti' pillave, timi.

⁸Tsejtu pulla'bí Dyabulu Jesúsnu aa kuyisha miya' luitu, tu kuraa, tsenmin naa tiba uukeraa jumu dekeewaaatu, ⁹tsandimi: Kumuinchi entsa keewarekeeshu juntsa ñunu dekuwanuu tsuyu, ñu in ajuusha teledi!, inu aawa kureshu juntsaa, timi.

¹⁰Tsenñu Jesúts tsandimi: *¡Manbaka' mijiide, Satanás!* matyu Diosa' Kiikanu tsandive: *Ñu' Bale Ruku Diosnuren aawa kure' keewaake', yachiren tiba kiikemu juude,*^j ti' pillave, timi.

¹¹Tsenñu Dyabulu manbaka' miiñu, mantsa anjee dejí! Jesúsnu washkentsula.

g 4.4 Deuteronomio 8.3 h 4.6 Salmo 91.11-12 i 4.7 Deuteronomio 6.16

j 4.10 Deuteronomio 6.13

Jesús Galileasha mijakares nenu peepumi.

(*Marcos 1.14-15; Lucas 4.14-15*)

¹² Juannu peesu depuñu kuinda mijatu, Jesús Galilea tusha miimi.

¹³ Tsejturen Nazaretnu chui'mujchi Cafarnaúmsha, aa pusu keebi chumu kaa pebulunaa chuimi, naa Zabulónnu sera' jimu paandela bain, naa Neftalínu sera' jimu paandela bain chunu tusha. ¹⁴ Tsaaaren entsaa puimiya, Diosa' mitya pamu Isaías entsainu tsuve ti' pamuwañañu tsaa puitaa tsaimi:

¹⁵ *Zabulón tu, Neftalí tu bain,*

Jordán pi bejkusha, pajvinu pasha jumu tu,

matyu lamaa pi keesha jumu tu,

ñu, Galilea, judío chachi jutyula' chunu tu:

¹⁶ *Dishkejtsa chunañunamu chachillaren*

umaa ñillu kataakiñu dekive.

Matyu jelekenu uu jeetyannainsha chunañunamula' jungaba

ma ñillu dandakeñunguive,^k timuwañañu.

¹⁷ Jesús juntsai' Cafarnaúmsha ji' chutu: Diosnu rei juu tananu malu kalenave; veta' pensa demangue' Diosnu meenguidei, ti' kuinda mijakares neneimi.

Jesús ainguemu rukulanu taapallu mikami.

(*Marcos 1.16-20; Lucas 5.1-11*)

¹⁸ Jesús Galilea aa pusu pi keetala nendu pai naatala katami, mainya Simón, tsandityu'ba, Pedro tinu ruku; tsenmala kamainya Andrés mumu. Yala ainguemu de' mitya, ataaya pisha tya'kikendetsu katami. ¹⁹ Tsejtu Jesús tsandimi: In bendala jadei, tsenmala iya ñullanu, chachillanaa alla kan tsanguemu ruku detirenu tsuyu, timi. ²⁰ Tsandinmalan yala' ataaya junu deshuike', ya' disipulu tiyanu ya' bendaa jila.

²¹ Tsejtu kayu ajkesha jindu kama pai naatala, matyu Zebedeo' nalanu bain katami: Santiagonu bain, Juannu bain. Tsenñu yala ya' apaba kaa baakusha waaku ura' kikendetsuren, Jesús yalanu mikañu, ²²yala' apanu bain, naa yala' kaa baaku bain deshuike', ya' bendala jei jila ya' disipulu tiyanu.

Jesús mijakare' dilulanu ura' mandiremi.

(*Lucas 6.17-19*)

²³ Jesús chachi waku wakudinu yatala mijakare' pas nendu kumuinchí Galilea deneintsumi, Diosnu rei juu tananu mika ura kuinda mijakares nendu. Tsejtu ti diipeya juu tadeeñu bain, naa ti kiyanchi dilu deeñu bain ura' mandires neneintsumi. ²⁴ Tsenñu kumuinchí Siria tusha, Jesús naakes nentsuñuba kuinda demijatu, matyu ne tichi diluju' llakinguen dechu'ba, junu detajinu, naa ne diipeyachi juu, ne kiyanchi juu, naa

dyabulu puu chumulanu bain, naa des-iimulanu bain, naa dedeelaaj
chumulanu bain taji tajideiñu, Jesús ura' mandire' me-ee-eekemi.

²⁵Tsenñu Galileasha chumula bain, Decápolissha chumula bain, naa
Jerusalénsha chumula bain, naa Judeasha chumula bain, naa Jordán pi
pajlanu pasha chumula bain, pure' chachi Jesúsnu sure neneintsula.

Naajulaa sunden chunuu dejuñu bain
(Lucas 6.20-26)

5 ¹Chachilla pure' judeeñu katatu Jesús butyusha lu' chudimi. Tsenñu
junu lu' chuñu ya' disipulula ya' keesha dewa'dijiñu, ²chachillanu
entsandi pa' mijakaami:

³ Naajulaa pensasha maaliya tibanguenu jutyuyu tenna ju',
uwain Diosnu meneste juyu tyamulaya,
Dioschi ura' imu deeve,
Dios yala' rei juñu' mytya.

⁴ Naajulaa llakinguen dechu' bain,
Dioschi ura' imu deeve,
Dios yalanu masundyawaanu juñu' mytya.

⁵ Naajulaa maali yala' pensasha tiba daj pensajtu dechu'ba
Dioschi ura' imu deeve,
yalaa entsa tu kanu deju' mytya.

⁶ Naajulaa Dios naakesa tyañuba tsanguen chunu tyanchin
tsanguenu ajchundyan chumulaya,
Dioschi ura' imu deeve,
yala naakenu tyañuba Dios tsanguikaanu juñu' mytya.

⁷ Naajula bain munuba tenbityamulaya
Dioschi ura' imu deeve,
Dios bain yalanu tenbitya' keenu juñu' mytya.

⁸ Naajulaa ti ujchaba jetyu Dioschin juu dechu'ba
Dioschi ura' imu deeve,
yalaa Diosnu katanu deju' mytya.

⁹ Naajulaa naa ti peletu falekenu kiñu bain tsaa faakaanu kityulaya
Dioschi ura' imu deeve,
Dios yalanu ya' na detirenu juñu' mytya.

¹⁰ Naajulaa Dios naakesa tyañuba tsangues nendetsu bendaaj ke' tituba
dekiñu,
taaju pulla pulla de-i'ba
Dioschi ura' imu deeyu tyanu dejuve,
Dios yala' rei juñu' mytya.

¹¹ Nulla in mytyan chachillachi tituba dekura', tituba de-i', na'baasa
anbukuinda in dechumiya, Dioschi ura' imu deeyu tyanu dejuve. ¹²Mika
sundya' ura' judei, selusha tsamantsa balen juu kanu deju' mytya; naa

kaspele ñnulla jutyunu tinbunu bain Diosa' myta pamu rukulanu tsangue firu' ken chumuwa deeve, timi.

Keranguemula tyayu bain, ñillu bain juuñuu
(Marcos 9.50; Lucas 14.34-35)

¹³Nulla keranguen chumu chachillaya entsa tusha chumu chachillachi tyayu juuñuu deeve. Tsaaren tyayu pijtu tiyashu juntsaa, ¿naa keñaa pi' mandiyanuu jun? Tsejtu naa tichiba balejtu tiyaiñu miñusha dekepunmala naaju chachillaba demenaa tere' nenu tyayu ne tiyainu juve. ¹⁴Nullaa veelachiya ñillu juuñuu deeve. Ma pebulu aa kuyisha ma chunamuya naa-i' pantsudin tsaave. ¹⁵Tsenmin ne ñillu chakare' bain piyama panbeesha dishu' chujtinu chakaratyuve, matyu katyunandala chujtyaimuve, tsenmalaa kumuinchii yasha chullanu dannutsu. ¹⁶Tsa' myta ñnulla, ti kike' bain vee chachillachiya ñillu juuñuu danjurui nenu kidei, tsenmalaa ñnulla ti bain ura' dekiñu katatu, yai bain selusha chumu ñnulla' Apanu urave tya' balengure' panudetsu.

Jesús, Moisés' wandya lei naajuñuba mijakaami.

¹⁷Iya Moisés' wandya lei manbirenu jave tyatyudei, naa kaspee tinbunu Diosa' myta pamu rukula' mijakaranu bain manbashwaanu jaindyuyu; matyu iya juntsa leinu naatiñuba tsanguenaa jayu. ¹⁸Uwaindiyu selu bain, tu bain de-i' piyaindyuya, naa kaa atyutyuu letaraba mamushan jutyuve, lei bale pilla palaa naa-i' puinuu juuñuba tsaa depullaindyuya. ¹⁹Tsa' myta mun naamika kaa lei juuñu bain, Moisés' wandya leinu mainnu meedityushu juntsaa, tsenmin veelanu bain meedimijakaatyushu juntsaa, Dios ya' rei juinsha ji' bain, jui'ñuba ne uraa chachi junu tsuve. Tsaaren mun meengue' naakenuu juuñuba veelanu bain tsangue mijakaashu juntsaya, Dios ya' rei juinsha mika aawa' keranu tsuve. ²⁰Uwaindiyu, Dios naakesa tyañuba ñnulla tsanguen chu', naa Moisés' wandya lei mashturulanu bain, naa fariseolanu bain kayu pullake tsanguen chui'shu juntsaya, Diosnu ñnulla' rei juu tananu dejutyuve, timi.

Ajaatya' kenutala Jesús wainmi.
(Lucas 12.57-59)

²¹Nulla' tinbu chachillanu entsandimuwa deeñu ñnulla mideeve: *Chachiítala tu'tyude'* mun tute' bain kavitu i' kuipa vinu dejuve, tiñu mideeve. ²²Naa tsaa mideeñu bain, ñullanu entsandinu tenve: mun ñnulla naatalaatalan kundaa detiyashu juntsaa, tsaren kavitu i' kuipa vinu detsuve. Tsenmala mun kentsure' pamuya kayu aa bale rukulachi kavitu inu tsuve, tsenmin mun tituba pa' na'baasa dekurekishu juntsaa, ñi jelekenu kensha keviinuu chachi tiyanu tsuve.

²³Tsa' myta aa eleshasha ufeenda tsure' ju'kenunu ñu ufeenda kunu ta'tu, ñuchi naatala jumun main ñuba kundarave tya' mandengamiya, ²⁴ufeenda

ju'kenu keesha ñu' ufeenda tsurekiken miji', ñuchi naatalaren ñunu kundaa tyamuba ajke' ura' manba' mantse'kaade. Tsanguitaa ufeenda tsure' ju'kenusha miji' ñu' ufeenda keewaanu juve. ²⁵Tsenmala mun ñunu kavitu kenu tyaiñuba, kayu kavitu kemu bale ruku' ajuusha tajindyuren, apain yaba ura' pa' mantse'kaade; tsanguityunmalaya ñunu bale ruku' tyaapanu kuwanmala, entsa bain chaita rukula' tyaapanu kuwanmala ñunu peesu punu detsuve. ²⁶Uwaindiyu ñu tsanguityu' peesu vimiya, ñunu lushi naake depa'ñuba juntsa millangue kuwai'mujchiya malun jutyuve, timi.

Vee matsainutala Jesús laapu' pamí.

²⁷ *Vee matsaityude, m ti' pamuwa deeñuba ñulla mera' kera deeve.*
²⁸ Tsaanuren iyaa ñullanu entsandinu tsuyu: Mun vee shinbulanu mujkera ke' bain ya' pensashaya yumaa vee matsaive.

²⁹ Tsa' myta ñu' urandyä kapuka' mytyaa ujcha lalaishu juntsaa, kala' kepude; tsanguishu juntsaa ñu' bulunu juntsaren kevi-i', kumuinchi ñu' buluya tsaa ñi jelekenu kensha dekeviin jutyuve. ³⁰ Tsenmin ñu' urandyäapa' mytyaa ujcha lalaishu juntsaa, juntsa bain daaka' kepude; tsanguishu juntsaa, ñu' bulunu juntsaren kevi-i', kumuinchi ñu' buluya tsaa ñi jelekenu kensha dekeviin jutyuve.

Mavelanutala Jesús laapu' pamí.

(Mateo 19.9; Marcos 10.1-12; Lucas 16.18)

³¹ Tsenmin kaspelen tsandimu deeve: Mun lu'tsa' shinbunu mavelashu juntsaa, mavelayu ti' keengaya kiika main tsangue piike' kuwanu juve,ⁿ timu deeve. ³² Naa tsaañu bain, iyaa entsandinu tenve: Ma ruku ya' shinbunu, ne vee matsaiba indyuren mavelashu juntsaa, vee matsaisa tya' mavelaiñuu juuve. Tsenmala mun mavelamu shinbuba manchu' bain vee matsaimu chachi tiyaa juuve.

Diosa' myta uwain tsanguenbera kentsuyu ti' panutala

³³ Tsenmin kaspee tinbunuren yumaa rukulanu entsandimu deeve: Diosa' myta uwain tsanguenbera kenu timiya, tsanguenbera kenuu juve,^o timu deeve. ³⁴ Tsaanuren iyaa ñullanu tsandinu tenve: uwain tsanguenbera kentsuyu tityudei, tsandityunchi ma juudei. Tsaj! naa-awanuba kai'sha selusha depaka' uwain tsanguenbera kentsuyu ti' patyudei; seluya Diosa' bale chunu chunbullave. ³⁵ Tsenmin tunu bain paka', uwain tsanguenbera kentsuyu, tityudei. Juntsaya Diosa' neepa teetanainshave. Naa Jerusalénnu bain paka' uwain tsanguenbera kentsuyu tityudei. Juntsa pebuluya aa bale Rei' chunu pebuluve. ³⁶ Naa ñulla' mishpuhanu bain paka', uwain tsanguenbera

kentsuyu, tityudei, ñullaya naake' naa ma achuwa juuñuba ne pababake, ne fibabake tirekenuuba dejutyu' mitya. ³⁷Matyu ñu naati pañuba, juntsaa jusa: Tsanguenu, timiya, tsanguide, tsenmin: Tsanguen jutyu, timiya, tsanguityude. Tsaju' tyeeba puite' pashu juntsaa, Dyabulaa tsandikaanu tsuve, timi.

Vejmi' firu' mantyudei.
(Lucas 6.29-30)

³⁸Nulla kaspee tinbunu entsandindetsu meemuwa deeve: *Ne kapukanu daran ke' musha dekiñu bain, naa tejkutala daran ke' musha dekiñu bain, ñui bain juntsangue mannuu dejuve,*^p timu deeve. ³⁹Tsaaren iyaa ñullanu tsandinu tenve: firu' dekiñu vejmi' mantyudei; tsanguityu' ne mun urandyu mashpelenu kidekiñu bain, masku pasha bain kikutide. ⁴⁰Tsenmin mulaa kavitu ke' ñu' pannu jali chi'kenu padetiñu bain, ne tsaikuti', naa ñu' avindaa pumu jali bain paviiki'l mujchi ne kuwakide. ⁴¹Tsenmin ñunu mulaa uudengue' buli 1.000 saka bare' ta'nú dejikaañu bain, 2.000 saka bare' jingue take' kuwade. ⁴²Mun ñunu tyeeba pakikeñu bain kuwade. Tsenmin ñunu tyeeba mangunu ti' pakikeñu bain, kuwandyatuu jutyude.

Kundaalanu estyadei.
(Lucas 6.27-28, 32-36)

⁴³Naa entsa bain ñulla mera' kera deeve: *Ñuba kalen chumu chachinu estyade,*^q tsejturen ñu' kundaa chachinuya tyutyade, tiñu mera' kera deeve. ⁴⁴Tsaañu bain iyaa ñullanu entsandinu tenve: ñulla' kundaalanu estyadei, naa ñullanu firu' kenu bendaan nemula' mitya bain Diosba kuinda kiikidei. ⁴⁵Tsanguen dechumiya, selusha chumu Apachi ñulla uwain ya' nala deju'ba tsangue keewaanu dejuve, matyu yaa naa ura chachilla Dios naakesa tyañuba tsanguen chumulachi bain, naa firu' chachilla Dios naakesa tyañuba tsanguen chutulyulachi bain pajta faawaamuve, tsenmin naa shuwa bain tsaren jakaamuve. ⁴⁶Tsejtu ñullanu estyamulanun ñui bain estyaishu juntsaa, ¿tyee juntsan mitya kachu deeyu tenguen? Naa deechu' mitya lushi kamu rukula bain juntsaaya kemu deeve. ⁴⁷Tsa' mitya lu'tsa' keranu chachiitalan ura' kuinda juu nedeishu juntsaa, ¿tyee veela tsangiñu juu dekiyu tenguen? Naa Diosnu keranguityu chachilla bain juntsaaya kemu deeve. ⁴⁸Tsa' mitya ñulla' Apa kai'sha chumu naajunga, tiba deechu' kemu ju', ura' ruku jushu, ñui bain juntsaadei.

Jesús ura' kenutala mijakaami.

6 ¹Nulla tyee uraa ke' bain, ne veelachi tsai katawachi tenñu tsanguen chutulyudei. Nulla tsanguen dechunmalaya ñulla' Apa kai'sha chumu tiba

uraa kuwa' sunbewaan jutyuve. ²Tsa' mitya tiba meneste juu chachillanu tyee uraa kike' bain, tsa jutyuren tsaañungue keewaamu chachilla tsaaya, veela demijatu yala' mitya ura' depasa tyanchiren, chachi waku wakudinsha wandis ne'kerake, naa pebulu miñutala wandis ne'kerakemu deeshu, ñui bain ne juntsangue' munuba mijakares nenu kityudei. Uwaindiyu naajulan tsangue' bain yalaya juntsan mitya kakenuu juñu bain yumaa kakeñungueno dejuve. ³Tsa' mitya tiba meneste juu chachillanu ñu tyee uraa ke'ba munuba waintyude, naa kayu ñuchi ura' keranu chachinuba waintyude. ⁴Matyu dus ne tsangue' pullaide. Tsenmala ñu' Apa, naa ñu dus tsangiñuba keena' mitya, yaa ñunu juntsan mitya tyeeba uraa kunu tsuve.

Diosba kuinda kenu mijakara
(Lucas 11.1-12)

⁵Nulla Diosba kuinda kemiya tsa jutyuren tsaañungue keewaamu chachilla tsaa jutyudei. Yalaya chachi waku wakudinu yatala uidi' Diosba kuinda kikena' bain, naa miñu mututala veela dekatasu tya' uidi' Diosba kuinda kikena' bain tsangueno ajchu deeve. Uwaindiyu ne tsangues nedeishu juntsaa, bene tyee uraa kanu dejub'a yumaa kakiñu dekive. ⁶Tsaaren ñuya, naa-uwanu Diosba kuinda kenu tenñu bain, ñu' sukusha vi' llukike! ñu' Apaba dus kuinda kide. Tsenmala ñu' Apa ñu dus tsanguentsu keena' mitya, bene tyeeba uraa kuwanu tsuve. ⁷Tsenmin ñullaya Diosba kuinda kendu bain, Diosnu keranguitu chachilla tsaaya, junun papatinmalaa Dios kayu ura' meenu juve tyatu, pa' puinu palaanun manba manbatimu deesu, ñui bain tsarendinu kityudei. ⁸Tsaju' ñullaya yala naadejuñu bain tsa jutyudei, matyu ñulla' Apa kai'sha chumuya ñulla kayu pakindetyun, titi meneste deeñuba yumaa mive. ⁹Tsa' mitya ñullaya entsandi pa' Diosba kuinda kidei:

Lala' Apa,
selusha kai'sha chumu,
ñuren main juu,
tsamantsa aawa Dios juñuba,
muba demija' tsaa dekeewaasa.

¹⁰Ñu' chachillachi rei tiyade.

Selusha ñu naajusa tya' tsangiñu bain,
entsa tusha bain tsaren jusa.

¹¹Uma bain lala' fintsumu keeware' jintsuka.

¹²Lala' ujcha' mitya manbitsaaka,
tsenmin laa bain naake lalanu firu' kemulanu
veta' veta' ura' mandimu deeñu bain tsanguide.

¹³Lala ujcha lainuu juubillaya tsangaatyuka;
tsangaatyu', urajtutala livee kika, tidei, timi.

¹⁴Tsandi' dyatu, Jesús tsandimi: Ñullanu firu' kemulanu, ñulla juntsan mitya ti kuipaba faawaan jutyu til' ñulla yaiba ura' demandinmalaya, kai'sha chumu

ñnulla' Apa bain tsarengue' ñnullanu ujcha' myita manbitsaanu tsuve. ¹⁵Tsaaren ñnullanu firu' kemulanu juntsan myita kuipa faawaren jutyuyu ti'shu juntsaa, ñnulla' Apa bain ñnulla' ujcha jumula' myita ñnullanu manbitsaan jutyuve.

Diosnu pensangue' panda fi'nutala

¹⁶Nullaya Diosnu pensangue' panda fityumiya tsa jutyuren tsaañungue keewaamu chachilla tsaaya, Diosnu pensangue' panda findetyuve tyakaanu, llaki kajuru' la-i' chudimu deesu, ñnullaa tsainu kityudei. Uwaindiyu mun tsangue' bain yalaya juntsan myita tyee uraa kanu deju'ba yumaa kakeñungueno detsuve. ¹⁷Tsa' myita ñuya naa-uwanu Diosnu pensangue' panda fityu ju' bain kajuru pitsale', achuwa bain kikade, ¹⁸tsenmalaa mu bain ñu Diosnu pensangue' panda findyuñuba mijai'nudetsu. Matyu ñu' Aparen mijainu tsuve yaa ñunu dus keena' myita, tsejtu juntsan myita ñunu ñu' Apa tyeeba uraa kunu tsuve.

Selushaa tiba detadinu

(Lucas 12.33-34)

¹⁹Entsa tusha tiba pure' tadi' uukaanu kityudei, enguya naa buuma defi' mushkikena' bain, naa mantsa depiyaina' bain, naa taamulachi detaraina' bain tsainshave. ²⁰Tsanguityu' selu kai'shaa tiba detadi' uukaanu kidei; jungaa naa buumaba mushkityu, naa tiba piyatyu, tsenmin naa taamula bain putyu' taangui'nushave. ²¹Matyu ñu nunbanaa ñuchi tiba balen juu jumula detsure' tana'ba, ñu' pensa bain junbiren chi'kare' tananu tsuve.

Kapuka lala' buluchi ñillu juuñuu

(Lucas 11.33-36)

²²Kapukaa buluchi lanpara juuñuuve; tsa' myita ñu' kapuka urashu juntsaa, tiba ura tene ñu kenu tsuve. ²³Tsaaren ñu' kapuka urajtushu juntsaa,^r ñuchi yapijurunañuu juunu tsuve. Tsa' myita ñillu juuñuu dannamu kapukan ma yapijurunashu juntsaa, jura tiba dannatyuinshaanaa naaju yapijuruchunga!

Diosnu estyamin, lusinu estyamin inu jutyu.

(Lucas 16.13)

²⁴Mu bain, yanu uudenguemu ruku pallu miyashu juntsaa, juntsa pallulachi paree taawasha ken jutyuve; matyu mainchiya taawasha ura' ke' bain, kamainchiya ura' ken jutyuve; tsa jutyu'ba mainnuya estya' bain, kamainnuya nejuu junu juve. Tsa' myita Dioschi tiba kiikemu chachi juturen, lusinu bain mutya', tiba detadinu kiikenu jun jutyuve.

^r 6.23 Kapuka urajtuve tishu juntsaa judíolachiya tiba kuwandyatyu esmu chachi titundive. Tsa jutyu'ba, Diosnun kerajtu ju' tinu'baasa mutya'keraa ne juuve titundive. Ti bain aa tadinu tene pensa juutu, Diosnu manbashaju, tsa jutyu'ba maali tiba ura' ke' nechi tene tyaimuve ti' aseetanguikarataa Mateo 6.21, 24-34bi tsa pillave.

Dios ya' chachillanu washkemuve.
(Lucas 12.22-34)

²⁵Tsa' mitya iya ñullanu tsandinu tenve: Umaa tyee finuj deewa, tyee kujchinuj deewa, tsenmin ti jallee pannuj deewa tya' pensanguen chutyudei. Tsejtu lala chu' jintsuñaa, ¿fintsuminu kayu pulla balejtuu?, tsenmin ¿lala' bulaa naa pannu jalinuba kayu pulla balejtuu? ²⁶Jekachi nemu pishkulanan keekidei. Yalaa ti vijpalaba miyajdetuve, naa ti pukaba te'katyu deeve, tsenmin yalaya depuulanmala deka' uukaansha bain tsuutyu deeve, tsaanun yalanuya selusha chumu ñulla! Apaa panda fikaamuve. Tsejtu ¿ñullaa kayu pishkulana bolla balejtetu? ²⁷Tsaaren naajula bain pure' pensanguike'ba ¿naa ketaa juntsa uranu peyanuu ju' bain, jayu yapa machunuu tiyanu juyu? ²⁸Tsaaba, ¿nejtaa ñullanu jalinaa yuj teja teja-in? Jeendala llullu chumula naa-i awamu deeñuba keekidei. Yalaa taawasha kityu deju', naa jali bain tsejte' pantyu deeve. ²⁹Tsa deeñuba bain, uwaindiyu naa rei Salomón bain tsamantsa uukeraa jalin panaken chumuwa ju'ba, llullu naaju uukeraawa deeñuba tsangue pantyuwaave. ³⁰Tsaju' juntsa ishtapeya jeenbaasha chu', bene ne ikakaraimu juñuren Dios juntsangue pandemushu juntsaa, ¿kayu ñulla chachillanaa uukerake pandei'chunga?, ñulla ura' keranguityu chachilla. ³¹Tsa' mitya, ¿umaa tyee finuj deewa? ¿tyee kujchinuj deewa? ¿ti jallee pannuj deewa? tya' pensandyan chutyudei. ³²Matyu Diosnu keranguityu chachillaa entsatala aa pensanguen chumu deeve. Tsaanuren selusha chumu ñulla! Apaya ñulla titi meneste deeñuba mive. ³³Tsa' mitya Dios rei ju', naakesa tyañu bain juntsanaa kayu aa menesteju keewaadei. Tsanguetaa bene kumuinchu entsa ñulla meneste judeeshu juntsa bain kanu detsuve. ³⁴Tsaju' ayu malu' mityaya naajuchunga tya' pensandyan chutyudei, matyu ayu maluya maaliren tinaaba pensanguikenuu faanu tsuve. Naaju malu bain maaliren mikä pensanguikenuu peletu faawaamuve.

Munu bain tsa deeve ti' patyudei.
(Lucas 6.37-38, 41-42)

7 ¹Munu bain tsa deeve ti' kuipa putyudei, Dios bain ñullanu masmi'
²tsangui'nutsu. ²Ñulla veelanu naake kuipa pu' depañuba, Dios bain ñullanu tsaren mannu tsuve, tsenmin veelanu naadekiñuba, Dios bain ñullanu juntsangue mannu tsuve. ³Tsejtu, ¿nenñaa ñu' naatala' kapukanu kaa ujtupen punamunaa kata'ba, ñu' kapukanu aa tepulla ma punañuu jumunaa katatyu jutuuyu? ⁴Tsaju!, ¿nejtaa ñu' naatala' kapukanu, ujtupen punamunaa mangalaanu panu juyu, ñu' kapukanuya aa tepulla ma punañuu jumunaa katatyumujchiba? ⁵¿Nu, tsa jutyuren tsaañungue keewaamu chachi! Nu' kapukanu aa tepulla pumaa ajke' mangalaade, tsejtaa ñu' naatala' kapukanu bain ura' kera' ujtupe pumu mangalaanuu juve.

⁶Ti bain Dioschin kuraa jumulaya kuchanu kuwatyddei, tsandenna ñullanaa ja' dedaañike'banguenu dejuve. Naa balenchi pi'kelaa vi juula bain ku'chinu keputyudei, na'baasa demenaa terekenu detsuve.

Pa'dei, mi'kidei, juukapanu pajidei.

(Lucas 11.9-13; 6.31)

⁷Diosnu pa'dei, tsenmala Dios kuwanu tsuve; mi'kidei, mi'kishu juntsaa katanu detsuve; juukapasha pajidei, tsenmala juukenu detsuve. ⁸Matyu mun pa'mulaya kamu deeve; mun mi'kemulaya katamu deeve; tsenmin juukapasha pajimulanuya juukemu deeve.

⁹Tsejtu ñnulla mallee lu'tsa' na pan pakenmala, ¿shupukaa kunu juyu? ¹⁰Tsanguityu'ba, pi alla pakenmala, ¿piñee kunu juyu? ¹¹Tsa' mitya ñnulla, kayu firu' chachillaaba ñnulla' kaillanu tiba uraa kumu deeshu juntsaa, ¿ñnulla' Apa kai'sha chumaa kayu naaju uraa kuwai'chunga, mun yanu depa'ñuba! ¹²Tsa' mitya ñnullanu veela naadekesa tenñuba, ñui bain yalanu juntsanguen chudei, tsaju' naa Moisés' wandya lei bain, naa Diosa' mitya pamu rukula bain ura patiñuya entsaa depa' shuikive.

Selusha vinshaya kaa bungu juukapa juuñuuve.

(Lucas 13.24)

¹³Diosba ura' chunuya kaa bungu juukapa juuñuunaa vi' jidei, matyu tupiya' neiñuu ikaamu miñuya aa bunguve, tsenmin naraa uu nenuu miñu juve. Tsenñu jungaa pure' chachilla vi' jimu deeve. ¹⁴Tsaaren livee insha miya' jimu juukapaya kaa bunguu ju', miñu bain taaju' neinuu miñu juve; tsaañu' mitya, juntsa miñunu jimulaya jayun judeeve.

Diosa' mitya pamu jutyulanu keenganu

(Lucas 6.43-45)

¹⁵Anbutitun Diosa' mitya pamu deeyu timulachi chi'kayan jetyu pashkayajtu keetanadei; yalaya keranchiya uveja juuñuu katawaturen, tsaa firu jeengucha juuñuuren tsa deeve. ¹⁶Tsaañu ñnulla yala tyee kiikemu deeñuba juntsanu keetadituren keenganu dejuve. Asu tsaatyuka, pu chinuya uva puka ityuve, naa igu puka bain maali awamu pijchuwatala ityuve, ne juntsaave. ¹⁷Naaju chi bain uraya, ura puka kumuve. Tsaaren chi urajtuya, urajtu puka kumuve. ¹⁸Main ura chiya mushaa puka kun jetyuve, naa urajtu chi bain uraa pukaya kun jetyuve. ¹⁹Tsaju' naaju chee ura puka ityu ju' bain juntsaya tula' ñisha keviimuve. ²⁰Entsaañu' mityaa, anbutitun Diosa' mitya pamu deeyu timulanu bain yala tyee kiikemu deeñuba juntsanu keetaditun, urajtu cheeba deju', musha puka kuwan tsanguemu deeñuba ñnulla keenganu dejuve.

Naa-itaa Diosa' junga jinu ju'ba

(Lucas 13.25-27)

²¹Mu bain inu: Bale Ruku, Bale Ruku, tiitimü deju' mityaa, Diosnu yala' rei juu tananu dejetyuve; tsa jetyu', naajulaa selusha chumu in Apa naakesa tyañuba tsanguen dechu'ba, juntsalan yala' rei juu tananuu juunu detsuve.

²²Tsa' myta tiba kavitu dekenu malunaa pure' chachilla inu entsandiititu detsuve: Bale Ruku, Bale Ruku, ñunu pakataa ñu' palaa veelanu mijakaamuwa deeyu, tsenmin ñunu pakataa naaju dyabululanu bain majuka'laamuwa deeyu, tsenmin ñunu pakataa naa tiba tsamantsaa ke' keewara juu bain kiikemuwa deeyu, tinu detsuve. ²³Tsa tsa detinmala iya yalanu: Jayuba kerajtuyu, ñullanu kerandendyuve, firu' ken chumu chachilla miji de-ii, tinu tsuyu.

Lanba' butyunu ya jumu bain, ñiipesha ya jumu bain
(Lucas 6.47-49)

²⁴Tsa' myta mun in palaa mere' iya naatiñuba tsangue meenguemushu juntsaa, ma ruku mika shili pensa ju' lanba' butyu jandala ya kemu ruku juuñuuve. ²⁵Tsenñu naa shuwa bain, pillu bain, naa ajaa ishuwa bain ja' juntsa yanu daran juyiñu bain bujityu juve, matyu lanba' butyu jandala nara wajpu' myta. ²⁶Tsaaren mun in palaa meeturen, iya naatiñuba juntsanguen chutuyu, ma ruku shili pensa jutyu' ñiipesha ya kemu juuñuuve. ²⁷Tsenñu naa shuwa bain, pillu bain, naa ajaa ishuwa bain jadeinmalan ya' ya desenaa ji' bujiñu, ¡matyu tsaa tenbiyaimi!

²⁸Tsejtu Jesús kumuinchí entsandi depa' dyañu, naake mijakaataa tsandiñuba chachilla mika meenbaishla, ²⁹ne Moisés' wandya lei mashturula naake mijakaamu deeñuba tsanguityu', yaa uwain tsandinuu ju' mijakaakaa keñu' myta.

Manbityu bishpeechi dilunu Jesús ura' mandiremi.
(Marcos 1.40-45; Lucas 5.12-16)

8 ¹Jesús butyusha putun manbajtya' miñu, chachilla pure' surekila.
²Tsaindetsu ma ruku manbityu bishpee tene juu ya' ajuunu telenajitu: Rukui, ñuren tsanguenu tenñuya, inu ura' mandireka; iya mijayu, ñu in dilu peya manbirenuu juñuba, timi.

³Tsandiñu, Jesús tyapachi ta'katu tsandimi: Uwain tsanguenu tenve. ¡Ura' mandiyade! timi.

Tsandinmalan bishpee tene juu ruku jeke ya' bishpee demanbiremi.
⁴Tsenñu Jesús tsandimi: Munuba entsa kuinda kityude, tsaaren chachilla' myta Diosnu kalen jimu rukula' jungaa ji' keekutide. Tsejtu juntsan myta Moisés tyee kenu dejuve timuñuba juntsaa ke' ufeenda tají' kuwade, tsejtaa diluren ura' mandiyayu ti' keewaanmala veela bain ñu uwain ura' mandiyañuba mijanudetsu, timi.

Suutadu ama' chachinu Jesús ura' mandiremi.
(Lucas 7.1-10; Juan 4.43-54)

⁵Jesús Cafarnaúmsha vijiñu, main romano suutadu ama kalen jitu
⁶tsandimi: Bale ruku, in yasha inchi taawasha kemu chachinu diluu ma tanayu. Dedeelaa ju', juikenu jutyu', kitya' ma u'tandin tsunamuve, timi.

⁷Tsandiñu, Jesús: Tsaaya ji', ura' mandirenu tsuyu, timi.

⁸Tsenňu suutadu ama pakatu tsandimi: Bale ruku, iyaa ti baleba jutyu chachi' mitya naake' ūnunu in yasha mikan tsaayu. Matyu ūnu uudengue' patiňun mikanu juve, tsenmala inchi taawasha kemu chachi ura' mandiyantu tsuve. ⁹Naa i bain tsaren veelachi uuden imuyu; tsaaren i bain in suutadulanuya uudenguemuyu. Matyu iya mainnu: Jide tinmalaya, jimuve; naa veranu bain: Jade tinmalaya, jamuve. Tsenmin naa inchi manda-i' taawasha kemunu bain: Tyeeba kide tiňu bain, kemuve, timi.

¹⁰Entsa ruku tsandiñu, Jesús meenbaishtu, ya' bendaas nemulanu tsandimi: Uwaindiyu Israel chachillanu naa munu bain entsa ruku naake keenguemüuba yanu pullangue inu keenguemü juunuya maliba katainduyu, timi. ¹¹Tsa' mitya uwaindiyu pajlainsha chulla bain, naa pajvinsha chulla bain Dios rei ju' chuinsha pure' viitu, Abrahamba, Isaacba, Jacobba manbelaa chudi' panda finu detsuve. ¹²Tsenmala Diosnu yala' rei tananuu jumu chachillaa avindala tsamantsa yapijurunainsha dekeví' ware', naa tejkuba pakaantsunu detsuve, timi. ¹³Tsejtu Jesús suutadu amanu tsandimi: Miide, ūnu naakesa tyá' pensanguinuba Dios tsanguenu tsuve, timi. Tsandinmalan dilu tsumu jei ura' mandiyami.

Jesús, Pedro' anchamanu ura' mandiremi.

(Marcos 1.29-31; Lucas 4.38-39)

¹⁴Jesús Pedro' yasha jitu, entsa ya' anchamanu dilu' penguma juu tsuna katajimi. ¹⁵Tsejtu Jesús ya' tyaapanu ta'kakenmalan penguma ishanbajtekemi. Tsenmin juntsa shinbu mangujpa' yanu tyeeba ke' kudundaimi.

Dilu purenamulanu Jesús ura' mandiremi.

(Marcos 1.32-34; Lucas 4.40-41)

¹⁶Dekependu' kainsha Jesús' junga, dyabuluchi ikayaa chachillanu pure' tajiila. Tsa deiňu yaa ma palaachiren juntsa bu'chullalanu demajuka'lare' me-eemi, tsenmin naaju dilulanu bain millangue ura' mandiremi. ¹⁷Entsaa puimiya, Diosa' mitya pamu Isaías tsainu tsuve ti' pamuwañaňu, tsaa puitaa tsaimi, entsandimuwaaňu: *Lala pulujtu chachi deeňu' mitya, yaa kumuinchí lala' dii peya deka' miive,*^s ti' pillañaňu' mitya.

Jesús' bendaas jinu naaju taajuňu bain

(Lucas 9.57-62)

¹⁸Chachi pure de-i' yanu yatai de-uidiňu, Jesús aa pusu bejkusha tyakakaakutinu pamí. ¹⁹Tsenňu Moisés' wandya lei mashturu main jitu Jesúsnu tsandimi: Mashturu, ūnu nuka jijiňuba inu bain jinu tenve, timi.

²⁰Tsenñu Jesús pakatu: Naa jeengucha juula bain yaichi vi' tsutsudinu tujuu tadeeve, naa pishku juula bain yaichi yatape tadeeve, tsaanuren Chachi Tiya' Nakayamuya naa nuka bain mishpuka llai'kare' tsuunuba ma tajtuuve, timi.

²¹Tsenñu ya' disipulu bain main tsandimi: Rukui, tsaashu juntsaa, in apanu ajke' menjinu tsuyu, timi.

²²Tsandiñu Jesús pakatu: In bendalaajade, junga keepele kityude; inu keranguityu chachillaya yumaa peyaiñuu dechu' mitya, yaitala demensa, timi.

Jesús ishuwanu bain, pisundanu bain mandyawaami.

(*Marcos 4.35-41; Lucas 8.22-25*)

²³Tsanditu Jesús baakusha viñu, ya' disipulula bain ya' bendala bulu vi' jila. ²⁴Tsai' jindetsu, ne tsainu tsuve tyaba indetyun, pisunda ishuwaba jelekingue' baakunu pitansha pupukentsumi. Tsaintsuren Jesύsa kasu'tsunami. ²⁵Tsenñu ya' disipulula yanu mandengaajitu tsandila: ¡Bale Ruku, lalanu livee kika! ¡Lala ma baiviindetsuyu! tila.

²⁶Tsa detiñu Jesús yalanu tsandimi: ¿Nejtaa ñullanu tsamantsa jeetenguen? ¡Nejdeeyu ñulla ura' keengenu mijtula! timi. Tsandi' dya' uiditu ishuwanu bain, lamaanu bain ajaa tiñu, nejui mandiyala.

²⁷Tsanguiñu juntsa rukula yuj dekeenbaishu yaitala tsandila: ¡Entsa naaju rukuñaa, naa ishuwa bain, pisunda bain yanu meenguemutu den? tiitila.

Gadarasha firu' bu'chulla puu chumu pai rukula

(*Marcos 5.1-20; Lucas 8.26-39*)

²⁸Jesús juntsa aa pusu bejkusha Gadara tusha tyakañu, pai chachi, dyabulu puu jumula ujkun mennu lanba' tujuutala chumula defale' yanu kalen jila. Entsalal tsamantsa firu' kiikemu deeñu' mitya, mu bain juntsa miñu keetalaya puinu jutyu jujuula. ²⁹Tsejtu juntsala entsandi ui'la: ¡Diosa! Na, lalanu jaiba bulla kijatyuka! ¿Umanbelen lalanu taaju kikaachi tenñu iyu tsai' jami? tiitila.

³⁰Tsandindetsunu tenanu naa baanatyuinsha pure' ku'chi panda fiken uidenañu, ³¹juntsa dyabulula Jesúsnu tsandila: Entsa rukulanu puren, ñu lalanu majuka'laashu juntsaa, juntsa ku'chilanaa manbuiteka, tila.

³²Tsa detiñu Jesús pakatu: Tsaaya tsайдei, tiñu, juntsa firu' bu'chullala chachillanu demalu' miji' ku'chisha tene mavideinmalan, ku'chila tsaa yangachi tene ji' lanba' kujtusha deyanbu' aa pususha depajtya' chukakila.

³³Tsenñu ku'chi washkemu chachilla denepiya' pebulusha miitu, tyee iñu bain, tsenmin juntsa dyabulu puu chachilla bain tyee de-iñu bain dewanditila. ³⁴Tsejtu tsaa kuinda dekiñu, juntsa pebulu' chulla kumuinchu demijatu, Jesús' junga dejí' katatu, juntsa tenanu malu' miide, ti' u'tandila.

Dedeelaa dii rukunu Jesús ura' mandiremi.

(*Marcos 2.1-12; Lucas 5.17-26*)

9 ¹Entsa' depuitu Jesús baakusha mavi' bejkusha mandyaka' ya' chunu pebulusha miimi. ²Tsenñu Jesús' junga main dedeelaa wandunu tsuu tajila. Tsai' tajimula Jesúsnu mika dekeranguiñuba mijatu, Jesús dii rukunu tsandimi: Sunden jude, kaana, ñu' ujcha demanbitsalave, timi.

³Tsandiñu Moisés' wandya lei mashturula mantsa yala' pensashaa: "Entsa rukaa Diosnu kentsure' pantsuve", pensanguila. ⁴Tsenñu Jesús, yala naatyandetsuñuba mijatu tsandimi: ¿Nejdeeyu ñnulla tsamantsa firu' pensala? ⁵¿Entsa rukunu: Ñu' ujcha' mitya manbitsalave, tityumujchi: Mangujpa' miide, tiñu bain tsaren jutyuu? ⁶Matyu ñnulla naa Chachi Tiya' Nakayamuya entsa tusha chachilla' keñu ujcha manbitsaanuu juñu bain keewaanu tsuyu, titu, dedeelaa tsumu dii rukunu tsandimi: Mangujpa', ñu' wandu manga', ñu' yasha miide, timi.

⁷Tsandiñu dilu dedeelaa tsumu ruku mangujpa' ya' yasha miimi. ⁸Entsanguinu chachilla dekeenatu tsamantsai dekeenbashi' Diosnu yuj ura' kemu rukuve tila, chachillanuba tsamantsa juntsaa kenu tireñuba dekata' mitya.

Jesús, Mateonu ya' disipulu tirenu mikami.

(*Marcos 2.13-17; Lucas 5.27-32*)

⁹Jesús tsangue' miindu ma ruku Mateo detiñu, buli tajimulanu Roma uñichi deechu' mitya lushi kamu jutu, lushi kainsha chuna katatu: In bendala ja' in disipulu tiyade, timi.

Tsandiñu, Mateo kujpa' ya' bendala jimi.

¹⁰Tsenñu Jesús panda findu yasha chunañu, bui tanemulanu Roma uñichi deechu' mitya lushi kamula bain, naa vejan ujcha lan kuramu chachilla bain pure' jade-i', Jesúsba manbelaa ya' disipululaba bulu chula. ¹¹Tsa deiñu, fariseola keenatu, ya' disipululanu entsandila: ¿Nenñungue ñnulla' mashturuya Roma uñichi deechu' mitya lushi kamu chachillabaa bulu chudi', naa vejan ujcha lamu chachillanu bain tsaren bulu chumishti' yaiba bulu panda fintsumi? tila.

¹²Tsa detiñu Jesús meetu tsandimi: Tiba dilujtu chachillaya dilulanu ura' mandiremulanu menestejdetuve, tsaaren dilulaya meneste deeve.

¹³Tsa' mitya mii tu entsa palaa naatitaa tsandiñuba aseetanguidei: Tenbityamu chachee dejusa tenve; ne animaa tute' ju'ke' inu keewaanun dejutyusa tenve.^t Matyu iyaa Dios naakesa tyañuba tsanguen chumu chachillanu mikanu jaindyuyu; iyaa ujcha lamu chachillanaa mikanu jayu, timi.

Diosnu pensangue' panda fi'nutala
(Marcos 2.18-22; Lucas 5.33-39)

¹⁴Juan Mungaamu' disipulula Jesús' junga jitu tsandila: Laa bain, naa fariseola bain Diosnu pensangue' panda fityu juju deeñuba, ¿nejtaa ñu' disipululaya tsanguitytu den? tila.

¹⁵Tsenñu Jesús pakatu: ¿Matsunu fandangu kendu, matsumu ruku yaiba bulu puren padena apala llaki juu punu dejun? ¡Tsa jutyuve! Bene uwain inu, matsumu ruku juuñuunu manga' miinu tinbu janu tsuve; tsenmalaa umaa uwain Diosnu pensangue' panda fi'nu detsuve. ¹⁶Kayu laapu' patu, tsandimi: Mu bain uinbu jalinu kasa jai petse mangaaputyu deeve, matyu kasa jaliya buru' kayajtu' mitya, mangaapunmala buru' kamin, uinbu jalinu kayu aa kiyuu-eekenu juñu' mitya. ¹⁷Tsenmin mu bain kasa binuya, uinbu binu puntsumi ki' buusanu putyu deeve, kasa binuya uinbu ki' buusanu kiyuu tse'ware' desejiinmala, binu bain, naa ki' buusa bain dekeviinuu juñu. Tsa' mitya kasa binuya kasa ki' buusanu punmalaa, naa binu bain, naa ki' buusa bain tsaren tiba ity' tsananu detsuve, timi.

Jairo' na'ma bain, main dii shinbu bain
(Marcos 5.21-43; Lucas 8.40-56)

¹⁸Tsejtu Jesús tsandin puren, judíola' bale ruku main ji' ya' ajuusha teleditu: In na'ma challan peyaiñu jayu, tsaaren ñuren ja' ñu' tyaapachi yanu ta'kashu juntsaa, mangujnu tsuve, timi.

¹⁹Tsenñu Jesús kujpa' ya' disipululaba juntsa ruku' bendaajila.
²⁰Tsaindetsun ma shinbu asa senduwaraa dilu chuturen 12 aña ma iiintsumu shinbu Jesús' benesha ji' ya' jai kapanu ta'kakemi, ²¹matyu maaliya entsangue pensanguiiketu: "Ya' jai kapanu ta'kakituren ura' mandiyano juyu", tyatyaitu. ²²Tsenñu Jesús benesha mangue-ere' katatu tsandimi: Puluke pensanguide, kaa na'ma; uwain ñu' tsainu tsuve tya' kerangue' mityaa ura' mandiyave, timi. Tsandinmalan juntsa shinbu jei ura' mandimi.

²³Tsenñu Jesús juntsa bale ruku' yasha jitu, peyañu fandangu kiiemula dewa'na kata', naa chachilla bain ware' vishkiindindetsu katajitu: ²⁴Enu demalu' mijii, kaa na'ma peyai'mujchi kasu'tsutun tsanave, timi.

Tsandiñu, chachillaya ne tuukapundila. ²⁵Tsa detiñun chachillanu avindala deme-e'laañu, Jesús juusha vitu, juntsa pemu kaa na'ma' tyaapanu kakenmalan mangujpaimi. ²⁶Entsanguiñu, juntsa tushaya naa nukaba juntsa kuinda demijaila.

Pai ruku kapuka putyulanu Jesús ura' mandiremi.

²⁷Jesús tsangue' malu' miintsuñu, pai ruku kapuka putyula ya' bendala entsandi' ui'sai jila: ¡Rei Davidnu sera' jamu Na, lalanu tenbityaka! tiitila.

²⁸Tsejtu Jesús yasha viñu, juntsa pai ruku kapuka putyula ya' junga deviñu, Jesús tsandimi: ¿Iya ura' mandirenuu juve tenñaa tsa de-ii? tiñu; Ruku, ñuya tsanguenuu juve, tila.

²⁹Tsenñu Jesús yala' kapukatala deta'katu tsandimi: "Uwain tsanguenu tsuve", tya', naake dekeenguiñu bain juntsaisa tenve, timi.

³⁰Tsanguiñu yala katamu tiyala. Tsenñu Jesús yalanu uudenguetu tsandimi: Entsanguiñu naa munu bain waintyudei, timi.

³¹Jesús tsandiñun, junu demalu' miimin, juntsa tusha chumu chachillanu, nuka bain Jesús tsanguiñu kuinda deseranguila.

Papatyu rukunu Jesús ura' mandiremi.

³²Kapuka putyula katamu detiya' malu' miinu uranu, ma ruku dyabulu puu ju' papatyunu Jesús' junga tajila. ³³Tsenñu Jesús, juntsa dyabulunu mavelekenmalan papatyu ruku pamu tiyami. Tsanguiñu chachilla mika keenbashindu: Naa-awanuba Israel chachiitalaya main entsanguiñu kata' kerajtuwa deeyu, tiitila.

³⁴Tsenñuren fariseolaya entsa entsandila: Entsa rukunu dyabulu uñi tsanguikaañaa dyabulu me-e'laalaakive, tiitila.

Chachillanu Jesús tenbityami.

³⁵Jesús naaju pebulutala bain, naa kaa pebulutala bain ne', yala' waku wakudinu yatala ne', Diosnu rei juu tananu jumu mika ura kuinda mijakare' wandis neneimi. Tsejtu naa ti diipeya juu tadeeñu bain, naa ti kiyanchi dilu deeñu bain ura' mandires neneimi.

³⁶Tsaindu chachilla tsamantsa waku wakudediñu Jesús katatu yuj tenbityami, yalanu muba washikenuu chachi miyajtu deju', uveja juuñuu tyubaa deju', u'taita nenedeiñu katatu. ³⁷Tsejtu ya' disipululanu, Jesús laapu' patu tsandimi: Uwaindiyu finu puka imuya pureeve, tsaaren te'kamulaya jayun judeeve. ³⁸Tsa' myta ñulla entsa pu' vijtya miya rukunu pa', te'kamu chachilla eede ti', pa'dei, timi.

Jesús 12 ruku mi'ke' kami.

(Marcos 3.13-19; Lucas 6.12-16)

10 ¹Tsejtu Jesús ya' 12 disipululanu demikatu, Dioschi urajtu kuraa tiremu bu'chullalanu deme-e'laanu tiremin, naa ti diipeya jumulanu bain ura' manguenuu tiremi.

²Entsalaa juntsa 12 unbere, Jesús' myta kuinda kenu lara' eramu rukula deeve: ajke' jumiya, Simón titun, Pedro tiitinu ruku bain, ya' naatala Andrés bain, Zebedeo' pai nala Santiago bain, Juan bain; ³Felipe bain, Bartolomé bain, Tomás bain, naa romano uñichi deechu' myta lushi kamu Mateo bain, Alfeo' na Santiago bain, Tadeo bain, ⁴naa Simón, Diosa' lei naajuñuba tsa deki'ñu selandyamu tinu ruku bain, tsenmin Jesúsnu kundaalanu wandi' kakaamu ruku Judas Iscariote bain.

Jesús ya' 12 disipulula tyee kenu deeñuba wainmi.

(Marcos 6.7-13; Lucas 9.1-6)

⁵ Jesú entsa 12 disipululanu eendu titi kenuu dejuñuba entsandi dewandi' eemi: Judío chachi jutyula' jungaya ji' netyudei, tsenmin naa Samaria pebulutala bain vi' netyudei. ⁶ Jimiya Israel chachilla, uveja juuñuu washkemu chachi miyajtu deju' tupiyañañuu nemula' jungaa jidei. ⁷ Junga ji' kuinda ke' wandi', Diosnu rei juu tananu malu yumaa kalen jave tiitidei. ⁸ Dilulanu ura' mandire', naa pemulanu bain manguje', naa manbityu bishpeechi diluulanu bain ura' mandire', naa chachillanu dyabulu punañu bain majuka'lare' mee-eekidei. Tsejtu ñulla tiba paangui'mujchin tsangues nenu tiramu de' mitya, yalanu bain ura' demandire' me-ere'ba tiba katyudei. ⁹ Lushi ta'tyudei, ne uru juu, ne plata juu, ne kubre juu lushi juuñu bain, ñulla' buusasha ka' pu' tajityudei. ¹⁰ Jalichi kiñu buusanu tiba mindala fikenuu puu tajityudei, naa vera manbanakenuu jali bain, naa sandalia juu bain, naa tyu'ke' nenu cha'li juu bain jayuuba ta'tyudei, matyu naaju taawasha kemu chachilla bain yala' taawasha' mitya panda finuu junu detsuve.

¹¹ Naaju pebulutala ji-i' bain, naa kaa pebulutala ji-i' bain, naaju ruku' junaa kajdiñu urañu kajdi' bain, juntsa pebulunu malu' miityumujchiya junun tsanadei. ¹² Tsaju' juntsa yasha vindu junu chumulanu: ¡Ura' dejusa! tidei. ¹³ Tsenñu junu chumu chachilla ura deenmalaya, yalanu tiba bulla jutyu dejusa tyá' ñulla depañu tsainu tsuve. Tsaaren yala ura' iinuu chachi dejui'shu juntsaya, ñulla yalanu ura' dejusa tyá' depañuba tsa-in jutyuve. ¹⁴ Tsenmin tsandenna ñullanu yasha naa mikandyaba de-ityu', naa ñulla' kuindanu bain needin detyatyunmalaya, ne yasha manbajtya' mijiindu, ne pebulunu malu' mijiindu bain, ñulla' neepanu ujtupe demangasha'pukidei, tsanguitaa Dioschi urajtu chachi dekure' keewaanu juñu' mitya. ¹⁵ Uwaindiyu Dioschi kavitu dekenu malunaa juntsa pebulu' chulla, Sodoma pebulunu bain, Gomorra pebulunu bain chumu chachilla naake taaju ke' puinu deeñuba, juntsalanu kayu pullai taaju ke' puinu dejuve, timi.

Firu' kes nemula bendaa kenu detsuve.

¹⁶ Ñullanu ne uvejaaba dejuñu, jeengucha kejtsapala eren tsanguentsuyu; tsa' mitya piñi tsaa bibu' juturen, jungajte vejmi' tiba firu' kityu paluma jun tsaadei. ¹⁷ Tsaju' chachilla' kejtsapala wajlatyudei, ñullanu ka', jundaa chumu bale rukulanu kuwa'kera, naa yala' waku wakudinu yatalaba bande' kera kenu detsuve. ¹⁸ Naa in mityaren ñullanu uñila' junga taji'kerake, reila' junga taji'kerake' bain tsa tsanguenu detsuve. Tsa dekenmalaya yala' ajuusha bain, naa judío chachi jutyula' ajuusha bain ñulla iya maa juñu bain wandi' papatinuu junu detsuve. ¹⁹ Tsangue' ñullanu, bale rukula' ajuutala detakenmala, ne tyee pakeechunga, naati pakeechunga tyá' pensandyatyudei, matyu ñuichi panu ura janmala naati panuu juñuba

Diosya ñullanu tsandikaanu tsuve. ²⁰Matyu pa' bain ñullaa panu dejutyuve, ñulla! Apa! Espíritu ñullanu pumaa panu tsuve.

²¹Tsaa malutalaalaa naatalaalaa de-ajaavi' bale rukulanu dekuwa' tu'kaanu detsuve; naa ya' apala bain ya' nalanu tu'kaanu detsuve, naa ya' nala bain ya' apalanu ajaavi' tu'kaanu detsuve. ²²In mityaren kumuinchii chachilla ñullanu tyutyanu detsuve, tsaaren naa tsa deiñu bain mun de-inbera tujlei'mujchi naake ura' kerangue' jintsu'ba tsaa jintsushu juntsaa livee inu tsuve. ²³Naa-uwanu ma pebulunu firu' kenu bendaan dekiñuba, vee mujtu pebulusha nepiya' miji mijiidei. Matyu uwaindiyu ñulla Israel pebulu jumulanu deneba indetyuren, Chachi Tiya' Nakayamu maanu tsuve, timi.

²⁴Naaju disipulu bain ya' mashturunu pullaa jutyuve, naa manda-i' taawasha kemu chachi bain, muba yanu uudenguemunu pullaa jutyuve. ²⁵Ma disipuluya ya' mashturu naajuñuba ya bain juntsai tiyatun mikave tyanuu juve, yanu puinu pensangui'mujchi; naa manda-i' taawasha kemu chachi bain yanu uudenguemu naajuñuba ya bain juntsai tiyatun mikave tyanuu juve, ne yanu kayu puinu pensangui'mujchi. ¿Matyu yasha uudenguen chumu rukunaaba dyabulu uñi Beelzebúve timuwa deeshu juntsaa, ka ya' yanu chumulanaa kayu naa timu deenga?

Munaa jeetyanuu juñuba (Lucas 12.4-7)

²⁶Tsaañu' mitya chachillanaa jeetyatyudei. Tyee dus uukaraañuu ju' bain katawan jutyuuya jutyuve, naa tiba pantsuraañu ju' bain mijakeyan jutyuuya dejutyuve. ²⁷Iya tyee pa' dishkejtsa pan tsandiñu bain, ñulla manbamiya dedanguiñu manban tsandidei, tsenmin iya punguinu dus pan tsandiñu bain, ñullaa ya mututala uidi' daran padei. ²⁸Cha' buluya tu'turen, aamaya tu'nu jutyulanuya jeetyatyudei. Ura jeetyamiya, bulu bain, naa aama bain ñi jelekenu kensha eepukennu jumu Diosnaa jeetyadei.

²⁹¿Ma kaa pakì lushi juuchin pai kaa pishku ai'mu deetyuka? Naa tsaañu bain, ñulla! Aparen entsa pishkulanan tsa deisa tyai'shu juntsaya, maliba peya' tusha pajtyatyu deeve. ³⁰Tsenmala ñullanu laapu' panmalaya, naa ñulla' mishpukasha chumu achuwanan bain nan dechuñuba Diosya main main demikaa tanave. ³¹Tsa' mitya jeetyatyudei, ñullaya pishku pure' wakukare' pensanguiñuba kayu juntsa pishkulanan pulla bale deeve.

Cha' ajuusha Jesúscchi deeyu tinu (Lucas 12.8-9)

³²Mun inu keenguemu ju', chachilla' ajuusha in chachiyu timunuya, i bain in Apa selusha chumu' ajuusha, ya' mitya pa', in chachive tinu

tsuyu. ³³Tsaaren mun inu keenguemu ju' bain chachilla' ajuusha in chachi jutyuyu timunuya, i bain in Apa selusha chumu' ajuusha ya' mitya pa' in chachi jutyuve tinu tsuyu, timi.

Jesús, chachiitala devela' eekaamu
(Lucas 12.51-53; 14.26-27)

³⁴Iya entsa tusha jatu tiba bulla jutyu chukaanu jave tyatyudei; iya tiba bulla jutyu chukaanu jatyu', peletu faawaakaanaa jayu. ³⁵Matyu iya jamiya ya' nala ya' apalaba peletu faaware'kerake, ya' na'mala ya' amalaba peletu faaware'kerake, tsenmin suyala ya' anchamalaba peletu faaware'kerakikaanaa jayu. ³⁶Tsa' mitya muchi bain ya' kundara jumiya ya' paandelaren junu detsuve.^u ³⁷Mun ya' apanu, ne ya' amanu juu kayu inu pullai estyamuya in chachi tiyanuu jutyuve; tsenmin mun ya' nanu, ne ya' na'manu juu kayu inu pullai estyamuya in chachi tiyanuu jutyuve. ³⁸Tsenmin mun in mitya tut'a'ba tutainuu juu ya' kuusa nanakiñungue' in bendaajatyulaya in chachi tiyanuu jutyuve. ³⁹Mun ya' chungamaya maali balengurenu tyashu juntsaa uwain naa-uwanuba tsana chuntsumi katan jutyuve; tsaaren mun in mityan ya' chungama maali balenguutu yushu juntsaa naa-uwanuba tsana chuntsumi katanu tsuve.

Tyeeba naraa deka' sunbenu
(Marcos 9.41)

⁴⁰Mun ñullanu sunden mikamuya, naa inu bain sunden mikantsuve. Tsenmin mun inu sunden mika' bain naa inu eemunu bain sunden mikantsuve. ⁴¹Mun Diosa' mitya pamu rukunu, matyu Diosa' mitya pamuve tya', sunden mikamuya, Diosa' mitya pamu rukunu tyee naraa kuwa' sunbewaañuba, mikamu bain tsaren juntsa naraa ka' sunbenu tsuve. Tsenmala mun, Dios naakesa tyañuba tsanguemu rukunu, Dios naakesa tyañuba tsanguemu rukuve tya' sunden mikamuya, juntsanu tyee naraa kuwa' sunbewaañuba, mikamu bain tsaren juntsa naraa ka' sunbenu tsuve. ⁴²Tsenmin mun in chachi mika tenbiyaa juñu bain, in disipuluve tya', ma basu pi ishpiiñuba kumuya, uwaindiyu tsanguen mitya bene tyeeba uraa kanu tsuve, timi.

11 ¹Jesús entsandi depa', ya' ¹²disipululanu titi kenuu juñu bain dewandi' junu malu' miitu, jundaa chumu pebulutala Diosa' mika ura kuinda mijakares nenu jimi.

Juan Mungaamu' era chachilla Jesú's' junga jila.
(Lucas 7.18-35)

²Tsenñu Juan Mungaamu peesu puturen, Dioschi Mi'ke' Kayamu naakes neneintsuñuba mijatu, mantsa ya' disipululanu eemi ³yanu

pake'meenu, naa uwain yaa Livee kemu entsa tusha jainuu jushu juntsaňu bain, naa veranaa kayu keenanuu juňu bain mijanu.

⁴Tsenňu Jesús pakatu: Miitu Juannu ñnulla naake kata' bain, naake mere' bain, tsandi kuinda mandei: ⁵naa kapuka putyula bain katamu detiyave, naa ura' netyula bain ura' demandiyave, naa manbityu bishpeechi dilula bain ura' demandiyave, naa pungui merajtula bain meemu detiyave, naa pemula bain demangujve, tsenmin lastema chumulanu bain Diosa' mika ura kuinda mijakaandetsuve, tidei. ⁶Tsenmin mun iya tsanguinu kataataake'ba in mitya kundaa tyatyu ju' bain, juntsaya Dioschi ura' imuve, timi.

⁷Juan' disipulula miindetsu, Jesús Juannu laapu' pa' chachillanu kuinda ketu tsandimi: ¿Nulla tiba den chutyuin tenasha jitu ti katanaa dejiju? ¿Nañi ishuwachi balla' juya juyaantsu katanaa dejii? ⁸Tsa jutyushu juntsaa, ¿tyee katanu dejiju? ¿Ma ruku balenchi jali panaanu katanaa dejii? Nulla mideeve balenchi jali panaalaya reila' yatalaa chumu deeňu bain. ⁹Tsaaya, ¿tyee katanaa dejiju? ¿Diosa' mitya pamu ma rukunu katanaa dejii? Tsaave, uwain tsa deive, Diosa' mitya pamu rukunu katanaa dejive, tsangues nemu rukuutalaa kayu pullaa jumunu. ¹⁰Juannu laapu' pataa Diosa' Kiikanu entsa pillave: *In mitya wairmu rukunu main ňu' ajkesha erentsuyu, tsenmalaa ňu tyeengues nenuuňuba tsanguenu peepu' tsuunutsu,*^v til' pillave. ¹¹Uwaindiyu naaju chachillaba Juan Mungaamunu kayu pullaa dejutyuve, tsaaren Diosnu yala' rei juu tanamulachiya kayu balejtu ruku juuňuulaa Juannu pulla deeve.

¹²Juan Mungaamu jaňu peepumin, chaikama, Diosnu rei juu tananu tinbu, apain tsai tiyasa ty'a, mantsa chachilla deranchi tsaa tirenu kenchin judeeve. ¹³Matyu Diosa' mitya pamu rukula naajula bain, naa Moisés' wandya lei bain, kayu Juan engu jaindyuya Dios ya' chachillachi rei tiya' washke' mandanguenu juňu tinbu naajunuňuba juntsaatala tene wandinchin juuwa deeve. ¹⁴Iya entsandinmala ñnulla tsaaive tyanu deju' bain, naa tsa jutyuve tyanu deju' bain, ñnullaa mijadei: Juanya, Diosa' mitya pamu ruku Elías majainu juushu juntsa ruku juuňuuve. ¹⁵¡Tsa' mitya mun pungui pu'ba ura' meedi' aseetanguide!

¹⁶¿Challa chumu chachillanu tibaa laapu' panu juwa? Matyu cha' den neneindala kailla dewa'dil' aikendu yaitala entsandi papatimu juuňu deeve: ¹⁷Naa pujkuna depakaaňuba, ñnulla beela dekityuwa; naa llaki beesa dekiňu bain, ñnullaa dewaatyuwa, timu kailla juuňu deeve. ¹⁸Matyu ñullaya Juan Mungaamu ja' nendu Diosnu pensangue' panda fityu junmala, naa binu bain kushtyu junmala, ñullaya: Entsa ruku dyabulu puu rukuve, timu deeve. ¹⁹Tsenmala bene Chachi Tiya' Nakayamu jamiya, yaa panda fimu ju', naa binu bain kujchimu junmala: Entsa rukuya panda janbeendu, vin ruku, matyu romano uňichi deechu' mitya lushi kamulaba ura' keranu ruku, tsenmin ujcha lan chumu chachillaba

bulu nemuve, tiidetive. Tsaaren titi i' pullantsuñuba juntsanu keetaa naa Dios tsamantsa aseetaju' keewara juñuba aseeta imuve, timi Jesús.

Meenguityu chachillanu ajaa timi.

(Lucas 10.13-16)

²⁰Tsejtu tiba tsamantsaa ke' keewara jumula aa deke' keewaanu pebulutala chumu chachillanu Jesús ajaa ti' pam, yala veta' pensa mantyu' Diosnu meenguindetyuñu. Tsejtu tsandimi: ²¹¡Corazínnu chumu chachilla bain, Betsaidanu chumu chachilla bain! Ñulla mika taaju i' puinu dejuve. Matyu judío chachi jutyula' chunu Tiro pebulunu bain, Sidón pebulunu bain tiba tsamantsaa ke' keewara jumula deke' keewaañuya, yalaya kaspelen veta' pensa mangue' Diosnu demeengue', llakingue' keewaanu paba jali depana', naa ju'pe juula bain mishusha detsure'banguichu deeve. ²²Tsaaren uwaindiyu, kavitu dekenu malunu Sidónnu chulla bain, naa Tironu chulla bain ñulla naake taaju kenuu dejuñuba tsangue taaju kenu dejutyuve, timi. ²³Tsenmala ñulla Cafarnaúm' chullaya, ¿Selusha e'laraichu deeyu pensa dejuu? Tsa jutyuve, ñullaya pemula' pupunaru tena aa tujuushaa kevinu detsuve. Matyu Sodomanu chumu chachillanaa, ñulla' ajuusha tiba tsamantsaa jumula deke' keewaañuya, juntsa pebulu chaiba chu'ba nachuve. ²⁴Tsaaren uwaindiyu, kavitu dekenu malunu Sodoma' chullaya ñulla naake taaju kenuu dejuñuba tsangue taaju kenu dejutyuve, timi.

In junga ja' lekadei.

(Lucas 10.21-22)

²⁵Juntsa malutala Jesús entsandimi: Apa, selusha chumulachi bain, tusha chumulachi bain Bale Ruku, ñu yuj urave, entsa judeeshu juntsala aseetaju chachillanaa tsaa keewaatyumujchi, ne chachillanaa tsaa keeware' myta. ²⁶Uwain tsaave Apa, ñuren tsaisa tyañuya tsaise.

²⁷Ti bain in tyapanu tene in Apa dekuwakive. Mu bain ya' Nanu ura' kerajdetuve; ya' Aparen ura' keraave. Mu bain ya' Apanu ura' kerajdetuve, ya' Naren ura' keraave, tsenmin naajulanaa ya' Na, ya' Apanu dekeemijasa tyañuba, juntsalan ya' Apanu keemijainuu judeeve.

²⁸Naajula bain Moisés' wandya lei mashturula naadetiñuba tsa tsanguenu ke' tyubaa nemu chachillaya in junga jadei, tsenmala iya ñullanu lekakaanu tsuyu. ²⁹Tu junlemu wagara naajun mishunu cha'li teepu' chachilla miya' jiñu tu junle' jimushu juntsaañu i', ñui bain iya ti naaju kisa tyañuba juntsaa ke' inchin manda-iimu tiyайдei; tsai' iya aa ura ruku juñu, tsenmin mika tenbipu ruku juñuba in mytyaa juntsai mijadei. Tsejtaa iya naakesa tyañuba tsanguen dechushu juntsaa, ñulla' pensasha tiba jutyu ura' chunu dejuve, ³⁰matyu iya tyee kiikenu uudengueñuba juntsalaya li'pu' jutyu', uu tsanguenuu dejuñu' myta, timi.

Lekanu malunuren Jesús' disipulula trigu ka' fila.

(*Marcos 2.23-28; Lucas 6.1-5*)

12 ¹Saaduma lekanu malunu, ma malu, Jesús ya' disipululaba vijtya jundala pulla' jintsumi. Tsenñu ya' disipulula panda mutyatu, trigu dedyai' ya' ñi fidundala. ²Tsenñu tsanguindetsu fariseola keenatu Jesúsnu tsandila: ¡Ñuba keekide, ñu' disipulula saaduma lekanu malunuya ken jutyuu kendetsuve! tila.

³Tsenñu Jesús tsandimi: ¿Nulla lengue' kerajdetuu ma bijee rei David yaba bulu nemulaba panda demutyatu, ⁴Diosa' yasha vi' Diosnu keewara pan tsumunu, muba finu jutyu ju', chachilla' mitya Diosnu kalen jimu rukulan fikenuu pannun ka' fimu deeñuba? ⁵Tsenmin, ¿nulla Moisés' wandya leinu lengue' kerajdetuu, chachilla' mitya Diosnu kalen jimu rukula saaduma lekanu malunun aa eleshasha taawasha ke' bain ujcha latyu deeñuba? ⁶Tsaaren uwaindiyu naa aa eleshanuba pullaa enu main puve. ⁷Nullaya Dios entsandinu palaanu aseetanguindetyuñuve: Tenbityamu chachee dejusa tenve; ne animaa tute' ju'ke' inu keewaanun dejutyusa tenve,^w ti' pillashu juntsanu. Nulla uwain aseetangui'banguemutuya entsala ti urajtu juuba kindetyuñu' mitya, ujcha delave ti' pal'chu deeve. ⁸Matyu uwaindiyu Chachi Tiya' Nakayamuya, saaduma lekanu malutalan tyeenguenu ty'a'ba tsanguenu juve, timi.

Tyaapa ejke ruku

(*Marcos 3.1-6; Lucas 6.6-11*)

⁹ Jesús junu malu' miitu, chachilla' waku wakudinu yashaa vimi. ¹⁰Tsenñu junu ma ruku ma tyaapa yujka dedeela puñu, Jesúsnu naake' kuipa pun tsandyanchin entsandi pake'meela: ¿Saaduma lekanu malunuba dilulanu ura' mandirenuu juñanga? tila.

¹¹ Tsenñu Jesús tsandimi: ¿Tsandenna ñuichi ma uveja, saaduma lekanu malunun tsaa tujuusha ma lupajtyaiñu, jaiba mangalaajin jetyu dejuu? ¹² ¡Tsaju' chachee kayu uvejanuba pulla baleve! Tsa' mitya naa saaduma lekanu maluñu bain, chachilla' mitya uraa kenuushu juntsaa tsanguiñu urave, timi.

¹³ Tsejtu Jesús juntsa rukunu: Ñu' tyaapa usakide, tiñu, uskitu kama tyaapa naajuñuba juntsai ura' malami. ¹⁴ Tsenñu fariseo chachilla junu demalu' miitu, Jesúsnu tyee kitaa tu'kaakeechunga ti' paviikila.

Jesúsya Dioschi tiba kiikemu

¹⁵ Tsenñu fariseo chachilla tsandindetsuñuba Jesús mijá' junu malu' miñu, chachilla pure' surekila. Tsa deiñu, Jesús naaju dilulanuba millangue ura' mandire mandirekemi. ¹⁶ Tsejtu ya mu ju' tyee kiike' bain cha' kejtsapala tsaa

kuinda kityudei ti' papatimi. ¹⁷Tsaaren entsaa puimiya Diosa' myta pamu ruku Isaías naatimuwañauba tsaa puinaa tsaimi, entsandimuwaña:

18 Enu entsanave inchi taawasha kemu ruku;
yanaa mi'ke' kayu;
yaa in estyanu chachive;
ya' mytyan tsamantsa sundyamu juyu.
Iya yanu in Espíritu kuwanu tsuyu,
tsenmala nukaba inchi tyee urañauba juntsa mijakares nenu tsuve.

19 Vinbas nen jutyuve,
ne ui'sai neneinu bain jutyuve,
naa muba miñutala ya' palaa meren dejutyuve.

20 Ñañi juuñuu dedyavilla' tsuraañuu chachillanu kayu
dedyavivilikenjungue' tsuunu jutyuve;
tsenmin ñillu manbenundiyandu ñivijcha jayun e'laakentsumu juuñuu
chachillanu bain tsaa manberekiñuu ken jutyuve,
chachiitala nukaba veta' veta' ura' iinuu tene kikara' pullaindyuya.

21 Tsenmala nuka chulla bain yachi tene ura' inu pensangue',
yanun keradinu detsuve,^x ti' pillave.

Jesúsnu, dyabulu uñee tsanguikaantsuve, tila.

(Marcos 3.20-30; Lucas 11.14-23; 12.10)

22 Ma ruku dyabulu puu ju', katatyumin, papatyumin jumunu Jesús'
junga tajila. Tsenñu Jesús ura' mandiretu pamu tire', naa katanchi bain
katamu tiremi. ²³Tsanguíñu chachilla mika keenbashindu, ¿Entsa rukaa
rei Davidnu sera' jamu Na ju', engu Jainu juushu juntsañanga? tiitila.

24 Tsandindetsuñu, fariseo chachilla demeenatu tsandila: Entsa rukunu
dyabulu uñi Beelzebú tsanguikaañaa dyabulu me-e'laalaakive, tiitila.

25 Tsenñu Jesús fariseola ti pensaa kendetsuña mi' myta entsandimi:
Ma reichi uuden juu chumu chachiatalaren kundaa juja'tee ne chudenashu
juntsaa, millainu detsuve; tsenmala ma pebulu juju' bain, naa ma yaa
chundala juju' bain, kundaa juu ne chudenamiya, entsa chachilla tiba
deela' dechutyu' tsanan dejutyuve. ²⁶Tsa' myta naa Satanásnu laapu'
pañu bain, yaatalaren majuka'laantsushu juntsaa, ya maalin ne devela'
jiintsu' myta, ¿naa ketaa ya' chachillanu uudenguen chu' jintsunu
junun jun? ²⁷Nullaya inu Beelzebúa dyabulu majuka'laakaantsuve,
tiidetive. Tsaaba juñuya, ¿nullanu bendaan nemulanuya maa dyabulu
majuka'laanuu tiremutun? Entsaañu' mytaya naa ñulla tujla deeñuba yalaren
entsangue keewaandetsuve. ²⁸Tsaaren iya Diosa' Espíritu chee dyabulu
majuka'laamushu juntsaa, Diosnu rei juu tananu malu yumaa jave ti'
keewara jutaa tsaanu tsuve.

²⁹ ¿Naa ketaa dee ruku' chunu yanu main vi' yachi tiba taangenuu jun, juntsa rukunu ajke' tele' tsuutyumujchiba? Tele' tsuutaa tiba taangenuu juve.

³⁰ Mun iba bulu jutyushu juntsaya inu kundaa juve, tsenmin mun iba bulu Diosa' mitya te'kakeñuu kityushu juntsaa, ne seetyatyu kiñungentsuve.

³¹ Tsa' mityandiyu Diosya munuba naa yala' ujcha' mitya bain, naa kentsure' pañu' mitya bain ujcha demanbitsaanu tsuve; tsaaren mun Espíritu Santonun kentsure' pashu juntsaa, Dios juntsan mityaya ujcha manbitsalen jutyuve. ³² Tsenmin mun Chachi Tiya' Nakayamunu firu' pati' bain, juntsa ujcha' mityaya Dioschi manbitsalanuu juve; tsaaren mun Espíritu Santonu firu' pati' bain, juntsa ujcha' mityaya Dioschi manbitsalanuu jutyuve, naa entsa tusha chunu uwanu bain, naa bene jainu juushu juntsa tinbunu bain.

³³ Ura chiya puka bain ura imuve; tsaaren chi urajtushu juntsaa puka bain urajtu imuve, tsaju' naaju chinu bain ya' pukanu keekitun ne mijakeyaimuve. Tsa' mitya inu bain cheeba juñu kere' mijan tsайди. ³⁴ ¡Nulla, piñi juuñuu chachilla! ¿Nullaren urajtu chachi deeba, naa titaa uraa panu deeyu tenguen? Matyu ñulla' tenbukasha tyuwanamu pensaa fi'pakisha lamu palaa juve. ³⁵ Ura' chachiya tiba uraa tene pamuve, yanu ura' pensaa puñu' mitya. Tsenmala firu' chachiya tiba urajtu juu tene pamuve, yanu firu' pensaa puñu' mitya. ³⁶ Tsaaren uwaindiyu kavitu dekenu malunuya mu bain pensangi'mujchi naati na'baasa pan chumu deju'ba juntsan mitya tsa tsai kavitu inu detsuve. ³⁷ Matyu ñu' pañu palaa' mityan kavitu i' kuipa viina' bain, naa kuipa vin jutyuu ju' bain tsainu tsuve, timi.

Diosyaa tsanguekaantsuve tyainuu ke' keewaaka, tila.

(Marcos 8.11-12; Lucas 11.29-32)

³⁸ Tsenñu mantsala Moisés' wandya lei mashturula bain, naa fariseo chachilla bain Jesúsnu tsandila: Mashturu, lalanu uwain ñunu Diosyaa tsanguekaantsuve tyainuu jumu ke' keewaaka, tila.

³⁹ Tsenñu Jesús tsandimi: ¡Firu' chachilla, Diosnu keenguindandaa chachilla! ¿Diosyaa tsanguekaantsuve tyainuu jumu ke' keewara main ke' keewaaka tikeechunga? Ne jungajte tsaa ke' keewaranu jutyuve, Diosa' mitya pamu ruku Jonás naa-imuwaañuba yanu ke' keewararen mikave. ⁴⁰ Matyu Jonás naa-inga aa alla ajkasha pen malu, pen kepe pumuwaasu, Chachi Tiya' Nakayamu bain tu tainsha pen malu, pen kepe punu tsuve.^y ⁴¹ Nínive' chullaya kavitu dekenu malunu mangujpa' challa chumu chachillanu kavitu ke' kuipa punu detsuve, matyu yalaya Jonás ti kuindaa kiiñuba meelaren veta' pensa demangue' Diosnu meenguemuwa de' mitya. Tsenmin challa enu main pumiya Jonásnu kayu pulla balee puve. ⁴² Tsenmin naa Sursha chumu reina milla bain kavitu dekenu malunu mangujpa' challa chumu chachillanu kavitu ke' kuipa punu tsuve, yaa tsamantsa baasha chumuren ja!, rei Salomón'

tsamantsa aseetaju' keewara kuinda meenu jamuwa' myta. Tsaaren challa enu pumiya Salomón' chunu tinbunu i'nu jumu kayu aawa puve.

Bu'chulla chachinu malu' miitun mavimu

(Lucas 11.24-26)

⁴³Dioschi urajtu kuraa tiremu bu'chulla ma rukunu malu' mii tu ejke tenatala lekanu mi'kes nenduren, katatyu' nuka leka chun tsandyamin

⁴⁴pensanguetu: "In mala' maanu yanuren miinu tsuyu", tyamuve. Tsa-i' ya' malu' miinu chachi' junga mijinmala muba dechutyu, nara mangasha ya juuñuu ju', de-uuna mangatajimuve. ⁴⁵Tsejtu malu' miji' mandishpai bu'chulla kayu yanu pulla firu' jumulanu tene manga' maja', juntsa rukunu tsaa millai devinmalaya, kaspele naajuwa ju'ba juntsanu pullai firu' tiyanu tsuve. Matyu juntsaaya i' puinu tsuve challa chumu firu' chachillanu bain, timi.

Jesúschi ura ya' bulula

(Marcos 3.31-35; Lucas 8.19-21)

⁴⁶Jesús tsandi' chachillanu kayu pantsuren, ya' ama bain, ya' naatalala bain jila, yaba kuinda kenu tyatu. Tsejtun juushaa vityu' avindala uidediñu, ⁴⁷main Jesúsnu tsandimi: Ñu' ama bain, ñu' naatalala bain ñuba kuinda kenu tyatu avindala de-uinave, timi.

⁴⁸Tsenñu yanu tsandi' wainmu rukunu Jesús tsandimi: ¿Maa in aman? tsenmin ¿naajulaa in naatalala dejun? timi. ⁴⁹Tsanditu tyaaa usake!, ya' disipululanu keewaatu tsandimi: Entsalaa in ama deeve, entsalaa in naatalala deeve. ⁵⁰Matyu naajulaa selusha chumu in Apa naakesa tyañuba tsanguen dechu'ba juntsalaa in naatalala deeve, tsenmin in ama deeve, timi.

Ñi waakemu ruku

(Marcos 4.1-9; Lucas 8.4-8)

13

¹Jesús juntsa malunun yasha fale' ji', Galilea aa pusu pi keesha ji' chuimi kuinda mijakaanu. ²Tsenñu chachilla pure' wakudediñu, Jesús ma baakunu lu' chudimi, tsenmala chachillaya pi keesha tsanalaa. ³Tsenñu Jesús, chachilla tyee ken chumu deeñuba tsaatala tene laapu' pa' kuinda ketu, titalaba pure' patimi.

Tsejtu entsandimi: Ma ruku ñi waakenu fale' jimi. ⁴Tsai' waakiñu mantsa ñiya miñutala depaijñu, pishku ji' tsaa defidekive. ⁵Tsenmala mantsa ñiya tu aa tsutyu shupu' tsundala pajila, tsejtu tu aa bebe' tsutyuñu' myta jeke shu'kila, ⁶tsenñuren pajta fale' de-ejbiyu' kakaakenmalan, telele aa erajtu de' myta tsaa de-ejkeila. ⁷Tsenmala mantsa ñiya puchi chundalaaj pajmi, tsenñu puchi de-awalan juntsa kiyalanu depijtek' ura' awakaatyula. ⁸Tsaaren manbaateya ura tunu pajmi, tsejtu mikä ura' imi. Ma kuyamee 30 ñi kuwake, 60 ñi kuwake,

naa 100 ñi kuwakena' bain tsa tsaila. ⁹¡Tsa' mitya mun pungui pu'ba ura' meedi' aseetanguidei!

Nenñaa Jesús laapu' kuinda tene mijakaamuñuba
(Marcos 4.10-12; Lucas 8.9-10)

¹⁰Tsenñu ya' disipulula Jesús' keesha dejitu: ¿Nenñaa yalanu chachilla tyee kiiken chumu deeñuba juntsaanu tene laapu' papatitundiyu? ti' pake'meela.

¹¹Tsenñu Jesús pakatu: Diosnu rei juu tananu deeñu, tyee ju' pantsunañuu juñu bain ñullanuya dekeewaakive, tsaaren yalanuya tsanguindyuve.

¹²Matyu tsaanu aseetanguemunya Dios kayu aseetanguikaanu tsuve, tsenmala kayu ura' aseetanguenu tsuve; tsaaren aseetanguityunuya naa jayun aseeta juuñu bain, aseetanguen jutyungue shuikenu tsuve. ¹³Tsa' mityaa yalanu chachilla tyee kiiken chumu deeñuba juntsaanu tene laapu' papatiyu; matyu yalaya naa kere'ba katatyu deju, naa meena'ba meetyu deju, tsenmin naa aseetanguibainguityu deeñu' mitya. ¹⁴Yala tsadeenmalaa Diosa' mitya pamu Isaías naatimuwañañuba tsaa puindu ive. Ya entsandimuwaave:

*Naa mika mere'ba, aseetanguí'nu detsuve,
 naa mika kere'ba, keengai'nu detsuve.*

¹⁵Matyu entsa chachillaya yala' pensasha tiba pukaakandyatyu tiya deive, yala' pungui dellukike',
naa kapuka bain chayijtu judeeve,
tsenmee katan jutyu,
meen jutyu,
naa aseetanguibainguen jutyu,
tsenmin inu keenguityu',
inchi livee-ibain in jutyu,^z timuwaave.

¹⁶Tsaaren ñullaya Dioschi ura' imu deeve, ñullaya katanu kapukaa depu', naa pungui bain meemu juuyaa depu' mitya. ¹⁷Uwaindiyu pure' chachilla, Diosa' mitya pamu rukula bain, Dios naakesa tyañuba tsanguemu chachilla bain mika katanu tyaturen katatyuwa deeve ñulla' kataakindetsushu juntsa; tsenmin naamika mera' kera tyá'ba, meetyuwa deeve ñulla merekendetsushu juntsa, timi.

Ñi walantu laapu' patu tyee mijakarañu bain
(Marcos 4.13-20; Lucas 8.11-15)

¹⁸Meedidei, ñi waakemu chachinu laapu' patyeeshu juntsa kuinda, naati! tsandi'ba wainnu tsuyu: ¹⁹Mantsa chachilla Diosnu rei juu tananu kuinda meeturen aseetanguityu jumiya, miñutala ñi pajmu juuñu deeve. Tsenñu Dyabulu jamin, tenbukasha juntsa ñi wajkañuu kuindanu demanbashwaakemu juve. ²⁰Tsenmala shupu' tsundala pajmu ñiya entsaaya juve: Diosa' kuinda meemin jeke sunden meenguemulaa juntsañu deeve, ²¹tsejturen chi ju'ba telele

aa erajtu juuñu de' myta, naa-uwanu Diosa' palaa' myta taaju de-i' bain, tsa jutyu'ba, naa-uwanu firu' kenu benda dekiñu wapanai' bain, mangueenguityui tiyamula deeve. ²²Tsenmala kaa puchi chundala ñi pajmuya, entsaaya juve: Diosa' kuinda ura' meeturen, entsa tusha tiba kiiken chunutala tene aa pensaa deju', tiba balen juu detadinu tyanu pensachi anbutikayaiñuu i', Dioschi ura' kuindanuya aawakaatyu' puka iwañañunguityu', ne manbashiimulaa juntsaañu deeve. ²³Tsaaren ura tunu ñi pajmuya, entsaaya juve: Diosa' kuinda mere' aseetanguemulaa juntsala deeve. Tsangue' puka iiñungue' ma kuyamee 30 ñi kuwake, 60 ñi kuwake, naa 100 ñi kuwakena' bain tsanguemulaa juntsaañu deeve.

Trigu wajkatalan firu' ishtape awañu laapu' pañu kuinda

²⁴Jesús manen laapu' pa' chachillanu kuinda mantu tsandimi: Diosnu rei juu tananu juñu pensangiñuya, ma ruku ya' vijpaasha ura kiya wajkikiñuuve. ²⁵Tsanguiñun manguepe muba dekasu'tsudena, yanu kundaa tyamu ruku jatu, trigu wajkatala firu' ishtape tene demawajkike' mijiimi. ²⁶Tsenñu bene trigu kiya awa' ya' ñi defalenmala, naa firu' ishtape bain tsaren awala. ²⁷Tsenñu juntsa rukuchi manda-i' taawasha kemu chachilla dekata' jitu yanu tsandila: Ruku, juntsa vijpaasha ñu ura kiya tene dewajsuba, ¿naa itaa firu' ishtape bain awatu de-in? tila. ²⁸Tsenñu vijtya miya ruku tsandimi: Mulaa inu kundaa tyamulaa tsa dekiñuve, timi. Tsenñu yachi taawasha kemu rukula tsandila: Tsaaya, ¿juntsa firu' ishtape muyi' dekepuisa tenguen? tila. ²⁹Tsenñuren vijtya miya ruku tsandimi: Tsa jutyuve, muityuñaa urave, tsandenna firu' ishtape muyindun naa trigu kiya bain muinaave. ³⁰Matyu tsangaadei: kayu trigu kanu ura jaindyuya bulu de-awasa. Trigu kanu ura tiyanmalaa, trigu kamu rukula jatu urajtu kiyalanaa ajke' dete'ka', tyundyu deke' ju'kenu tsuunu detsuve, tsejtu benee trigu deka' inchi uukaanu tsurensha punu detsuve, timi.

Jesús mustasa ñinu laapu' pamí.

(Marcos 4.30-32; Lucas 13.18-19)

³¹Jesús kamain laapu' paa kuinda mantu tsandimi: Diosnu rei juu tananu juñu pensangiñuya, ma ruku ya' vijpaasha mustasa ñi wajkikiñuuve.

³²Entsa ñiya naaju wajnu ñitalaba kayu pulla añañuve; tsaren entsa ñi awashu juntsaa, veeta juusha awaimuatalaya naajulanuba kayu pullai aa chimuve. Tsejtu vee chi tsai aa chinmalaya, pishkula ja' ya' alitala yatape ke' tsutsungaamu deeve, timi.

Jesús pan pujkikaantsuminu laapu' pamí.

(Lucas 13.20-21)

³³Tsejtu kamain laapu' paa kuinda mantu tsandimi: Diosnu rei juu tananu juñu pensangiñuya, ma shinbu pan kendu pen bateya pan

kenu llujpe tana' pujkikaanutsumu pu' yande' depujkikaakeñuuve, timi.

³⁴Jesús, ti bain chachilla tyee ken chumu deeñuba juntsaanu tene laapu' pa' mijakaakaa kemi. Tsa' mitya tinuba laapu' patyumujchiya mijakaatyu jujuumi. ³⁵Tsaaren tsa tsandimiya, Diosa' mitya pamu ruku entsandimuwañañ tsaa puinaa tsaimi:

*Chachilla tyee kemu deeñuba juntsaanu tene laapu' panu tsuyu;
matyu entsa tu dekenu tinbunu wandyajtumin,
chaikama tsaa pantsunañunashu juntsa dewainnu tsuyu,^a
timuwaami.*

Firu' ishtapenu pañu kuinda wandya

³⁶Tsejtu Jesús chachillanu deme-eetu yasha mavimi. Tsenñu ya' disipulula kalen jitu, vijpaasha awamu firu' ishtapenu laapu' patu naati' tsandiñuba mijanu pake'meela. ³⁷Tsenñu Jesús tsandimi: Vijpaasha ura kiya wajkemu rukuya, Chachi Tiya! Nakayamaa juntsave. ³⁸Tsenmala vijpalaya chachilla' chunu tu juuñuuve. Ura kiya jumulaya, Diosnu yala' rei juu tanamula deeve, tsenmala firu' ishtapeya Dyabuluchi manda-imu chachilla deeve. ³⁹Vijpaasha firu' kiya wajkemu kundaa tyamu rukuya Dyabulaa juntsave. Tsenmala puka denandiñu te'kanu maluya depinu tinbu jumaa juntsave. Tsenmin puka denandiñu te'kamulaya anjeelaa juntsa deeve. ⁴⁰Tsaju' naa-inga firu' ishtapeya dewa'kara' jupeishu, depinu malunu bain tsaren inu detsuve Dyabuluchi manda-imu chachillaya. ⁴¹Chachi Tiya! Nakayamu ya' anjeelanu eenu tsuve, tsejtaa Dios rei ju' chuinha, naajulaa veelanu ujcha kikaren depuñu bain, naa firu' kemu chachillanu bain devela' kalaanu. ⁴²Tsangue' juntsa chachillanu ñi unsurunanu urnusha dekepunmalaya, deware' naa tejkuba depakaakentsunu dejuve. ⁴³Tsenmala Dios naakesa tyañuba tsanguen chumulaya, yala' Apa Dios rei ju' chuinha pajta keraa pi'kelaa chunanu detsuve. ¡Tsa' mitya mun pungui pu'ba meedi' aseetanguidei!

Jesús tusha mennamu lushinu laapu' pamí.

⁴⁴Jesús tsandimi: Diosnu rei juu tananu juñu pensangiñuya, tusha mennamu lushi juuñuuve. Ma ruku tusha mennamu lushi kata' kalaaturen, manen juntsa tunuren manbantsure' sunden miji', ti ta' bain de-atike', juntsa lushi mennanu tu ati'kakeñuuve.

Bale perla vi pukanu laapu' pamí.

⁴⁵Tsenmin Diosnu rei juu tananu juñu pensangiñuya, main tiba ati'kas ne' ma-atin chuchunamu ruku, kayu bale perla vi puka mi'kes nemu juuñuuve.

⁴⁶Tsejtu bene katamiya, miji' ti ta'ba de-atike' juntsa perla vi puka ati'kakeñuuve.

Waakunu laapu' pamī.

⁴⁷Tsenmin Diosnu rei juu tananu juñu pensanguiñuya, ma waaku pisha tyā'ke' ti alla'baasa kakeñuu juuve. ⁴⁸Tsangue' alla ma pure' tela deiñu, ainguemula tsalasha dejul'i, chudi' dete'lare' ura allaya pishkalinu depu', urajtu allaya demanguepumu deesu, juntsaañuuve. ⁴⁹Tsa' mitya depinu malunu bain entsaanu tsuve: anjeela defale' ja' Dios naakesa tyañuba tsanguen chumu chachillanu, firu' chachillaba veekanu detsuve. ⁵⁰Tsanguetu juntsa firu' chachillanu ñi unsurunananu urnusha dekepunmalaya deware', naa tejkuba depakaa kentsunu dejuve, timi.

⁵¹Tsejtu Jesús tsandimi: ¿Kumuinchí iya patyeeshu juntsa de-aseetanguiyu? timi. Tsenñu ya' disipulula pakatu: Uwain de-aseetanguiyu, tila.

⁵²Tsenmin Jesús entsa bain tsandimi: Diosnu rei juu tananu juñu naajuñuba, Moisés' wandya lei mashturu entsai dekeemijashu juntsaya, ma ruku ya' yanu, yachi tiba balee uukaañu pumulanu ti juu bain kasa mangalare, yumaa jumu mangalaakiñuu juuve, timi.

Nazaret pebulunu chumula Jesúsnu meengui'la.

(Marcos 6.1-6; Lucas 4.16-30)

⁵³Jesús tsandi' laapu' paa kuinda juu tene ke' dyatu, junu malu' miimi.

⁵⁴Tsai' ya' tusha miji', jundala cha' waku wakudinu yatala ji' chachillanu mijakaakaa keñu, mika keenbashindu tsa tsandila: ¿Entsa ruku naa-itaa tsamantsai mijatu-in? ¿Naa ketungue tiba tsamantsaa ke' keewara juula bain ma kiikemi? ⁵⁵¿Entsaya, kaapinderu taawasha kemuruku' na jutyuu? ¿María ya' ama jutyuu? ¿Santiago bain, José bain, Simón bain, Judas bain ya' naatalala dejutyuu? ⁵⁶¿Ya' tsujkila dejutyuu laaba endala bulu chudenashu juntsala? ¿Tsaaba, naa-itaa tsai mijatu-in? tiitila.

⁵⁷Tsejtu yaichiya, Jesús tyeeba ju' tyu'lekaamu jun tsaañu' mitya, yanu jaiba kerangui'la. Tsenñu Jesús tsandimi: Diosa' mitya pamula vee mujtu nenduya balenguramu deeve, tsaaren ya' chunu tusha bain, naa ya' chunu yasha bain chumu chachillachiya balenguratyu deeve, timi.

⁵⁸Tsejtu junuya tiba tsamantsaa ke' keewara jumula aa ki'mi, chachilla yanu keenguityu deeñu' mitya.

Juan Mungaamu peñu kuinda

(Marcos 6.14-29; Lucas 9.7-9)

14

¹Tsangues nenu tinbutala Galileasha chumu uñi Herodes, chachilla Jesúsnu laapu' patu naa naadetiñu bain kuinda meemeekemi. ²Tsejtu ya' chachillanu tsandimi: Chachilla patindetsushu juntsa rukuya Juan Mungaamu peyaishu juntsave, mangujpatu. Tsa' mityaa naa tiba tsamantsaa ke' keewara juula bain kenuu juve, timi.

³Entsa Herodesya Juanu peesu kakare' jeru chuwachi teleke' peesu pumuwaami, ya' naatala Filipo' shinbu Herodías' mityaren, ⁴matyu Juan,

Herodesnu entsa entsandimuwañañu: Juntsanu ñu' shinbu juu tanañañu urajtuve, tiitimuwaami.

⁵Tsenñu Herodes Juannu tu'nu tyaturen chachillanu jeetyami, matyu mu bain Juanya Diosa' mitya pamu rukuve tyu tyadeiñu' mitya. ⁶Tsenñuren Herodes' nakayanu malu manchañañu fandangu kendetsuñañu, Herodías' na'ma junu wa'namula' ajuusha beelanguemi. Tsejtu Herodeschi yuj sundyanu' keñu, sundenganchiren ⁷juntsa na'manu ti pa'ñuba Diosnu paka' tsanguenbera kenu tsuyu ti' ma tsandimuwaami. ⁸Tsenñu juntsa na'ma ya' ama Herodías paviñañu, Herodesnu tsandimuwaami: Juan Mungaamu' mishpukaa palatunu puu taja' inu enu kuwaka, timuwaami.

⁹Tsenñu rei Herodes mikä llakindyami, tsejturen tsanguenbera kenu tsuyu ti', tsanguityushu juntasaa yanu Dios taaju puitesa ti' ma pati' mityaa, tsenmin junu pumu chachilla' ajuusharen ma tsandi' mitya, naati pa'ñuba tsanguikaamuwaami. ¹⁰Tsejtu peesusha Juan' mishpuka daakakaanu uudenguemuwaami. ¹¹Tsangue' juntsa mishpuka palatunu puuya detaja', juntsa na'manu kuwañañu, ya' amanu kuwami.

¹²Tsenñu Juan' disipulula deji', ya' ujkun bulu ka' demenjitu, bene Jesúsnu wainjila.

5.000 pullaa chachillanu Jesús panda fikaami.

(Marcos 6.30-44; Lucas 9.10-17; Juan 6.1-15)

¹³Tsaa kuinda mijatu, Jesús baakunu vi' junu lu' jiimi, muba den netyuinsha maali punu. Tsenñun chachilla demijatu, yai bain yala' pebulutala delu' ji' tutu surekila. ¹⁴Tsenñu Jesús ya' jinu baakusha pu' tusha lutu, chachilla tsamantsadena katatu yuj tenbityami. Tsejtu juntsa kejtsapala dilu pumulanuya ura' demandirekemi. ¹⁵Tsenñu yumaa dekependu' kantsuñañu, ya' disipulula Jesús' keesha jitu tsandila: Yumaa ma dekependu' kakentsuve; entsa tenashaa muba den nei'nu tenave. Tsa' mitya chachillanu deme-eenu kide, kaa pebulutalaaba deji' tyeeba ati'ka' finudetsu, tila. ¹⁶Tsa detiñun Jesús entsandimi: Ti' mityaba yala miinu dejutyuve; ñullaa yalanu panda kuwadei, timi.

¹⁷Tsenñu yala pakatu: ¡Enuya lala pan, ka manda ta', allaya pallu tadenayu! tila.

¹⁸Tsenñu Jesús tsandimi: Tsaaya, engu inu taja' kuwakai, timi.

¹⁹Tsejtu chachillanu ishtapetala dechungaakaatu, bene ya' tyaapachi man pan bain, pai alla bain kaketu, kai'sha ke'laadi', Diosnu yuj urave titu, pan dedaaka', ya' disipululanu kuwañañu, yalaa junu pumu chachillanu veela. ²⁰Tsenñu kumuinchí chachilla panda tyubanbera defiñu laramu mande'kakitun, 12 kubi jungue mande'kala. ²¹Panda fimula unbee rukulan juuren 5.000 chachi ma fikeñunguila, naa supulanu bain, naa kaillanu bain mikajturen.

Jesús pi jandala nemi.
(Marcos 6.45-52; Juan 6.16-21)

²²Tsanguemin Jesús ya' disipulula bejkusha ajke' demandyakasa tyatu, baakusha jeke deme-eepu' me-eemi. Tsaindetsuren yaa junu wa'namu chachillanu deme-eren pumi. ²³Jesús tsangue' chachillanu deme-eetu, kuyisha lumi maalindala Diosba kuinda kenu. Tsejtu ya junga maali puren kepemi. ²⁴Tsejtu yaa tsanamala, ya' disipulula' miinu baakuya yumaa aa pusu pi kejtala lui miintsumi, tsejtu ishuwa yalanu masmi' juyikentsuñu' mitya pisundachi banvillasai miintsula. ²⁵Dechanusha kayu dedanguenu jutyunu uwanu Jesús pi jandalaren yala' junga miintsumi. ²⁶Tsenñu ya' disipulula pinu ma neintsu dekata-eetu, wapanan' dejeetya' ui'tu, ¡Ujmu jee! tiitila.

²⁷Tsa detiñu Jesús jeti entsandimi: Puluke pensanguidei; iyaa tsaintsuyu. Jeetyatyudei, timi. ²⁸Tsenñu Pedro pakatu: Bale Ruku, uwain ñutuya, inuba ñu' junga pi jandala mikaka, timi.

²⁹Tsenñu Jesús: Tsaaya jade, timi.

Tsandiñu Pedro baakunu pajtya' pi jandala Jesús' junga jintsumi. ³⁰Tsaaren ishuwa daran juyintsuñuba mijaimiren jeetyaimi, tsenmin tsaa chukanu kikentsumin entsandi wapan pamii: ¡Bale Ruku, inu la'kaka! timi.

³¹Tsandinmalan Jesús, Pedro' tyaapanu jeke kami, tsejtu tsandimi: ¡Ura' keranguityu unbere! ¿Nenñaa uwain tsaañanga tyatu iyu? timi. ³²Tsejtu yala baakusha demavinmalaren ishuwa mandyaimi. ³³Tsenñu baakusha pumula Jesús' ajuusha teledenajil, aawa kure' keewaatu tsandila: Uwain ñuya Diosa! Nave, tila.

Genesaretsha dilu chumulanu Jesús ura' mandiremi.
(Marcos 6.53-56)

³⁴Tsejtu juntsa aa pusunu detyaka' Genesaret tusha jila. ³⁵Tsenñu junu chumu chachilla naa Jesúsñuba dekeengala, tsejtu nuka tenasha bain juntsa kuinda demijatu, naaju dilulanu bain Jesús' junga taji tajiila. ³⁶Tsejtu jayuya ka naa jai kapanuuñuba ta'kakutide ti' u'ta u'tandila. Tsanditu naajula bain ta'kamulaya ura' mandiya mandiyaila.

Tyee chachillanu Dioschi urajtu tiremuñu bain
(Marcos 7.1-23)

15 ¹Mantsa fariseo chachilla, Moisés' wandya lei mashturulaba Jerusalénsha pu' jamula Jesús' junga kalen jitu, tsandila: ²¿Nejtaa ñu' disipululaya lala' tinbu rukula naaken chumuwa deeñuba tsangues jinu deeshuba tsanguityu den? Matyu panda finundiyanu tsanguenu juñu, tyaapa manbitsaanuu junuren, tsanguibangui'mujchi panda fifidekive, tila.

³Tsa detiñu Jesús tsandimi: ¿Nenñaa ñui bain, tinbunu chumu ñulla' aa-apala naaken chumuwa deeñuba juntsanu keetadinchiren Dios naa

naakidei tiñuba tsanguityu juju deeyu? ⁴Diosya entsandive: *Ñu' apanu bain, ñu' amanu bain balengure' ura' keewaade;*^b tsenmin, *Mun ñu' apanu bain, tsa jutyu'ba, ñu' amanu inchi firu' isa ti' bain utanbera isa,*^c tive. ⁵Tsaanuren ñullaya, naa mu bain ya' apalanu entsandinuu juve timu deeve: Naake! ñullanu tiiñuba kuwa' ura' kemishtin tsaayu, matyu kumuinchi iya ti ta' bain tsaa Diosnu tene dekuwakiyu, tinuu juve, timu deeve. ⁶Tsa' myita mun tsanguendyai'shu juntsaa ya' apalanu tyeeba kuwa' ura' kivetekenuu jutyuve, timu deeve. Tsandimu de' myitaan tinbunu chumu ñulla' aa-apala naaken chumuwa deeñuba juntsanu keetadinchiren ñulla Diosa' uudennu kuindajtu tiredekive. ⁷¡Tsa jutyuren tsaañungue keewaamu chachilla! Mikan ura' pamuwaañuve Diosa' myita pamu ruku Isaías ñullanu laapu' pa' entsanditu:

⁸ *Entsa chachilla yala' fi'pakichiya inu balengurendu bain, yala' tenbukashaya inu pensaba jutyularen tsa tsa dekive.*

⁹ *Tsenmin tsangui'ñuba uraanun inu aawa kure' keewaawaadekive, matyu yala' mijakaraya chachilla naa naakidei tiñuba juntsanun ne mijakaakendetsu' myita,*^d *ti' pillave.*

¹⁰Tsejtu bene Jesús chachillanu demikaketu tsandimi: Entsanu meedi' aseetanguidei. ¹¹Tyee fi'pa' juusha vi-i' bain ti' myityaba chachillanu Dioschi urajtu tiretyuve, tsaaren tyee fi'pa' juusha la-i' bain, juntsaya Dioschi urajtu tiremuve, timi.

¹²Tsenñu ya' disipulula Jesús' junga kalen jitu entsandi pake'meela: ¿Ñu tsandiñu, fariseo chachilla kentsura' mikä de-ajaatyañuba mijayu? tila.

¹³Tsa detiñu Jesús tsandimi: Selusha chumu in Apa wajki'ñu kiya jumulaya tsaa teleleba muyainu detsuve. ¹⁴Paviikityudei, yai bain kapuka putyu juuñuuren, kapuka putyulanu miya' neneimu chachi juuñu deeve. Tsa' myita kapuka putyuutalan tsai' miya' nendetsushu juntsaa, ti tujuubillaaba buluren lupajnu detsuve, timi.

¹⁵Tsenñu Jesúsnu Pedro tsandimi: Fariseolanu naati pa' tsandi'ba lalanu aseetanguikaaka, timi.

¹⁶Tsandiñu Jesús pakatu: ¿Tsaaya, ñui bain naa chaikamaba aseetanguenu dejutyuu? ¹⁷¿Jaiba aseeta ityuu, fi'pakisha ti vi-i' bain, ajkasha ji', bene mangueviimüñu bain? ¹⁸Tsaaren fi'pakisha, matyu cha' pensasha tyee fale'ba, juntsaya chachillanu Dioschi urajtu tiremuve, ¹⁹matyu cha' tenbukashaa firu' pensa faamuve, naa cha' tutekenu pensa bain, naa vee matsainu pensa bain, naa na'baasa yuj tsa tsainu pensa bain, naa taanguenu pensa bain, naa anbukuinda kenu pensa bain, tsenmin naa kentsure' panu pensa bain faamuve. ²⁰Tsa' myita entsa judeeshu juntsalaa chachillanu Dioschi urajtu tiremu deeve; tsaaren ne tsa tsanguenu juñun tsanguityu', chachilla tyaapa manbitsalei'mujchi panda fitaa, Dioschi urajtu tiyatyu deeve.

Judío jutyu shinbu Jesúsnu keenguemí.

(Marcos 7.24-30)

²¹ Jesúsnu junu malu' miji', Tiro pebulu bain, naa Sidón pebulu bain chunu tusha jimi. ²² Tsenñu main Canaán cha' shinbu jundala chumu ui'sai jindu tsandimi yanu: Bale Ruku, rei Davidnu sera' jamu Na, inu tenbityaka; in na'ma dyabulu ma puutu mika taaju ken chuve, timi.

²³ Tsandintsuren Jesúsnu tiba pakai'ñu, ya' disipulula yanu kallen ji' entsandila: Lala' benesha ma ui'nbashii jantsuve; tsa' mytya, tyee mutyañu bain tsangue' me-eede, tila.

²⁴ Tsenñu Jesúsnu tsandimi: Israel chachilla uveja juuñuu tupiaya neindetsushu juntsala' mytyaa inu Dios eeve, timi.

²⁵ Tsandiñuren juntsa shinbu ya' ajuusha telenajitu: ¡Bale Ruku, inu kive'ka! timi.

²⁶ Tsenñu Jesúsnu laapu' patu tsandimi: Judío chachi jutyulanuya naake' ajke' la'kan tsaayu. Ñunu ajke' la'kashu juntsaa, kaillanu pan chi'ke' kuchalanu juntsa pan kuwakiñuuve, timi. ²⁷ Tsenñu juntsa shinbu pakatu: Uwain tsaave, Bale Ruku, tsaaren naa kuchala bain ya' miyan ruku panda findu chipasha ya' llujpe pajteñu, yai bain fimu deeve, timi.

²⁸ Tsandiñuren Jesúsnu tsandimi: Shinbu, tsamantsa uwain tsaave tyá' keenguemüñuve. Tsa' mytya ñu tyee mutyañuba tsainu tsuve, timi. Tsenñu Jesúsnu tsandinmalan ya' na'ma juntsa uranu ura' mandiyami.

Dilu purenamulanu Jesúsnu ura' mandiremi.

²⁹ Jesúsnu junu malu' miji', Galilea aa pusu keesha jitú, bene kuyisha lu' chudimi. ³⁰ Tsenñu ya' puinsha chachi pure' wakudila. Tsejtu mantsa ura' nenu jutyulanu take'kerake, kapuka putyuulanu take'kerake, titalaba yujkaalanu take'kerake, papatyulanu take'kerake, kayu naa tichiba diluulanu bain pure' takike' Jesúsnu ajuusha detsuuñu, ura' demandiremi.

³¹ Tsenñu naa papatyula bain demanba'kera, naa titalaba yujkaala bain ura' mandiya'kera, naa ura' netyula bain ura' dene'kera, naa kapuka putyuula bain katandetsu keekeenatu, junu pumu chachilla yuj keenbashintsula. Tsejtu Israel chachilla' keengueno Diosnu tsamantsa urave ti' papatila.

Jesúsnu, 4.000 chachi ma pullaalanu panda fikaami.

(Marcos 8.1-10)

³² Jesúsnu ya' disipululanu mikatu tsandimi: Entsa chachillanu yuj tenbitenve, yala enu iba yumaa pen malu depu', tiba fikenuu detanatyuuñu. Tsaju' yalanu panda fikarei'mujchiya yala' yasha me-erendendyuve, tsandenna mindala desmee-i'ba in jutyuulañu, timi.

³³ Tsenñu ya' disipulula Jesúsnu tsandila: ¿Tsaaren engu muba chutyuinshaba nuka panda katataa tsamantsa chachi pure denashuba millangue fikaanbera katanu dejuwa? tila.

³⁴Tsa detiñu Jesús tsandimi: ¿Tsen, ñnulla pan nan detanayu? timi. Tsenñu yala pakatu: Pan mandishpallu ta', kaa alla bain jayu, tila.

³⁵Tsenñu Jesús chachillanu tutala dechukaatu, ³⁶ya' tyAAPachi mandishpai pan ka', alla bain kake', juntsan mitya Diosnu yuj urave titu, dedale', ya' disipululanu kuwañu, yalaa chachillanu veela. ³⁷Tsenñu kumuinchi tyubanbera defiñu, panda llujpe shajaanamu mande'kaketuren, mandishpai pishkali jungue mande'kala. ³⁸Panda fimula, unbee rukulanun mikaaren, 4.000 chachi ma juula, naa supulanu bain, kaillanu bain mikajturen. ³⁹Tsejtu Jesús chachillanu deme-eetu, baakunu mavi!, Magadán tusha miimi.

Diosyaa tsanguekaantsuve tyainuu ke' keewara pa'la.

(Marcos 8.11-13; Lucas 12.54-56)

16 ¹Fariseo chachilla, saduceo chachillaba Jesús' junga dejitu, Jesúsnu tyeeba kikare' kuipa lawaanu tyanchiren, uwain Dioschi mandaju jamutuya, Diosyaa tsanguekaantsuve tyainuu jumu ke' keewara yalanu main ke' keewaaka tita jila.

²Tsa detiñu Jesús tsandimi: Kependu'kainsha selu ungalalanamlaya ñnulla: Mika uukera' malu chanu juve, timu deeve. ³Tsenmin kepenene selu yapijuru tyá ungalalanashu juntsaa, ñullaya: Umaa ura' malu jun jutyuve, tiitimu deeve. Tsa' mitya selu naanañu bain ñnulla juntsanuya nara keemi deeshuba, ¿nejtaa entsa tinbutala tiba i' pulla pulladeishu juntsanuya kera' jaiba aseeta inu ityuu? ⁴Ñulla, firu' chachilla, Diosnu keenguindandaa chachilla! ¿Diosyaa tsanguekaantsuve tyainuu jumu main ke' keewaaka tikeechunga? Ne jungajte tsaa ke' keewaranu jutyuve, Jonás naa-imuwañaña yanu ke' keewararen mikave, timi.

Tsandindu Jesús yalanu shuike' miimi.

Fariseolachi bain, saduceolachi bain chi'kayanu ityudei.

(Marcos 8.14-21)

⁵Disipulula aa pusu bejkusha detyakaturen, pan ma pashi' jideiñu, ⁶Jesús tsandimi: Pashkatyudei fariseola' pan pujkikaantsumi llujpepenu bain, naa saduceola' pan pujkikaantsumi llujpepenu bain, timi.

⁷Tsenñu ya' disipulula yai tene paviikendu: Lala pan detaatyuñu' mityandive, tila.

⁸Tsandindetsuñu Jesús mijatu tsandimi: ¿Nendetiyu ñui tene tsandi' pan taakeetyuñuve til' paviyala? Ñulla ura' keranguityu chachi deeve. ⁹¿Chaikama aseetanguindetyuu? ¿Tsenmin man pan juunuren 5.000 unbee rukulanu ma kuwakesu mandejatyuu? ¿Tsanguiñu laramu llujpe tene mande'katu nan kubi manga'ba tejatyuu? ¹⁰¿Tsenmin mandishpai pan juunuren, 4.000 unbee rukulanu ma kuwakesu juntsanu bain mandejatyuu? ¿Junu bain nan pishkali mande'ka'ba tejatyuu? ¹¹¿Nejtaa ñnulla jaiba aseetanguenu dejutyuyu iya ura pannu laapu' paindyu!, fariseola bain,

saduceola bain tyee mijakaamu deeñuba juntsachee tujle' chi'kayanu ityudei tintsuñuba? timi.

¹²Tsenñaa umaa aseetanguila Jesúsya ura pan pujikaantsumuchee tujle' chi'kayatyudei ti'mujchi, yaa pamiya fariseo chachilla, saduceo chachillaba tyee mijakaamu deeñuba juntsachee tujle' chi'kayatyudei ti' tsandintsuñu bain.

Pedro: Jesúsya Dioschi Mi'ke' Kayamuve, timi.

(Marcos 8.27-30; Lucas 9.18-21)

¹³Jesús, Cesarea Filipo pebulu keetala jitu, ya' disipululanu pake'meetu tsandimi: ¿Chachillaya, Chachi Tiya' Nakayamunu muve, tiidetin? timi.

¹⁴Tsenñu tsandila: Mantsa chachillaya Juan Mungaamu millave tiidetive, tsenmala veelaya Elías millave detinmala, kayu vejanlaya Jeremías millave ti'kerake!, tsandityumee, Diosa' mitya pamu ruku main vera jumuve, tiidetive, tila.

¹⁵Tsenñu Jesús pakatu: Tsen, ¿ñullaa inu muve detiyu? timi.

¹⁶Tsenñu Simón Pedro tsandimi: Ñaa Dioschi Mi'ke' Kayamuve, ñaa naa-uwanuba chumu Diosa' Nave, timi.

¹⁷Tsenñu Jesús tsandimi: Jonás' na, ñu Simón, Dioschi ura' imuve. Ñunu naaju chachillaba tsandi' wandindetyuve, matyu in Apa selusha chumaa ñunu tsaa aseetanguikaave. ¹⁸Tsenñu' mitya i bain ñuya, Pedro, shupukave,^e tintsuyu; tsenmin entsa shupuka jandalaa inu keranguemu bulu chachillanu ya juuñungue ke' chujtinu tsuyu; tsenmala pemula' pupunanu tenasha firu' jumu bain tiba kenu jutyuve yalanu. ¹⁹Dios rei ju' chuinsa llavi iya ñunu kuwanu tsuyu. Ñu entsa tusha telekiñunguishu juntsaya, selusha bain yumaa telaañuu juñaa tsanguenu tsuve; tsenmin ñu entsa tusha malandekiñunguishu juntsaya, selusha yumaa malandaa juñaa tsanguenu tsuve, timi.^f

²⁰Tsejtu Jesús ya' disipululanu naa yaa Dioschi Mi'ke' Kayamu ju'ba, vee chachillanu tsandi' waingaatyumi.

Jesús peyanu ju'ba wainmi.

(Marcos 8.31—9.1; Lucas 9.21-22)

²¹Jesús tsandi' dyatu, juntsa ajkeshaya ya' disipululanu Jerusalénsha jinbera inu juyu ti' kuinda kemi. Tsai' junga jiñu judío bale rukula bain, chachilla' mitya Diosnu kalen jimula' bale rukula bain, Moisés' wandya lei mashturula bain inu pure' taaju iwaakenu dejuve. Tsenmin detu'ñuren, pen malusha mangujtanu tsuyu, timi.

²²Tsenñu Pedro Jesúsnu vee mujtu miya' jiit u entsandi nepami: ¡Bale Ruku, ñunu Dios tsaa ikaatyusa, ñunuya ne tsaa inu jutyuve! timi.

e 16.18 Pedro tishu juntsaya "shupuka" titundive. f 16.19 Kiikanu palaameemee pensangiñuya, ne entsa pillave: *telekiñu dekishu juntsaya, selusha bain tsaren telaiñuinu detsuve; tsenmin ñullaren entsa tusha malandekiñu dekishu juntsaya, selusha bain tsaren malandañuinu dejuve*, timi.

²³Tsenñu Jesús Pedronu kerai shuwatu tsandimi: ¡Inu vela' mijiide, Satanás! inu tsangue' tyu'lekaakiñunguentsuve. Ñuya Dios naake pensangue' keemuñuba juntsanguityu', chachilla naake pensangue' keemu deeñuba juntsangue pensanguemuve, timi.

²⁴Tsejtu Jesús ya' disipululanu tsandimi: Mun in bendaan nenu tenñuba maali balenguutyu', in mitya tutab'a tutainuu juu, tu'vinu kuusa nanakiñungue', in bendaan nenu juve. ²⁵Matyu mun ya' chungamaya maali balengurenu tyashu juntsaa uwain naa-uwanuba tsana chuntsumi katan jutyuve; tsaaren in mityan ya' chungama maali balenguutyushu juntsaa naa-uwanuba tsana chuntsumi katanu tsuve. ²⁶Matyu ¿tyee balenu jun, mu bain entsa tusha tiba detaditun, naa-uwanuba tsana chun jutyuu jushu juntsaa? Tsenmin, ¿tyee paanguitaa chunuu junu jun? ²⁷Matyu Chachi Tiya' Nakayamuya ya' Apa tsaa, rei juuñuu tsamantsaa ju', ya' anjeelaba maanu tsuve, tsejtu main main tyee kiiken chumu deeñuba juntsan mitya tsa tsangue deke' jinu tsuve. ²⁸Uwaindiyu mantsa enu pumula Chachi Tiya' Nakayamu rei juu majantsu katai'mujchiya peyan dejutyuve, timi.

Jesús vera' lai' katawami.

(Marcos 9.2-13; Lucas 9.28-36)^g

17 ¹Mandishmain malu puiñu, Jesús, Pedronu bain, pai naatala jumula Santagonu bain, Juannu bain mikake!, vee mujtu ma aa kuyisha miya' luimi. ²Tsejtu yala keedenaren Jesús vera' tiyanchi iimi. Ya' kajuuya pajta tsangue pi'kenmala, ya' jaliya pajta lu'puñu chakala' ken tsangue' fibaba tene iimi. ³Tsainmalan tinbunu chumu rukula Moisés bain, Elías bain Jesúsba kuinda kendu' katawala. ⁴Tsenñu Pedro tsandimi: Bale Ruku, lala enu yuj ura' pukeñuve; ñuren tsaa mutyañuya enu pen yapaya ke' chujtinu tsuyu, ñuchi main, Moiséschi main, Elíaschi bain main, timi.

⁵Tsejtu Pedro tsandintsun, ma ñivijcha pi'kelaa ji', tsaa yalanu ñivish panbeesha pukiñu, junu palaa meejatu tsandimi: Entsa in estyanu Nave. Ya' mitya yuj sundenve. Yanu meedidei, timi.

⁶Entsandiñu demeetu, ya' disipulula jelanchin yala' kajuru tusha tyullai teedila. ⁷Tsenñu Jesús yalanu kalen ji-i' ta'katu entsandimi: Mangujpaidei, jeetyatyudei, timi.

⁸Tsandiñu demangue-eetu, veelanuya mangatai'mujchi Jesúsnun maali uyuna kataakila.

⁹Tsejtu kuyisha pu' demanbajandu Jesús ya' disipululanu tsandimi: Entsa kataadekishu juntsa, Chachi Tiya' Nakayamu peya' mangujtaintyuya munuba waintyudei, timi.

¹⁰Tsenñu Jesúsnu ya' disipulula entsandi pake'meela: ¿Nenñaa leichi mashturulaya Dioschi Mi'ke' Kayamu jaindyuren, Elíasya ajke' maanu tsuve tiidetin? tila.

¹¹ Tsenñu Jesús tsandimi: Uwain Elíasya ajke' maanu tsuve, tsejtu tyee ura' demannuu juñuba juntsa deechu' demannu tsuve, ¹² tsaaren uwaindiyu, Elíasya yumaa maañuren yanu dekeengatyu', yala naakendya'ba ne kikemuwa deeve. Tsaju' naa Chachi Tiya' Nakayamu bain yala' tyaapanun tsaren taaju ke' puinu tsuve, timi.

¹³ Entsandiñaa umaa ya' disipulula aseetanguila naa Juan Mungaamunaa tsandintsuñuba.

Jesús, dyabulu puu kaananu ura' mandiremi.

(Marcos 9.14-29; Lucas 9.37-43)

¹⁴ Yala kuyisha pu' demanbaja' chachilla' puinsha demiiñu, Jesús' junga ma ruku kalen ji', ya' ajuusha teleditu ¹⁵ entsandimi: Bale ruku, in nanu tenbityade, des-imu nave. Tsejtu mika taaju ken chuve; pure' bijee yaren ñisha vityumiya, pisha pajtya pajtyaive. ¹⁶ Ñu' disipulula' junga taja' keewaañuren, yalaa ura' demandiretyuve, timi.

¹⁷ Tsenñu Jesús tsandimi: ¡Keranguityu chachilla, ñulla firu' chachilla! ¿Naama jina ñuiba tsananujtuwa? ¿Naama jina iya ñullanu puulan chunujtuwa? Juntsa kaananu in junga taadei, timi.

¹⁸ Tsejtu Jesús juntsa dyabulunu nepa' me-e'laanmalan, juntsa kaana jei ura' mandiyami.

¹⁹ Tsenñu ya' disipulula bene yalaren puna', Jesúsnu pake'meetu tsandila: ¿Nejtaa lalaya juntsa dyabulunu me-e'laatyutu deewa? tila.

²⁰ Tsenñu Jesús tsandimi: Ñulla uwain tsaave tya' ura' keenguityu chachi de' mityaa me-e'laanu dejutyuve. Uwaindiyu, ñulla' keengueno pensa mustasa ñi tsantsaa juushu juntsaa, entsa kuyinu: Enu lu' ji', vee mujtu shilla' ji-ii, detiñuba, uwain entsa kuyi shilla' jinu tsuve. Matyu ti bain ñuichi in jutyuuya jun jutyuve, timi. ²¹ ^h

Jesús peyanu ju'ba mawainmi.

(Marcos 9.30-32; Lucas 9.43-45)

²² Tsejtu Jesús ya' disipululaba Galilea tusha wa'natu tsandimi: Chachi Tiya' Nakayamu chachilla' tyaapasha kuwanu tsuve, ²³ tsenmala tu'nu detsuve, tsenñuren pen malusha mangujtanu tsuve, timi.

Entsaa kuinda keñu, ya' disipulula yuj llakindiyala.

h 17.21 Yumaa tinbu jumu kiikatalaya bersikulu 21 pilla bain puve, tsaaren kayu ura' manbiike' kaya kiikalanuya entsa pilla putyuve: *Entsa judeeshu juntsa dyabulula majuka'laanu' jutyu dyabulu deeve, Diosba kuinda kemin, Diosnu pensangue' panda fityuminguendyuya.*

Jesús aa elesha deechu' mitya lushi paanguemi.

²⁴Jesús ya' disipululaba Cafarnaúmsha jiñu, aa eleshachi lushi kamula Pedronu kalen jitu tsandila: ¿Ñu' mashturuya aa eleshachi deechu' mitya kaya lushi paanguityuu? tila.

²⁵Tsa detiñu Pedro, ya' mashturu paanguemuve, tikami. Tsejtu bene Pedro yasha viñu, kayu muba paindetyun Jesúsyä ajke' patu tsandimi: Simón, ¿ñuya naa tiyu? Entsa tusha chumu reila ¿munaa deechu' mitya lushi kamu den? ¿Ya' uudenguen chunu tusha chumu chachillanaa kamu den? ¿Vee mujtu chumu chachilla tyeeba ai'nu jamulanaa kamu den? timi. ²⁶Tsandiñu Pedro pakatu: Vee mujtu chumu chachilla tyeeba ai'nu jamulanaa kamu deeve,ⁱ tikami.

Tsenñu Jesús tsandimi: Tsa' mitya ya' uudenguen chunu tunu chumu chachillaya deechu' mitya paanguityu deeve. ²⁷Tsaaren munuba ura' kindetyuve tikaan jutyu aa pususha ji', venguu puitu, ajke' kayamu allanu ya' fi' juusha manbaki lushi puu katatu, juntsa lushee ka' in mitya bain, ñu' mitya bain taji' paanguide, timi.

¿Maa kayu bale juñanga?

(Marcos 9.33-37; Lucas 9.46-48)

18 ¹Juntsa malutalan ya' disipulula Jesúsnu kalen jitu tsandila:
¿Diosnu yala' rei juu tanamuutala, maa kayu bale rukun? tila.

²Tsenñu Jesús ma kaananu mika', yala' kejtala uikaakitu ³tsandimi: Uwaindiyu ñulla veta' pensa demangue' kailla juuñuu demandi'shu juntsaa, Diosnu yala' rei juu tananu dejutyuve, timi. ⁴Tsa' mitya entsa kaana tsaa, ti baleyu pensaba jutyu jumaa uwain kayu bale chachive Dios rei ju' chuinsha. ⁵Tsenmin mun in mitya entsa kaana juuñuu tiba baleyu pensaba jutyu chachinu mikake' bain inu mikakeñuuve. ⁶Tsenmin inu keranguemu kailla juuñuu chachillanu ujchaaba delawaashu juntsaya, matyu ujcha lawaanuu jumu kayu tsanguindyuren, ili ilikenu aa shupuka kutunu teevi' lamaa aa shasha keviiñaa yachi kayu uraaba junu juve. Matyu uwain juntsangue' ujcha lawaanu chachillaya ili ilikenu aa shupuka kutunu teevi' lamaa aa shasha kevi' pipimulanuba kayu pullake taaju kenu detsuve.

Veelanu ujcha lawaan jutyu

(Marcos 9.42-48; Lucas 17.1-2)

⁷Chachilla' mitya mika pensandenve, naa-uwanuba ujcha lainuu tene katawantsuñu' mitya. Uwain naa-uwanuba tsaanu tsuve. Tsaaren naaju chachillaba veelanu ujcha lawaakenuuya dekityusa, tsanguikaamu tsamantsa taaju i' puinu juñu' mitya.

ⁱ **17.26** Juntsa tinbutala reila deechu' mitya lushi kamiya, vingue' puiñu chachillanaa kamuwaala, tsaaren ya' tunu chumu chachillanaa katyuwaala.

⁸Tsaju' ne ñu' tyaapa' mityaa, tsa jutyu'ba ñu' neepa' mityaa ujcha lashu juntsaa, ñu' bulunu daaka' kepude. Matyu tyaapa bain pallu puu, neepa bain pallu puuya naa-uwanuba manbetyu ñinbaasha kevinu ju'ba, ma tyaapa puu, ma neepa puuya, naa-uwanuba Diosba ura' chuinsa viñu uranu juve. ⁹Tsenmin ñu' kapuka' mityaa ujcha lalaishu juntsaa, ñu' bulunu kala' kepude. Matyu pai kapuka puuya ñi jelekenu kensha kevinu ju'ba, ma kapuka puuya, naa-uwanuba Diosba ura' chuinsa viñu uranu juve, timi.

Jesús uveja piyamunu laapu' pamí.

(Lucas 15.3-7)

¹⁰Tsa' mitya kailla juuñuu chachillanu jayuuba balejtu kuretyudei. Matyu uwaindiyu selushaya entsala' anjeela kai'sha in apa' kajuru naa-uwanuba katantsumu deeve, timi. ¹¹^j ¹²¿Ñuichiya naajun? Tsandenna ma ruku 100 uveja miyanuren, main piyañu, ¿juntsa 99 uvejalanuya kuyisha deshuikike', piyamunu mami'kenu jin jutyun? ¹³Tsejtu uwaindiyu mangata'banguishu juntsaya, juntsa piyamu uveja' mityaa 99 uveja jumulanuba kayu pullai sundyanu juve. ¹⁴Entsaañu' mityaa, selusha chumu ñulla' Apa bain kailla juuñuanlu maliba depiyatyusa tyave.

Veta' veta' ura' mandiyanu

(Lucas 17.3)

¹⁵Ñu' naatala ñunu tyeeba firu' kenmala, yanu mi'ke', yaba maalindala pa', uwain firu' kikeeñuve pensanguikaade. Tsejtu ñu pañu, uwain tsaave tyá' meedishu juntsaa, ñu' naatalanu veta' pensa mangare' ura' mandiretunguive. ¹⁶Tsaaren ñu' naatala ñunu meedindyai'shu juntsaa, matyu main, naa pai chacheeba miya' jide, yala pallu, tsa jutyu'ba pen chachi juuyaa, ñulla naadeti' detse'kaañuba meenamu junudetsu.^k ¹⁷Tsenñuren naa yalanu bain meedityunmalaya, kerangue' waku wakudimu chachillanu kuinda kide; tsenmala naa yalanu bain ma meedityunmalaya, umaa Diosnu keranguityu chachi, tsa jutyu'ba, romano uñichi deechu' mitya lushi kamu ruku juuñungue kurede.

¹⁸Uwaindiyu ñulla entsa tusha telekiñu dekishu juntsaya, selusha bain yumaa telaañuu juñaa tsanguenu detsuve; tsenmin ñulla entsa tusha malandekiñu dekishu juntsaya, selusha yumaa malandañiu juñaa tsanguenu detsuve, timi.^l

¹⁹Tsenmin entsa bain tsandinu tenve: Entsa tusha ñulla palluuñuba tsandi pa'nu ti' ma tsai deshuwa!, in Apanu tyeeba kisa tya' depa'shu juntsaa, selusha kai'sha

j 18.11 Yumaa tinbu jumu kiikatalaya bersikulu 11 pilla bain puve, tsaaren kayu ura' manbiike' kaya kiikalanuya entsa pilla putyuve: *Matyu ma tupiya' nentsaimulanuren mala'kanaa Chachi Tiya' Nakayamu jave.* **k 18.16** Deuteronomio 19.15 **l 18.18** Kiikanu palaameemee pensanguinuya, ne entsa pillave: *telekiñu dekishu juntsaya, selusha bain tsaren telaiñuinu detsuve; tsenmin ñulla entsa tusha malandekiñu dekishu juntsaya, selusha bain tsaren malandañuinu dejuve, timi.*

chumu in Apa tsanguikaanu tsuve. ²⁰Matyu nuka ne pallu juu, ne pema juu, in mityaren wa'dil' depushu juntsaya, i bain yala' kejtsapalaren punu tsuyu, timi.

²¹Tsenñu Pedro Jesús' junga kelen ji' pake'meetu tsandimi: Bale Ruku, in naatala inu firu' kiñu, ¿iya nan bijee yanu juntsan mitya kuipa faawareen jutyutuuwa? ¿Mandishpai bijee tsaanujtuuwa? timi.

²²Tsenñu Jesús tsandimi: Ne mandishpai bijeeren tsanguide tinu jutyuyu, matyu mandishpai bijee tenen 70 bijee tsanguenu juve; ura pañuya, naa-awanuba mi'tyumujchi, timi.

²³Matyu Diosnu rei juu tananu juñu pensanguiñuya, ma rei, ya' keetala mi'namu bale chachilla lushi deneenañu mangakiñuu juuve. ²⁴Tsejtu juntsa rei tsangue' lushi mangantsuñu, ya' ajuusha main tsamantsana neenamunu tajila. ²⁵Tsenñu juntsa ruku tsamantsana neenatu, naake'ba manbaanguenu jutyuñu' mitya, yanu mandanguemu ruku rei, naa ya' shinbunu bain, naa ya' kaillanu bain veelachi manda'il taawasha kemu chachi juu ai'nu tirekemi, tsenmin ya ti tañu bain de-atikenu tiremi, tsangue' neenan mitya manganu. ²⁶Rei tsandiñu, ya' keenu mi'namu bale chachi, rei' ajuusha teledi' u'tanditu tsandimi: Iya te' mangüiñuba inu ajaatyatyuka, tsenmala demanbaanguenu tsuyu, timi. ²⁷Tsenñu rei yanu tenbityatu, neenan mitya mangutuña t'i!, ne me-eekemi.

²⁸Tsangue' me-eeñuren, reinu mi'namu ruku junu malu' miit, main yaba bulu taawasha kemu ruku, yanu lushi jayu neenamunu katami. Tsejtu kutunu kake' ma jadiwaakendu, entsandimi: ¡Inu neenañu lushi manbaanguika! tiitimi. ²⁹Tsenñu yaba bulu taawasha kemu ruku ya' ajuusha teledi' u'tandindu: Inu ajaatyatyuka te' mangüiñuba, tsenmala manbaanguenu tsuyu, timi.

³⁰Tsandiñun juntsa ruku meedity!, tsaa peesu pukenu uudenguem Yanu neenañu lushi demanbaanguinbera. ³¹Tsenñu juntsa ruku tsanguñu, yaba bulu reinu mi'namu bale chachilla uutayai'tu, rei' junga dejí', ya naakiñuba tsandi wainjila. ³²Tsenñu rei juntsa rukunu mikatu tsandimi: ¡Firu' chachí! Ñu u'tandiñaa naamika pure' nelunañu bain, inu mangutuña tiwayu. ³³Tsa' mitya iya ñunu naa-i tenbityañuba, ¿ñu bain ñuba bulu taawasha kemutala tsaanuu jui'taa tsajuu? timi. ³⁴Tsejtu rei tsamantsai ajaatyatu, faaterulanu bandemu chachillanu kuwakemi, yanu kumuinchí neenañu lushi demanguwanbera bandenudetu.

³⁵Jesús tsandi' dyatu tsandimi: Tsa' mitya in Apa selusha chumu bain ñullanu tsarenguen tsuve, ñulla main main ñulla' naatalalanan ura ñulla' tenbukasharen veta' veta' kuipa faawareen jetyu demandi'shu juntsaa, timi.

Mavelanutala Jesús mijakaami.

(Marcos 10.1-12; Lucas 16.18)

19 ¹Jesús tsandi depa' dyatu, Galilea tusha malu' miji' Judea tusha jimi, Jordán pinu pensanguiñuya, masku pasha, pajta faanu pasha. ²Tsenñu pure' chachilla bendaajideiñu, dilulanu ura' demandiremi.

³Tsenñu mantsa fariseola Jesúsnu naati vera' pakakare' kuipa pun tsandyanchin, yanu kalen deji' entsandila: *¿Ti' mityaañuba kuipa puke' ma ruku ya' shinbunu mavelanuu jun? tila.*

⁴Tsenñu Jesús pakatu tsandimi: *¿Nulla Diosa' Kiikanu lengue' kerajdetuu, chachi deke' faawaanu tinbunu Dios kemiya unbee ruku bain, supu bain^m kikemuwañauba?* ⁵Tsanguitu Dios tsandimuwaave: *Tsa' mityaa unbee rukuya ya' apanu bain, ya' amanu bain shuike' ji', ya' shinbuba buudi' chunu tsuve; tsai' yala main juuñuu tiyainu detsuve,*ⁿ timuwaave. ⁶Tsenmee yala pai chachi juuñuu dejutyu', main juunu detsuve. Tsa' mitya Dioschiren tsaa ma buuta' chujtyaabillaya, mu bain maveenu dejutyuve, timi.

⁷Tsenñu fariseola tsandila: *¿Tsaaya, nejtaa unbee rukula, supulanu mavelave tinu kiika piike' kuwashu juntsaya, Moisésya mavelanu dejuve*^o *timuwaatun? tila.* ⁸Tsenñu Jesús tsandimi: Matyu ñulla meedityu, pañu meetyu chachi deeñu' mityaa, Moisésya tsangue' ñulla' shinbulanu mavelanuu kikaamuwaave; tsaaren chachi deke' faawaanu tinbutalaya tsa jutyuwaave. ⁹Tsaaren iya tsandintsuyu: ne ya' shinbu vee matsaiba indyuren ya' ruku mavela' miji', vee shinbuba machushu juntsaa, juntsa rukaa vee matsainu ujcha lantsuve, timi.

¹⁰Tsenñu ya' disipulula tsandila: Tsaaya, unbee rukula supulaba tsaa ne juunuushu juntsaa, supunga' chui'ñaa urave, tila.

¹¹Tsenñu Jesús pakatu: Nulla padetishu juntsa palaanu kumuinchí chachilla tsandyanu dejutyuve, matyu naajulanaa Dios tsandyakañauba juntsalan tsandyainuu judeeve. ¹²Matyu mantsa chachillaya nakayamin supunga' chun jutyuu nakayaimu deeve; tsenmala mantsalaya supunganu deeñu bain, chachiitalaren tyeeba ke' supungan jutyungue tiremu deeve; tsenmala mantsalaya Diosnu ya' rei juu tanan mityaren supungan jutyu tiya' maali dechuve. Tsa' mitya mun tsaa chunuu jutuya tsaa dechusa, timi.

Jesús, kaillanu Dioschi ura' de-ikaami.
(Marcos 10.13-16; Lucas 18.15-17)

¹³Tsandiñu, Jesús' ajuusha mantsa kaillanu tajila, ya' tyaapachi mishunu ta'ka', yala' mitya Diosba kuinda kisa detyatu. Tsenñun ya' disipululaya kaillanu tajimulanu ajaa tila. ¹⁴Tsenñu Jesús tsandimi: Kailla in junga janudetsu daatadityudei, matyu Diosnu yala' rei juu tanamulaya entsa kailla tsaalaa dejuñu' mitya, timi.

¹⁵Tsejtu ya' tyaapachi kailla' mishpukatala deta'ka' Dioschi ura' de-isa ti' dyatu, junu malu' vee mujtu miimi.

Main taruku Jesúsba kuinda kemi.
(Marcos 10.17-31; Lucas 18.18-30)

¹⁶Ma ruku Jesúsnu keejitu tsandimi: Mashturu, ¿tyee uraa kitaa naa-awanuba Diosba ura' chunu juwa? timi.

¹⁷Tsenñu Jesús tsandimi: ¿Nendiyu tyee urañuba juntsaalaa inu pake'meentsumi? Uraya mainren juuve. Tsaaren ñuren naa-awanuba Diosba ura' chunu tenñuya, ya naa naakide tiñuba tsanguen chude, timi.

¹⁸Tsenñu juntsa ruku, ¿Dioschi naaju uudenlaa juntsa den? timi.

Tsandiñu Jesús tsandimi: Chachiitala tu'tyude, vee matsaityude, taanguityude, anbuti' veelanu kuipa punu kityude, ¹⁹ñu' apanu bain, naa ñu' amanu bain balengure' ura' keewaade,^p tsenmin ñu maali naa-i estyamu ju'ba ñuba kalen chumu chachinu bain juntsai estyade,^q timi.

²⁰Tsenñu juntsa nakun ruku pakatu: Kumuinchi juntsa naatiñuba tsanguen chumuyu. ¿Tyee kayu vera kenuu juwa? ti' pake'meemi.

²¹Tsenñu Jesús tsandimi: Ñuren kuipajtu ma narai tindenñuya, ñu ti ta' bain de-atike' purelanu kuwade. Tsanguishu juntsaa kai'sha tiba tsamantsa balee jumula tadinu tsuve. Tsangue' in disipulu tiya' in bendala jade, timi.

²²Tsejtu Jesús tsandiñu meetu, juntsa nakun ruku yuj llakindya' miimi, mika taruku' mitya.

²³Tsenñu Jesús ya' disipululanu tsandimi: Uwaindiyu tarukulachiya Diosnu yala' rei juu tananu mika li'puve. ²⁴Tsenmin manen tsandintsuyu: main tarukuchi Diosnu ya' rei juu tananu mika li'punchiren, ma kameyu ityu kapukanu pullainuuba juñuya, juntsa kameyu kayu ura' ne dapullaichuve, timi.

²⁵Tsenñu ya' disipuluba Jesús tsandiñu demere' mika meenbashtu tsandila: Tsaashu juntsaa, ¿maa livee inuu juchunga? tila.

²⁶Tsenñu Jesús yalanu ke-eetu tsandimi: Chachillaya naake' tiba tsa tsangue kenuu dejutyuñuba, Dioschiya tiba in jutyuuya jutyu!, imu tene judeeve, timi.

²⁷Tsandiñu Pedro tsandimi: Lalaya ti taawa ju' bain millangue deshurike' ñu' benda dejayu. ¿Juntsan mitya laachiya tyee junujtun? timi.

²⁸Tsenñu Jesús tsandimi: Uwaindiyu kumuinchi tiba kasa tene mannu malu janmala, matyu Chachi Tiya' Nakayamu rei juu tsamantsaa ya' chunu chunbullanu chunu tinbunu, ñulla in bendaa jamulaya 12 chunjuu reila' chuchudinu chunjuunu shilii dechu', Israel chachilla 12 sera' jimup aandalanu kavitu kenu detsuve. ²⁹Tsenmin mun in chachi ju' in mityaren ne ya' ya shuikike, naatalalanu shuikike, apalanu shuikike, ya' nalanu shuikike, ne tu taju' bain tsaa juntsa deshuikike' in bendala jamuya, juntsan mitya ti bain 100 bijee yapa mangandene kenu tsuve, tsai' naa-awanuba Diosba ura' chunu tsuve. ³⁰Tsaaren challa pure' chachilla balen chachi judeeshu juntsalaa, bene ne chachi juu mandinu detsuve, tsenmala challa

pure' chachilla ne chachi judeeshu juntsalaa bene balen chachi juu mandinu detsuve, timi.

Jesús, taawasha kemulanu laapu' pamí.

20 ¹Diosnu rei juu tananu juñu pensanguiñuya, uva vijtya miya ruku dishkepenene fale', taawasha kikaanu chachi mi'kes neiñuuve. ²Tsejtu umaa demi'ke' katu, taawasha kemula ma malunu naake kamuwa deerñuba tsangue paanguenu ti' tsai shuwatu, ya' uva vijpaasha taawasha kenu eemi. ³Tsejtu manen kepenene mandishtaapai ura insha mafaatu, buli ati atikinsha veela tiba ki'mujchi ne uidena katatu, ⁴tsandimi: Ñui bain in uva vijpaasha taawasha kiidei. Naake paanguenu juñuba tsangue paanguenu tsuyu, timi. Tsenñu yala taawasha kenu jila. ⁵Tsejtu manen pajta katyu uranu bain, naa kepenusha pen ura insha bain mafaatu tsarenguemí. ⁶Tsenmin naa kepenusha, man ura iinutala mafaatu bain, kayu veela tibangui'mujchi ne uidenañu katatu tsandimi: ¿Nen denayu tibangui'mujchi enu ma malu entsanala? timi. ⁷Tsenñu yala tsandila: Muba lalanu taawasha kikaanu kaindetyuñu' myta denayu, tila. Tsenñu entsandimi: Tsaaya, ñui bain in uva vijpaasha taawasha kiidei, timi.

⁸Tsenñu umaa dekependu' kañu uva vijtya miya ruku taawasha kekaren keenamu rukunu mikatu tsandimi: Taawasha kemulanu mikatu main main paanguide, tsaren bene videishu juntsalanaa ajke' paangue', ajke' vimulanaa bene paanguikide, timi. ⁹Tsejtu kepenusha man ura iinutala taawasha kenu vimula lushi kanu dejinu, main main ma malu' myta taawasha dekiñu paanguen tsanguemi. ¹⁰Tsenñu ajke' taawasha kenu vimula dejitu, yalaa kayu lushi aa kachu deeyu tyaturen, yai bain ma malu taawasha' myta nan kumu deeñuba juntsan kakila. ¹¹Tsenñu ajke' taawasha kenu vimula lushi tsantsa paanguikeñu dekatu, uva vijtya miya rukunu vera' tya' depaviikendu, ¹²tsandila: Entsa bene taawasha kenu videishu juntsa chachillaya ma ura taawasha kidekiñun, tsaren ma paanguikaakive, naa lalaya pajta jelekinguentu ma malu taawasha ma kidekiñu bain, tila. ¹³Tsandindetsuñu uva vijtya miya ruku mainnu tsandimi: Ura' keranu chachi, iyaa ñunu tiba firu' juu kendyuyu. ¿Ma malu taawasha' myta nan kanuu juñuba iya ñuba tsandi paindyuwa? ¹⁴Tsa' myta ñu' lushi ka' miide; iren entsa bene videishu juntsalanu bain ñunu naake paangue'ba tsanguenu tenshu juntsaya juntsaa inchive. ¹⁵¿In lushmanu ti ken denñuba tsanguenu jutyuwa? Tsa jutyu'ba ¿iya veelanu puita urañu yalanu kishtenguee?

¹⁶Tsa' myta challa ne chachi juuñuulaa, bene bale chachi juuñuu mandinu detsuve; tsenmala challa bale chachi juuñuulaa bene ne chachi juuñuu mandinu detsuve, timi.

Jesús peyanu ju'ba mawainmi.
(Marcos 10.32-34; Lucas 18.31-34)

¹⁷Jesús Jerusalén jinu miñusha jindu ya' ¹²disipululanu yai tene mikakitu tsandimi: ¹⁸Nulla mideeve challa Jerusalénsha jikeentsuñu bain. Chachi

Tiya' Nakayamuya junga chachilla' myita Diosnu kalen jim u bale rukula' tyaapasha bain, leichi mashturula' tyaapasha bain kuwanu tsuve, tsenmala yanu kavitu ke' tutainuu kuipa punu detsuve. ¹⁹Tsejtu judío chachi jutyula' tyaapasha dekuwanmala, yala uukapu'kera, debande'kerake', kuusanu tu'pu' tu'nu detsuve, tsenñuren peñu pen malu insha mangujtanu tsuve, timi.

Santiago Juanba Jesúsnu tyeeba pa'la.

(Marcos 10.35-45)

²⁰Zebedeo' shinbu ya' nalaba buluu Jesús' junga kallen ji', ya' ajuusha teledi' tyeeba pa'nu, ²¹Jesús pakatu: ¿Tye mujken? timi.

Tsenñu juntsa shinbu tsandimi: Ñu rei ju' chuinha, ñu' keesha in nalanu mainnu urandyasha chujti', kamainnu jalandyasha chujtikisa tenve, timi.

²²Tsandiñu Jesús tsandimi: Ñulla inu tyee pakendu'ba mijdetuve. ¿Jya wajtun tsamantsa taaju ke' pullainu juuwashu juntsa, ne tyeeba juñu kujchin tsanguenu juñu, ñui bain kushnuu dejuu? timi.

Tsenñu yala pakatu: Tsanguenu dejuyu, tila.

²³Tsenñu Jesús tsandimi: Uwain ñui bain, i tsamantsa taaju ke' puinu juuwashu juntsa i' puinu dejuve, tsaaren urandyasha, ne jalandyasha chudinu pakidekishu juntsanuya iyaa naaken tsaayu; juntsaya in Apachiren yumaa develaañuu juuve yaa munu kuwandy'a'ba tsanguenu juñu' myita, timi.

²⁴Tsenñu vejan paitya disipulula tsandiñu demeetu, entsa pai naatalalanu ajaatyala. ²⁵Tsenñu Jesús demikatu tsandimi: Ñulla mideeve naa judío jutyu bale chachillaya yaichi manda-imu chachillanu naake firu' kendya'ba tsanguen chumu deeñuba, tsenmin judío jutyu aa bale rukulaya, chachillanu menaa tyullaa tanamu deeñu bain ñulla mideeve. ²⁶Tsaaren ñuitala tsaanu dejutyuve. Tsa jutyu' mun ñuitala kayu bale tiyachi tenñuba, vejanlachi taawasha kemu chachee junu tsuve. ²⁷Tsenmala mun ñuitala balen chachi tiyachi tenñu bain, ñuichi taawasha kemu chachi junu tsuve. ²⁸Matyu naa-inga Chachi Tiya' Nakayamu bain entsa tusha jatu, ne yachi tiba ke', yanu dewashkisa tya' jatyumujchi, yaa muchiba tiba uraanuu ke' kuwanaa jashu, tsenmin pure' chachillanu la'kanu yaa tutanu jashu, ñui bain tsaren dejusa tenve, timi.

Jesús pai ruku kapuka putyulanu ura' manmi.

(Marcos 10.46-52; Lucas 18.35-43)

²⁹Yala Jericó pebulunu demalu' miiñu, Jesúsnu chachilla pure' surekila. ³⁰Tsaindetsu pai ruku kapuka putyula miñu kelunu chunatu, Jesús junu puintsuve detiñu demere' uti' patu entsandila: ¡Bale Ruku, rei Davidnu sera' jamu Na, lalanu tenbityaka! tila.

³¹Tsandindetsuñu, chachillaya mandyasa ti' de-aajaatiñun, yala kayu uti', entsa entsandila: ¡Bale Ruku, Davidnu sera' jamu Na, lalanu tenbityaka! tiitila.

³²Tsenñu Jesús uidikatu, yalanu mika' pake'meetu tsandimi: ¿Ñulla' myita tyeenguisa tenguen? timi.

³³Tsandiñu yala pakatu: Bale Ruku, lalanu katamu tiyanu tenve, tila.

³⁴Tsenñu Jesús tenbitya' yala' kapukanu ta'kanmalan, kapuka putyu rukula juntsa uwanun katamu detiya' Jesúsnu bendaajila.

Jesús Jerusalénsha rei juuñuu vijimi.

(*Marcos 11.11; Lucas 19.28-40; Juan 12.12-19*)

21

¹Yumaa Jerusalén pebulu kalen jitu, matyu Ulibu chi chunu kuyi keetala Betfagé kaa pebulubi dejitu, Jesús ya' disipululanu pallu eemi ²entsanditu: Bejku pasha, engu ke-eenashu juntsa kaa pebulusha jidei, tsejtu junu supu buru teetsunanmala, ya' kaana bain ya' kelunu uyuna katanu detsuve, tsejtu langa' engu taadei. ³Tsandenna mulaa depake'meenmalaya: Bale Ruku menesteve, tsaaren wajturen mangunu tsuve, tidei, timi.

⁴Entsaa puimiyá kaspele Diosa' mitya pamu ruku naatimuwañauba tsaa puinaa tsaimi, entsandimuwañaú:

⁵*Jerusalén, tsandityumee Sión tinu pebulunu chumu chachillanu entsandidei:
¡Keekidei enu, ñulla' junga jantsuve ñulla' rei,
ma burunu tiba daj keewarajtu,
llupu kaa burunu chuu jantsuve,
buli pande' ee-eekenu animaa kaana jandala!,^r ti' pillaña' mitya.*

⁶Tsenñu ya' disipulula dejitu, Jesús naakidei tiñuba tsanguila. ⁷Tsejtu supu buru ya' kaanaba deka' taji', yala' jandala jali vikaala. Tsa dekiñu Jesús jandala lu' chumi. ⁸Tsenñu purenamu chachilla, mantsalaya yala' jali miñutala delakare'kera, tsenmala mantsalaya chi ali dedaaka' miñutala tsure'kerakentsula, balengure' keewaatu. ⁹Tsejtu tsamantsa chachilla ya' ajkesha jimula bain, naa benesha jimula bain entsandi' ui'nbashiila:

*¡Rei Davidnu sera' jamu Naya,
yuj sunden jusa!
¡Dioschi ura' imuве,
Bale Ruku' mitya jamuya!^s
¡Kai'sha selusha bain yuj sunden jusa! tiitila.*

¹⁰Tsenñu Jesús Jerusalénbi vijiñu, kumuinchi chachilla jupaijtu, entsa entsandila: ¿Mujtun entsaa? tiitila.

¹¹Tsenñu purenamu chachilla entsa entsandila: Entsayá Diosa' mitya pamu Jesúsve, Galilea tusha Nazaret pebulubi chumu, tiitila.

Jesús aa elesha Dioschi ura' kuraa mandiremi.

(*Marcos 11.15-19; Lucas 19.45-48; Juan 2.13-22*)

¹²Jesús aa elesha chunu veeta juusha vitu, junu ufeenda kuntsumi atin pumu chachillanu bain, naa junu ati'kan pumu chachillanu bain tsaa demajuka'laake', naa lushi maveten chundala bain, naa paluma atin

chundala bain debuityuleekitu ¹³tsandimi: Diosa' Kiikanu entsandive: *In yaa Diosba kuinda kenu ya junu tsuve,*^t tive, tsaanuren ñullaya entsa yanu taamula' vi' pantsudinu tujuu tiredekiñuve, timi.

¹⁴Tsenñu juntsa aa elesha chunu veeta juusha, Jesús' junga naa kapuka putyula bain, naa ura' netyula bain dejíñu, ura' demandiremi. ¹⁵Tsangue' Jesús tsamantsa keenbashiinuu ke' keewara kikiñu, tsenmin naa kailla bain aa elesha chunu veeta juusha: ¡Rei Davidnu sera' jamu Naya yuj sunden jusa! ti' ui'nushi deeñu, chachilla' mitya Diosnu kalen jimula' bale rukula bain, naa leichi mashturula bain ajaatyatu ¹⁶Jesúsnu tsandila: ¿Kailla entsandindetsu ñuya merendyuu? tila.

Tsenñu Jesús pakatu: Narana meenayu, tsejtu ¿ñullaa Diosa' Kiikanu juntsanu laapu' patu entsandimuñu lengue' kerajdetuu? Entsandive: *Kaa kaila' beesachi bain, naa chuchu fikemu kaila' beesachi bain juntsalachee tsamantsa ura rukuve tikayanu juve,*^u ti' pillave, timi.

¹⁷Tsejtu yalanu shuike', pebulunu malu' miji', Betaniasha ji' tsun chayami.

Puka natyu igu chinu Jesús ejkewaami.

(Marcos 11.12-14, 20-26)

¹⁸Kepenene Jerusalénsha miindu Jesús panda mutyami. ¹⁹Tsejtu igu chi main miñu keesha chu kata', puka kanu tyá' kalen jituren, tiba natyu jakin puu kataakemi. Tsejtu juntsa igu chinu tsandimi: Naa-awanuba puka ma-i'keemee, timi. Tsandiñu me-ejkeimi juntsa igu chi. ²⁰Tsaiñu dekatatu, ya' disipulula yuj keenbaishu Jesúsnu tsandila: ¿Nejtaa entsa igu chi jei me-ejketu in? tila.

²¹Tsenñu Jesús tsandimi: Uwaindiyu ne tsaichunga tyá' pensandandajtu ju' Diosnu uwain tsaave tyá' keenguem chachi deeshu juntsaa, entsa igu chinu iya naakeñuba ñulla juntsan kikenu dejutyuve; kayu vera bain ke', naa ne entsa kuyinu: Aanu lu' ji' lamaasha pajtyaide tiñu bain, uwain tsainu tsuve. ²²Tsaju' ñulla ti pakike' bain uwain tsaave tyá' Diosba kuinda ke' depakenmalaya tsa tsaikaanu tsuve, timi.

Jesúsnu ¿Maa ñunu aantsangues nekaantsun? tila.

(Marcos 11.27-33; Lucas 20.1-8)

²³Entsangue' dyatu, Jesús aa elesha chunu veeta juusha vi' chachillanu mijakaren puñu, chachilla' mitya Diosnu kalen jimula' bale rukula, judío bale rukulaba ya' junga kalen jitu entsandi pake'meela: ¿Ti' mityaa entsangues nentsuyu? ¿Maa ñunu aantsangues nekaantsun? tila.

²⁴Tsenñu Jesús bain tsandimi: I bain ñullanu ma pake'mera kenu tsuyu; tsenñu ñulla depakanmalaa, i bain wainnu tsuyu maa inu entsangues nekaantsuñu bain. ²⁵¿Maa Juannu ere' mungares nenu tireñanga? ¿Diosya tsanguiñanga? ¿Chachillaa tsa dekiñanga? timi.

Tsenñu yaitala veta' veta' paviikendu tsandila: Lala naati' Juan Diosa' uudenchee tsangues nemuve tin tsa deeyu. Tsandishu juntsaa: ¿Nenñaa yanu keranguiyuwa deeyu? tinu juve. ²⁶Tsenmin lala naati' chachilla' uudenchee tsangues nemuve tin tsa deeyu. Matyu Juannuya naaju chachilla bain Diosa' mitya pamu rukuve tyamu de' mitya, lala tsa detishu juntsaa firu' kenu dejuve, tiitila. ²⁷Tsejtu Jesúsnu pakatu: Lalaya Juan mu' uudenchee tsaita nemuwaañuba mijdetuyu, tila.

Tsa detiñu Jesús bain tsandimi: Tsaashu juntsaa, i bain ñullanu wandin jutyuyu, maa inu entsangues nekaantsuñu bain, timi.

Pai nalanu Jesús laapu' pamí.

²⁸Tsejtu Jesús yalanu pake'meetu tsandimi: ¿Naajuin ñuichiya entsa kuinda? Ma ruku pai na miyami. Tsejtu ajke' nanu kalen jitu tsandimi: Apa, uma malu ñu in uva vijpaasha ji' taawasha kiide, timi. ²⁹Tsenñun ya' na pakatu: ¡Inaa jindendyuve! titun, bene veta' pensa mantu, taawasha kenu jimi. ³⁰Ya' apa bene kama nanu bain tsandita jimi. Tsenñu juntsaya: Apa, jinu tsuyu, titun jityumi. ³¹Tsa' mitya ¿naajaa ya' apa naakesa tyañuba tsanguitunguen juntsa pallulanu? timi.

Tsenñu yala pakatu: Ajke' na jumaa tsanguiñuve, tila.

Tsa detiñu Jesús tsandimi: Uwaindiyu romano uñichi deechu' mitya lushi kamula bain, naa mu'baasa tsu tsudimu shinbula bain, yalaa Diosnu yala' rei juu tananu detsuve, ñullaya rei juu tananu dejutyuñuba. ³²Matyu Juan Mungaamuya naake ura' ken chunuu juñuba tsangue dekeemijakares neñun, ñullaya dekeenguityuñuba, romano uñichi deechu' mitya lushi kamula bain, naa mu'baasa tsu tsudimu shinbula bain yalaya dekeenguive. Tsejtu yala tsangue' keenguendetsuñu, ñulla ma entsangue kataturen, ne veta' pensa mangue' keranguee kiba dekityuve, timi.

Firu' taawasha kemulanu Jesús laapu' pamí.

(Marcos 12.1-12; Lucas 20.9-19)

³³Kama laapu' kuindanu meedidei: Ma ruku, pure' vijtya miyaa ruku, ma uva vijtya kemi. Tsejtu veeta bain ke', nunbanaa binu kiikenu ju'ba juntsa bain ke', naa washna' keekeenanu aa katyu ya bain dekemi. Tsanguitu vijtya miya ruku, mantsa taawasha kemulanu medya washkare' baasha ma jiimi. ³⁴Tsejtu puka de-i' dekanu tinbu iñiu, yachi taawasha kemu chachillanu yachiya manganu uudengue' eemi. ³⁵Tsenñuren vijtyanu medya washna' taawasha kemu rukula, juntsa ruku' taawasha kemu chachillanu dekatu, mainnuya debandekila, tsenmin kamainnuya ma tutekila, tsenmin kayu veranuya shupukachi ma dekikila. ³⁶Tsa dekiñu, vijtya miya ruku yachi taawasha kemu chachillanu, ajke' bijeenu naake eemu ju'ba juntsanu kayu pullake me-eemi, tsenñuren manen tsarenguila.

³⁷Tsejtu umaa pulla'bi ura ya' nanun ma erekemi, ya' pensaya: "In nanuya balengure' jeetyanu dejuve", tyatu. ³⁸Tsenñuren vijtya medya taawasha kemula ya' nanu katalan yai tene entsandila: Entsaa ya' apa peyanmala, yachi tiba

mandashuwanuu jumuve. ¡Yanu tuteke!, lalaa kumuinchi entsa detashuwadaa! tila. ³⁹Tsanditu juntsa nanu ka!, vijpala jutyuinsha vee mujtu takike! tsaa tutekila.

⁴⁰Tsenñu uva vijtya miya ruku maatu, ¿juntsa chachillanu, tyeenguenu juve tenguen ñullanuya? timi.

⁴¹Tsenñu yala tsandila: Juntsa firu' kemu chachillanu tenbiputyu detutekenu juve, tsangue! ya! uva vijtyaya veelanu, matyu puka inmala kamin, yanu naake mangunu juñu bain, naa-uwanu mangunu juñu bain jeke tsa tsangue mangunuulanaa medya manguwanu juve, tila.

⁴²Tsenñu Jesús tsandimi: ¿Tsejtu ñullaa Diosa! Kiikanu entsa pillanu lengue' kerajdetuu? Entsandive:

*Ya kemula' kepu shupukaa
kayu deenamishtimu shupuka tiyaive.
Juntsaya Bale Rukaa tsanguiñu' mitya,
kumuinchi sunden keenbashindetsuyu, ' ti' pillave.*

⁴³Tsa' mityandiyu, ñulla Diosnu rei juu tananu dejuñuba ne vijtyaaba juñu ñullanu machi'ken tsangue!, naajulaa puka iwaren tsanguenuu dejuñuba, juntsalanaa mangunu tsuve. ⁴⁴Tsenmin shupukanu pensangue' panmalaya, mun shupu' jandala pajtyai' bain de-ijchaa pajtyainu tsuve, tsenmala munaa juntsa shupuka pajñu bain, tsaa de-ijchaa jiinu tsuve, timi.

⁴⁵Tsenñu chachilla' mitya Diosnu kalen jimula' balela bain, naa fariseo chachilla bain, Jesús tsandi', laapu' paa kuinda tene kiiketu, yalanaa meeware' pa' tsandiñuba aseetanguila. ⁴⁶Tsejtu Jesúsnu peesu kanu tyaturen, junu pumu chachillanu jeetyala, matyu junu pumu chachillaya, Jesúsya Diosa' mitya pamu rukuve tyadeiñu' mitya.

Fandangu jadei detiñun, jityu chachilla (Lucas 14.15-24)

22 ¹Jesús, chachilla' mitya Diosnu kalen jimula' bale rukulanu bain, fariseolanu bain laapu' kuinda juu mantu tsandimi: ²Diosnu rei juu tananu juñu pensanguiñuya, ma rei ya! nachi matsunu fandangu kikiñuuve. ³Tsejtu yachi taawasha kemu chachillanu uidenguitu, bulu puve'nu mikaya chachillanu mamijakaanu eemi. Tsenñun yala pundyai'tu jityula. ⁴Tsenñu manen yachi taawasha kemu chachillanu uidengue' mamijakares nenu me-eemi entsanditu: Bulu puve'nu janu judeeshu juntsa chachillanu entsandidei: Yumaa panda deke! keenayu, naa wagaa juula bain, naa kayu vee animaa nakululuu juula bain detuteke! teengare! keenayu. Tsa' mitya kumuinchi yumaa dekike! keenayu; fandangu jadei, tive, tidei, timi. ⁵Tsejtu tsandi' ma eekiñu bain, jandetyai'tu, mainya taawasha kenu jinmala, kamainya tyeenguitaa lushi laren chumu ju'ba tsanguenu jimi. ⁶Tsenmala kayu veelaya reichi taawasha kemu chachillanu deka' bande' tutekila. ⁷Tsenñu rei pure' ajaavi-i!, ya! suutadulanu ere' detu'kaakemi

bande' tu'mu chachillanu, tsangue' naa yala' chunu pebulu bain deju'kikaakemi. ⁸Tsejtu rei mantsa yachi taawasha kemu chachillanu tsandimi: Matsunu fandangu kendu panda finu yumaa dejuu ma chunaren, bulu puve'nu Jainuu chachilla tsai' ja' bulu punuu jutyuwa deeñuve. ⁹Tsa' myita chachi den pulla pullainu miñutala deji', munu kata'ba entsa fandangu panda five'nu mikadei, timi. ¹⁰Tsenñu reichi taawasha kemu chachilla miñusha deji', naa ura chachillanu bain, naa firu' chachillanu bain wa'kaadekiñu, bulu puve'nu jamu chachilla ya tyuwai wa'dila.

¹¹ Tsa deiñu rei, fandangu bulu puve'nu jamu chachillanu keenu vitu, ma ruku fandangu neneinu jali panajtu jiñu kata' kerai shuwatu ¹²tsandimi: Ruku, ¿naa itaa fandangu neneinu jali panajtuba ñu engu vijatu iyu? timi. Tsandiñu, jaiba pakai'mi. ¹³Tsenñu tiba veles neneimu ya' chachillanu rei tsandimi: Entsa rukunu tyaapa bain, neepa bain teleke' avindala tsamantsa yapijurunainsha kelaakidei, timi. Tsanditu Jesús tsandimi: Junu ware' naa tejku bain depakaanu tsuve, timi. ¹⁴Matyu mikayamulaya pure' judeeve, tsaaren ura te'laramulaya jayun judeeve, timi.

Deechu' myita lushi paanguenutala
(*Marcos 12.13-17; Lucas 20.20-26*)

¹⁵Tsenñu fariseo chachillaya mijil' yai tene pensanguenchin juula, tyeenguitaa Jesúsnu tujle' pakare' kuipa vichunga tyatu. ¹⁶Tsejtu yaiba buunamu chachillanu bain, Herodes rei juñuba uraa tyamu chachillanu bain buluu Jesús' junga eela, entsandidei titu: Mashturu, mideeyu ñuya anbutityu rukuñuba, matyu chachillanu Dios naaken chusa tyamuñuba anbuda jetyu tsangue mijakares nemu rukuve, chachilla tyeendichudeenga tya' pensandyatu, tsenmin chachilla kapukachi naa-i dekatawañuba ne tsaanaa tejanguera' tsa deeve tyatyu rukuve. ¹⁷Tsa' myita ¿ñuya naa tinu juyu? ¿Tsanguenuu jun, tsanguenuu jetyun, romanolachi kayu aa uñinu deechu' myita lushi kuwa kuwakenu? tila.

¹⁸Tsenñu Jesús yala firu' pensa juuya tsandis nendetsuñuba mijatu tsandimi: Tsa jetyuren tsañañungue keewaamu chachilla, ¿ñulla inu kuipa katanu tenguee? ¹⁹Deechu' myita kuwa kuwakenu lushi inu keewaakai, timi. Tsenñu ma paki lushi dekeewaañu, ²⁰Jesús tsandimi: ¿Entsa kajuu muute juushu juntsa, naa enu pillashu juntsa mumu bain, muchin? ti' pake'meemi yalanu.

²¹Tsenñu yala: Entsaya romanola' kayu aa uñichive, tila.
Tsa detiñu Jesús tsandimi: Tsaashu juntsaa, romanola' kayu aa uñichiya yanu kuwadei, tsenmin Dioschiya Diosnu kuwadei, timi.

²²Tsandi pakañu demeetu ti pan tsai shuwa' yanu shuike' miila.

Pemula mangujnutala Jesúsnu pake'meela.
(*Marcos 12.18-27; Lucas 20.27-40*)

²³Tsenñu juntsa malunun mantsa saduceo chachilla, matyu pemulaya mangujtan jetyu deeve timu de' myita, Jesús' junga jitu entsandila:

²⁴Mashturu, Moisésya entsangue mijakaamuwaave: Main supungatun, ya' shinbunu nakakarei'mujchin peyashu juntsaa, ya' naatalaa juntsa biyuda shinbunu manga', pemu milla' mitya na seenguikaanu juve,^w timuwaave. ²⁵Tsenñu ma bijee lala' jundala unbeena naatalaa tenen mandishpai naatala ma juula. Tsejtu ajke' jumu supungaturen nakakarei'mujchi peyañu' mitya, junu ya' kelunu jumu, ya' bennaa juntsa shinbunu mangami. ²⁶Tsejturen ya bain tsaren imi, naa ya' kelunu jumu naatala bain tsaren imi, tsejtu kumuinchu juntsa mandishpai naatalala millai peyala. ²⁷Tsa' ma depeyadeiñu, umaa entsa shinbu bain bene peyami. ²⁸Tsa' mitya, pemula demangujnu uwanuya, matyu kumuinchin supu tire' chumuwa deeñu' mitya, ¿naaju naatalachee ura ya' shinbu junu jun, juntsa mandishpai naatala jumulachi? tila.

²⁹Tsenñu Jesús tsandimi: Ñullaya naa Diosa' Kiikanu bain, naa Dios tiba tsamantsaa kemuuñu bain kerajdetu' mitya, tujlanchi ma judeeve. ³⁰Pemula mangujnu malunuya demangujpa' supu manganu bain, unbee mangayainu bain dejutyuve, matyu kai'sha chumu anjeela naadejuñuba juntsaaya chunu detsuve. ³¹Tsenmin pemula mangujpanu dejuñu kuindanu laapu' panmalaya, ¿Diosren entsandiñu lengue' kerajdetuu ñulla? ³²¿Iyaa Abrahamchi bain, naa Isaacchi bain, naa Jacobchi bain yala' Diosyu,^x timuñuba lentyuwa dejuu? Yaa pemula' Dios jutyuve, chumula' Diosve, timi.

³³Jesús tsandi mijakare' pañu chachilla demeenatu mika meenbashi[!] ti pan tsaa meranala.

¿Naaju uudenya kayu balen?
(Marcos 12.28-34)

³⁴Tsejtu saduceo chachillanu, Jesús tsandi' ma pa'piwaakive detiñu fariseola mijatu wa'dila. ³⁵Tsenñu yaatala main Moisés' wandya lei mashturu tuje' pakakare' kuipa punu tyatu, entsandi pake'meemi:

³⁶Mashturu, ¿leinu naaju uudenya kayu balen? timi.

³⁷Tsandiñu Jesús tsandimi: Ñu' Bale Ruku Diosnu mika estyade, ñu' tenbukachi, ñu' aamachi, ñu' pensachi, kumuinchu ñu' pudengura estyade.^y

³⁸Entsa uudenya kayu baleve, tsenmin entsaa ajke' jumu uudenve.

³⁹Tsenmin entsa keraa, entsa uudenru mi'namu bain, entsaa juntsave: Maali naa-i estyamu ju'ba ñuba kalen chumu chachinu bain juntsai estyade,^z tive. ⁴⁰Tsa' mitya naa Moisés' wandya lei jumula bain, naa Diosa' mitya pamu rukula bain, entsa pai uuden jumulanu tene laapu' pamu deeve, timi.

w 22.24 Deuteronomio 25.5 x 22.32 Éxodo 3.6, 15 y 22.37 Deuteronomio 6.5

z 22.39 Levítico 19.18

Dioschi Mi'ke' Kayamu munaa sera' jañu bain
(Marcos 12.35-37; Lucas 20.41-44)

⁴¹ Fariseo chachilla kayu dewa'naren, Jesús yalanu pake'meetu

⁴² tsandimi: ¿Nullaa Dioschi Mi'ke' Kayamunu naa detiyu? ¿Munaa sera' jatu-in? ti' pake'meemi.

Tsenñu yala pakatu: Rei Davidnaa sera' jamu nave, tila.

⁴³ Tsenñu Jesús tsandimi: Tsaanuba, ¿nenñaa, Espíritu Santo tsandikaañu, David Dioschi Mi'ke' Kayamunu patu, Bale Ruku timuwaatun? Matyu David entsandimuwaave:

⁴⁴ *Bale Ruku Dios in Bale Rukunu tsandive:*

*In urandyasha chudide,
 kayu iya ñu' kundaalanu depuitu
 ñu' neepa teetanainsha detsurendyuya,*^a timuwaave.

⁴⁵ Tsaaren Davidren Dioschi Mi'ke' Kayamunu Bale Ruku tiitimuwaanuba, ¿nejtaa yanu sera' jamu nanu jun? timi. ⁴⁶ Tsandiñu mu bain naati' ne pakakenuba jui'la, tsejtu umaa juntsa malu ajkeshaya, manbake'meenu tyatyui tiyala.

Jesús judíola' bale rukulanu kuipa pu' pamí.
(Marcos 12.38-40; Lucas 11.37-54; 20.45-47)

23 ¹Jesús tsandi' dyatu, junu meenamu chachillanu bain, ya!
 disipululanu bain ²tsandimi: Leichi mashturulaa, fariseo chachillaba Moisés' wandya lei naatiñuba wandi wanditinuu jumula deeve. ³Tsa' mitya yala naadetiñuba ñulla meengue', titi depañuba tsa tsanguidei, tsaaren yala tyee kemu deeñuba juntsaya kityudei, matyu yalaya palaachiya tsandi' bain, kenchiya tsangue kityu deeve. ⁴Veelanuya tsamantsa adyu naa-i' tajin tsaa nandekiñuu kemularen, yalaya ta've'nu ne tyamishuchin juuñuba ta'katyu deeve. ⁵Yala ti kike' bain chachilla dekeesa tyá' ne iiikemu deeve. Tsenmin ballalla kaa pute keraa bain kayu aawa' kike' Diosa' Palaa pilla kiika petse pu', yala' llashkapanu bain, naa tyaapatala bain teepu teepukemu deeve. Tsenmin Diosnu ura' keenguemu chachi deeyu tyá' keewaatu, jai mututala eenguenu jai petsela bain shushui teleke' aabare' eengaakaakemu deeve. ⁶Fandangu ke' panda finu uwani bain kayu ura chunjuuya mi'kemu deeve, naa cha' waku wakudinu yatala bain kayu balela' chuchudinatalaa chunu ajchundayamu deeve. ⁷Tsenmin cha' den neneindala bain yalanu aawa kure!, ura' jusa tiidetisa tyamu deeve, tsenmin yalanu: Mashturu, tiidetisa tyamu deeve.

⁸Tsaaren ñullaya ne ñullanu, "Mashturu", detisa tyatyudei; ñullaya naajulaba naatala tene judeeve, tsenmin ma mashturun miya deeve. ⁹Tsenmin ñulla

naaju chachillanu bain: Apa, ti' patyudei; ñullaya kai'sha chumu ma Apan miya deeve. ¹⁰Tsenmin ne ñullanu, "Mijakare' wainmu ruku" detisa tyatyudei, matyu Dioschi Mi'ke! Kayamuren ñuichi main Mijakare' wainmu ruku juuve. ¹¹Tsaju' mun ñuitala kayu aawayu tya'ba vejanlachi taawasha kemu chachi junu tsuve. ¹²Matyu mun kayu mu' mityaba yaa aawa juchi tya'ba balejtu kura' uukavinu tsuve; tsenmala mun tiba daj keewaatyu chachi ju'ba aawa kurantu tsuve.

¹³ ¡Nulla leichi mashturula bain, fariseo chachilla bain, tsa jutyuren tsaañungue keewaamu chachilla, mika taaju i' puinu dejuve! Nullaya veelanu Diosnu yala' rei juu tanan jetyu daatadimu deeve. Tsenmin ñullan Diosnu rei juu tananu dejutyu', naa veela yala' rei juu tananu kemulanu bain tsanguikaatyu chachi deeve. ¹⁴b

¹⁵ ¡Nulla leichi mashturula bain, fariseo chachilla bain, tsa jutyuren tsaañungue keewaamu chachilla, ñulla mika taaju i' puinu dejuve! Nulla naaju' bain tsaa chachi tirenu, main mityakenuuren, nuka bain deji' katamiya, juntsanu ñullanuba pai bijee pullake ñi jelekenu kensha viinuu chachi tiremu deeve.

¹⁶ ¡Nulla kapuka puñu jetyuuren veelanu miya' neneimu chachilla, mika taaju i' puinu dejuve! Nullaya tsandimu deeve: Diosa' pupunanu ya' mityaa mun Diosa' mumunu paka' uwain tsanguenbera kenu tsuyu tituren tsangui'ñu bain, tiba jetyuve timu deeve. Tsaaaren Diosa' pupunanu yanu pumu uru' mityaa, Diosa' mumunu paka' uwain tsanguenu timiya, tsanguenbera kenuu juve timu deeve. ¹⁷¡Nulla pensa tajtu chachilla! ¡Kapuka putyu chachilla! ¿Tyee kayu balenu jun? ¿Uru jumu? tsa jetyu'ba, ¿juntsa urunu Dioschin juu tirekaamu ya' pupunanu yaa? ¹⁸Tsenmin ñulla entsa bain tsandimu deeve: Mun ufeenda tsure' ju'kenunu' mityaa Diosa' mumunu paka' uwain tsanguenbera kenu tsuyu tituren, tsangui'ñu bain ne juuve timu deeve; tsaaaren ufeenda tsure' ju'kenunu tsuramu ufeenda' mityaa Diosa' mumunu paka' uwain tsanguenbera kenu timiya, uwain tsanguenbera kenu juve, timu deeve. ¹⁹¡Nulla kapuka putyu chachilla! ¿Tyee kayu balenu jun? ¿Ufeenda jumu? Tsa jetyu'ba, ¿Juntsa ufeendanu Dioschin juu tirekaamu ju'kentsumi jumu? ²⁰Tsaju' mun ufeenda tsure' ju'kenunu' mityaa Diosa' mumunu paka' uwain tsanguenbera kenu tsuyu ti' bain, ufeenda tsure' ju'kenunun patindyuve, juntsa ufeenda tsure' ju'kenunu ti tsuñuba kumuinchu delaapu' pantsuve. ²¹Tsenmin mun Diosa' pupunanu ya jumu' mityaa paka' uwain tsanguenbera kenu tsuyu ti' bain, Diosa' pupunanu yanun laapu' patindyuve, maa junu chumuñuba juntsanu

b 23.14 Yumaa tinbu jumu kiikatalaya bersikulu 14nu pilla bain puve, tsaaaren kayu ura' manbiike' kaya kiikanlanya entsa pilla putyuve: ¡Nulla leichi mashturula bain, fariseo chachilla bain, tsa jutyuren tsaañungue keewaamu chachilla, ñulla' mitya mika pensandenvé! Ti naaju biyuda shinbula tadeeñu bain, juntsa dechipa keturen, tsanguindyuve tikaandyanchiren Diosba kuinda ke', tsamantsa bare' kuinda kiikemu chachi deeve. Tsa' mitya ñullaa Dioschi kuipa vi' kayu taaju inu detsuve.

bain laapu' pantsuve. ²²Tsenmin mun selu' mitya Diosa' mumunu paka' uwain tsanguenbera kenu tsuyu ti' bain, Dios chudi' uudengueno ya' chunbulla' mitya bain tsandiñuu ju', naa juntsa chunbullanu chumu' mitya bain tsarendiñuu juuve.

²³ ;Ñulla Moisés' wandya lei mashturula bain, fariseo chachilla bain, tsa jutyuren tsaañungue keewaamu chachilla, ñulla mika taaju i' puinu dejuve! Aindyu mentanu bain, anisnu bain, naa kuminunu bain paitya pela vele' Diosnu manbaate kuwa kuwakemu deeve, tsejturen kayu bale lei uuden jumulanaa keeminchaa juju deeve, entsa judeeshu juntsalanu: Dios naakesa tyañuba tsanguenu jumunu bain, munu bain tenbityanu jumunu bain, tsenmin Diosnu uwain tsaave tya' keenguenutala bain. Tsa' mitya, ura pañuya entsaaya kiikenuu dejuve, naa ñulla' kiikendetsushu juntsala bain tsaren kidyai'mujchi. ²⁴ ;Ñulla kapuka putyuren veelanu miya' nemula! ;Dioschi urajtu kuran jutyu tyatu, te'laanu shi'shullachi ke' kaa atyutyu shiyayanuya pinu te'laaturen, jelekenuu kameyu juuñuanuya te'laatyumujchi tsaa puite puitekemu deeve!

²⁵ ;Ñulla leichi mashturula bain, fariseo chachilla bain, tsa jutyuren tsaañungue keewaamu chachilla, ñulla mika taaju i' puinu dejuve! Naa shullanu bain, palatunu bain avindalan manbitsalekemu chachi deeve; tsaju' juushaya manbitsalajtu tiba detaangue' tyuwake pu' tanañu denave, tsenmin kayu tiba mitya' demi'ke' ka' tyuken tsa tsa dekive. ²⁶ ;Kapuka putyu fariseo chachilla! shulla juushaa ajke' manbitsaadei, tsenmalaa avindala bain manbitsala katawanu tsuve.

²⁷ ;Ñulla leichi mashturula bain, fariseo chachilla bain, tsa jutyuren tsaañungue keewaamu chachilla, ñulla mika taaju i' puinu dejuve! Ujkun mennainsha keraa avindalaya fibabanchi juu narai katawamu chachi deeve, tsaaaren tainshaya Dioschi urajtu kurekaamu ujkun taku tene juu tiba depetee tene juuñu deeve. ²⁸Tsaañuu deju' mityaa, ñulla chachillachiya Dios naakesa tyañuba tsanguen chumu juuñuu katawaturen, tainshaya tsa jutyuren tsaañungue keewaamu deju', tituba firu' pensa tene tyuwa chachi deeve.

²⁹ ;Ñulla leichi mashturula bain, fariseo chachilla bain, tsa jutyuren tsaañungue keewaamu chachilla, ñulla mika taaju i' puinu dejuve! Ñullaya Diosa' mitya pamu rukula' ujkun mennanutala ura' mangue' kasa mangui manguikeku deeve, tsenmin Dios naakesa tyañuba tsanguen chumulanu mandenganu titu, muute deke' chujtyatala bain nara mangue' chujti chujtikemu deeve. ³⁰Tsenmin entsa entsandimu deeve: Lala' tinbu rukula' tinbunun laa bain chumaaba jutuya, tsangue' yala Diosa' mitya pamu rukulanu tutendetsu bain tuteve'tyuchu deeyu, tiitim deeve. ³¹Entsandi' mityaa, ñui tenen wandinetsuve naa Diosa' mitya pamu rukulanu tute tutekemu chachillanu sera' jamu deju', ñui bain juntsaaren kendetsu' bain. ³²Tsa deju'; ;ñulla juntsaaren deju' mitya, ñulla' aa-apala tyee ke' depeepuñuba, tsangue' jijiintudei, Dios nutala jingue tsanguikarengamaya!

³³ ¡Piñi chachilla! ¡Piñi tsaa chachillanu sera' jamula! ¿Tyeenguitaa ñi jelekenu kensha vi'chu deeyu tenguen? ³⁴Entsanu ura' meedidei: iya ñulla' junga naa Diosa' mitya pamu rukulanu bain, naa tsamantsa aseetaju chachillanu bain, naa leichi mashturulanu bain eenu tsuyu. Tsenñuren ñulla mantsalanuya tute'kera, kuusanu tu'pu'kera, vejanlanuya cha' waku wakudinu yatala debande'kera, naa pebulumeemee bain firu' kenu deketakes ne'ba tsa tsainu detsuve. ³⁵Nulla tsanguimee, ti kuipaba jutyu chachi peya' asa shajaa-eemula' mitya ñulla tene kuipa kakenu detsuve, matyu Dios naakesa tyañuba tsanguemu ruku Abelnu tuten mitya kuipa kamin, Diosa' pupunanu ya jumuba, ufeenda tsure' ju'kenunuba pensanguenmala, juntsa kejtaa tenatala ñulla judfola detu'ñu pemu Berequías' na Zacarías' mitya kuipa kakijanu detsuve. Tsenmalaa naa ñulla kuipa judeeñuba entsai keengaya junu tsuve, naa Diosa' mitya pamu rukulanu bain, tsamantsa aseetaju rukulanu bain, lei mashturulanu bain eeñu ñulla detutenmala. ³⁶Uwaindiyu, ñulla challa chumu chachillanu tene kumuinchì juntsa kuipa' mitya taaju dejainu tsuve, timi.

Jesús Jerusalénnu chumula' mitya llakindyami.

(Lucas 13.34-35)

³⁷ ¡Nulla, Jerusalénsha chumu chachilla, naa Diosa' mitya pamu rukulanu bain tu'mu chachilla, naa Dioschi eramu chachillanu bain shupuka' kiikemu chachilla! Iya ñullanu pure' bijee walla' ama naakemun ya' kaillanu ja'chi pandansha tene pukemushu, i bain tsanguenu keñun ñulla tsa de-ikutityuve.

³⁸ Ura' meedidei, tsa' mitya Dios ñulla^c shuike' baka' miinu tsuve.

³⁹ Matyu ñullanu tsandinu tsuyu, entsa ajkeshaa inu mangatan dejutyuve, ñullan bene: *Bale Ruku' mitya jamuya Dioschi ura' imuve,*^d ti'mujchiya, timi.

Aa elesha senaa-eranu juñu Jesús wainmi.

(Marcos 13.1-2; Lucas 21.5-6)

24 ¹Jesús aa eleshasha puturen malu' yumaa miintsu, ya' disipulula ya' keesha jitu, juntsa aa elesha yatala naaju dejüñuba Jesúsnu keeware' keenbashinguekaanu kila. ²Tsenñu Jesús tsandimi: ¿Kumuinchì entsa naajuñuba katandetsutyuika? Uwaindiyu entsa aa elesha naa tsaju' bain, desenaaji-i', naa ma shupukaba dijkii tsutyui senaa-eranu detsuve, timi.

De-inu malu kalenainsha tyee i' pullantsunuñuba

(Marcos 13.3-23; Lucas 21.7-24; 17.22-24)

³Tsejtu bene Ulibu chi chunu kuyisha dejitu, Jesús chudiñu, ya' disipululan juu ya' keesha kalen jitu entsandi pake'meela: Lalanu wainka, ¿naamaa

^c 23.38 *Nulla' yanu* timiya ura yala' chunu pebulunu, tsa jutyu'ba, yala' aa eleshanu laapu' pataa tsandimi. ^d 23.39 Salmo 118.26

juntsaa de-i' pullantsunu jun? Ñu rei juuñuu maja' entsa challa chudenaashu juntsa tinbu de-inu juñu, ñtyee intsuñaa tsaa aseetanguenu dejuwa? tila.

⁴Tsenñu Jesús tsandimi: Ñulla muchiba tujle' keenguikaran jutyu jaiba pashkatyudei, ⁵matyu iya jutyuren Dioschi Mi'ke' Kayamuyu timula pureinu detsuve, tsai' anbukuinda keturen pure' chachillanu keranguikaanu detsuve. ⁶Ñulla endala juu bain, naa baasha juu bain suutadutala vinguendetsuve tiñu mere mereke' bain wapantyudei, matyu juntsaa-i' puintsunu ju' mityaa tsainu tsuve, tsaren ne tsaiñu bain, kayu de-inu maluya jun jutyuve.

⁷Matyu manbaate chachilla, kamanbaate chachillaba devingue'kera; manbaate tu' chulla, kamanbaate tu' chullaba vingue'kerakenu detsuve. Tsenmin nutsa tenasha bain panda yamuj tiya'kerakena' bain, naa kala ke'kerake' bain tsa tsanguenu tsuve. ⁸Tsaaren kumuinchis tsaa de-i' pullandu bain, ti ju'ba umaa taaju peepukendun tsainu tsuve.

⁹Juntsa tinbutalaa in mityaren ñullanu bale rukula' tyAAPASHA kuwa', firu' dekkare' detu'kare'kerake, naa mu bain ñullanu detyutya'kerakenu detsuve. ¹⁰Tsenmala pure' chachilla keenguityu demandiya', veta' veta' wandi' firu' kenu dekkare', naa veta' veta' detyutya'i bain inu detsuve.

¹¹Anbutitun Diosha' mitya pamuyu tita neneimula bain pure' faleke' anbuti' pure' chachillanu keranguikaanu detsuve. ¹²Tsenmin tiba firu' kenchi tene juu detiyainmala, pure' chachilla estya estyainu pensa jutyu tiyainu detsuve. ¹³Naa tsaintsu bain, mun de-inbera tujle'i'mujchi naake ura' kerangue' jintsu'ba tsaa jintsushu juntsaa livee inu tsuve.

¹⁴Tsenmala Diosnu rei juu tananu mika ura kuinda nutsa tushaba dewandidetiñu, naaju chachilla bain demija deinmalaya, umaa de-inu malu janu tsuve.

¹⁵Tsa' mitya, tiba chutyu yajchin jungue demushkemu, uu tyutyanuu jumu, Dioschin juu tenanu ja'pu katamiya, matyu Diosha' mitya pamu ruku Daniel tsandi wainmuwaañu juntsainmalaya (mun naa-uwanu cha' ajuusha entsa lengue' bain pensangue' keekide), ¹⁶mun Judea tusha puna' bain kuyisha nepidei. ¹⁷Tsenmala mun ya kai'sha leka lekakinsha puna' bain tusha manbjtya' nepinu, tyeeba manganu ty'a ya juusha mavityudei. ¹⁸Tsenmala mun jeenbaasha puna' bain ne jalleeba manganu ty'a, yasha miinu pensanguityudei. ¹⁹Juntsa malutala naaju shinbula napuu dechu' bain, naa chu'fimu kailla miyaa dechu' bain, mika taaju kenu detsuve! ²⁰Tsa' mitya ñulla tsai' denepinu tinbu ne shu tinbu juuchi, ne saaduma lekanu malu juuchi tsaitusa ti', Diosba kuinda ke' papatidei. ²¹Matyu juntsa malutala tsamantsangue taaju kenu detsuve, tsenñu entsa tu dekenu tinbutala bain, naa ne chai tinbutala bain, naa kayu bene bain juntsai taaju in jutyuuya i' puinu tsuve. ²²Tsai' tsamantsa taaju ke' puinu tinbu jumunu Diosren dape' kakaatyuñuya, muba livee in dejutyuve, tsaanuren Dios yachi mi'ke' kayamu chachilla' mityaren juntsa tsai' tsamantsa taaju i' puinu tinbu dape' kakaanu tsuve.

²³Tsa' mitya juntsa malutala mulaa ñullanu: ¡Keekidei, Dioschi Mi'ke' Kayamu enu entsanave! tsandityu'ba, ¡Keekidei, junu juntsanave! detiñuba keenguityudei. ²⁴Matyu Dioschi Mi'ke' Kaya jutyuren juntsayu tis nemula bain, naa Diosa' mitya pamu jutyularen juntsayu tis nemula bain janu detsuve. Tsejtu Diosyaa tsanguekaantsuve tyainuu bain deke' keeware', naa tsamantsa keenbashinguekaanu jumu bain deke' keeware' chachillanu anbuda keranguikaanu detsuve, tsenmin yalan tsanguenuu jutuya naa Dioschi mi'ke' kaya chachillanu bain anbuti' keranguikaanu kenu detsuve. ²⁵Kayu tsa indyuren ñullanu yumaa dewainyu. ²⁶Tsa' mitya ñullanu: ¡Keedidei! ¡Dioschi Mi'ke' Kayamu junga tiba den chutyuinsha puve! detiñuba, jaiba jityudei. ²⁷Matyu kuidya pi'kitu naakemunga pajta lainsha pi'kemin, pajta vinsha jingue pi'kemuusu, Chachi Tiya! Nakayamu maanu uwanuya juntsaanu tsuve. ²⁸Matyu nuka pete tsuñuba, jungaa petyutu wa'dimu deeve, timi.

Chachi Tiya' Nakayamu maanu malu

(Marcos 13.24-37; Lucas 17.26-30, 34-36; Lucas 21.25-33)

²⁹Tsangue' tsamantsa taaju deke' puinu malatalaren pajta yapijuru' kanu tsuve, naa kepe pajta bain dandajtui tiyanu tsuve, naa makara juula bain kai'sha tyaike' pajanu detsuve, tsenmala kumuinchi selu bain tsaa depil'shikenu tsuve.^e

³⁰Tsenmala Chachi Tiya! Nakayamu selusha maantsuñu tyeeba ke' keewara katawanmalaya, entsa tusha kumuinchi vee vee sera' jimu paandela tsamantsa jeetyanchin waanu detsuve. Tsejtu Chachi Tiya! Nakayamu ñivish jandala ya' pudeechi tsamantsa pi'juruu majaintsu kataanu tsuve.^f ³¹Tsenmala Chachi Tiya! Nakayamuya juipunu tyujtyu daran juipukaatu ya' anjeelanu ere', yachi mi'ke' kaya chachillanuya tu kuraa dete'kakare' wa'kaanu eenu tsuve.

³²Matyu igu chinu keetadi' mijan tsasidei: Naa-uwanu ma igu chi ya' ali denakulu'kake' ya' jaki demashu'jеле kentsuñu bain, yumaa shu tinbu jutyu mandinu kaleintsuñuba mijamu deeve. ³³Entsa bain tsaren juñu' mitya, kumuinchi entsaa de-i' pullantsu katashu juntsaa mijanu dejuve juntsainu kalenatu yumaa juukapanu punañu bain. ³⁴Uwaindiyu entsa tinbunu chumu chachilla kayu peyaindetyuren kumuinchi entsaa de-i' puinu tsuve, timi. ³⁵Naa selu bain, naa tu bain millai' de-i' puiñuba, iya naatiñu bain juntsalaya uwain tsainbera inu detsuve.

³⁶Tsaaren ne ti malunaa tsainuuñu bain, ne ti uranaa tsainuuñu bain juntsaya muba mijdetuve, naa selusha chumu anjeela bain, naa ya' Na bain mijtuve, ya' Aparen miive.

³⁷Matyu Noé' chunu tinbunu naa-imuwaañuba, Chachi Tiya' Nakayamu' maanu tinbunu bain tsaren junu tsuve. ³⁸Juntsa tinbutala kayu shuwa

jelekenui' pi debukindyuya, chachilla panda fi'kera, kujchi'kera, supunga'kera, tsenmin matsu'kera kentsumuwa deeve, kayu Noé baakusha vindyunu malunuya,³⁹ tsejtu naa mijaba indetyuren, shuwa jelekenui' pi buke' tsaa deka' jiimuwaave. Tsa' mitya Chachi Tiya' Nakayamu' maanu malunu bain tsaren junu tsuve.⁴⁰ Juntsa malunu pai ruku jeendaa nentsu'ba, mainren kaya' jiinmala, kamainya shuwanu tsuve.⁴¹ Tsenmala pai shinbu tyeeba iliken depu' bain, mainya kaya' jiñuba, kamainya shuwanu tsuve.

⁴² Tsa' mitya uwain naamaa ñulla' Bale Ruku maanuu juñuba mijdetu' mitya pashkayajtu keenadei.⁴³ Tsaaren entsaya mijadei: ya miya ruku, kepe ti uratalaa taamu januuñuba mituya juntsa uratala kastyu' washina' keenatu, taamunu eepukaatyu' taanguikaan jutyuve.⁴⁴ Tsa' mitya ñui bain jinun jutyuna' keenadei, matyu Chachi Tiya' Nakayamuya ñulla maanu juve pensaba dejutyunu uwani majainu juñu' mitya.

Ura' taawasha kemu bain, ura' taawasha kityu bain
(Lucas 12.41-48)

⁴⁵ Kidanda jutyu, tyee keñaa urañu bain tsa tsanguemunu, yanu uudenguemu ruku ya' yanu washkare' yachi taawasha kemu chachillanu panda finu ura tiyanmalaya, panda kuwa kuwakenu shuike' jiñu jun tsaadei.⁴⁶ Tsenmala yanu uudenguemu ruku naati' jiñuba yachi taawasha kemu chachi tsanguentsu mangatawamuya mika sunden junu tsuve.⁴⁷ Uwaindiyu juntsa chachinu, yanu uudenguemu ruku ti taju' bain yanu tene dewashkenu tirenu tsuve, timi.⁴⁸ Tsaaren juntsa yachi taawasha kemu chachi firu' ju', ya' pensasha: "Inu uudenguemu ruku te' majan jutyuve", tya!,⁴⁹ yaba bulu taawasha kive'mu chachillanu defiru' kedundai', vin rukulaba buudi', panda fi', naa ishkalaba kujchiken ne chunatu,⁵⁰ naa keenabanatyunu malunu, tsenmin majan jutyuve tyanu uranu yanu uudenguemu ruku maamiya⁵¹ tsa jutyuren tsaañungue keewaamu chachilla' puinsha ereke', tsamantsangue taaju kikaanu tsuve. Tsenmala jungaa ware' naa tejkuba depakaa kentsunu detsuve.

Paitya pannalanu laapu' pamí Jesúis.

25 ¹Diosnu rei juu tananu juñu pensanguinuya, paitya pannala ulibu mulichi chakaraa ñillu deka' supunganuu jumu ruku jantsu mikajiiñuuve. ²Tsejtu man pannalaya ti kenduba tejan kerei'mujchi kemu panna deenmala, kama man pannalaya ti ke'ba tejan keetu tene kemu jula. ³Tsejtu ti kenduba tejangueetyu pannalaya yala' ñillu dekaturen, de-iñu manbunu muliya tajtu jiila. ⁴Tsa deiñuren, ti kenduba tejangueetu tene kemu pannalaya yala' ñillu kamin, de-iñu manbunu muli bain ma lemeta ka' jila. ⁵Tsejtu supunganuu jumu ruku te' jaindyuñu' mitya, kasandyatu tsaa dekasuila. ⁶Tsa denaren kejtaa kepe iinutala: ¡Supunganuu jumu ruku yumaa jantsuve; fale' yanu dekaji! tiitila. ⁷Tsa detiñu juntsa pannala demangujpa' yala' ñillu ka' jinun jutyungaala. ⁸Tsejtu ti kenduba tejangueetyu

pannalaya, ti kenduba tejangueetu tene kemu pannalanu tsandila: Lala' ñillu ma demanbeyaintsuve; ñulla' taañu muli jayu kuwakai, tila. ⁹Tsa detiñun ti kenduba tejangueetu tene kemu pannala entsandi pakala: Naake' kuwan tsaa keeve; kuwashu juntsaa, ñuichi bain tse'ken jutyu, naa laachi bain tse'ken jutyuve. Tsa' mitya nuka ai'mu deeñuba jungaa ati'kaidei, tila. ¹⁰Tsa detiñu juntsa pannala tendasha muli ati'kanu dejinmalan, supunganuu jumu ruku jañu, ti kenduba tejangueetu tene kemu pannalaya yaba bulu fandangusha vila. Tsai' videinmalaren ya juukapa llukikila. ¹¹Tsenñu muli ati'kanu jimu pannala bene demaatu: Rukui, tsantsaya ya juukapa majuukide, tiitila. ¹²Tsa tsa detiñu entsandikami: Uwaindiyu iya ñullanu kerajtuyu, timi.

¹³Tsandi' dyatu Jesús tsandimi: Tsa' mitya ti maluchee, tsenmin ti urachee Dioschi Mi'ke' Kayamu maanuuñu bain mijdetu' mitya, pashkatyu' keenadei.

Lushi laanutala laapu' kuinda (Lucas 19.11-27)

¹⁴Matyu Dios ya' chachillachi rei tiya' washke' mandanguenu juñu pensangiñuya, ma ruku vee mujtu lu' jindu yachi taawasha ken chumu chachillanu demika', naa lushi bain washkidei ti' kuwakiñuuve. ¹⁵Tsejtu mainnuya 5.000 paki lushi kuwa', kamainnuya 2.000 paki lushi kuwa', tsenmin kayu veranuya 1.000 paki lushi kuwakemi, matyu juntsa lushinchi main main naa naake talanu deeñuba tsangue dekera' kuwatu, tsejtu baasha jimi. ¹⁶Tsenñu 5.000 paki lushi kamu rukuya, nei'ba kamin juntsachi jeke taawasha ke' kama 5.000 malaami. ¹⁷Tsenmala 2.000 paki lushi kamu ruku bain tsarenguetu, ya bain kama 2.000 paki lushi malaami. ¹⁸Tsaaren 1.000 paki lushi kakemu rukuya yanu uudenguemu ruku' lushi kamin tsaa tujuru ke' ne menekemi.

¹⁹Tsenñu bene pure' tinbu puiñu yalanu uudenguemu ruku maatu, lushinchi tyee dekiñuba mijanu tyatu, yaiba bulu demanguere' keemi. ²⁰Tsenñu 5.000 paki lushi kamu ajke' jitu, kama 5.000 paki lushi bain tai ji', yanu uudenguemunu tsandimi: Rukui, ñu inu 5.000 paki lushi kuwañu, iya kama 5.000 paki lushi malaayu. Enu mangade, timi. ²¹Tsenñu yanu uudenguen chumu ruku tsandimi: Yuj ura' kiñuve, kidanda kityu ruku. Naa jayu juuñu bain kidanda kityu' ura' keñu' mitya, kayu pure' juunaa mawashkaanu tsuyu. Tsa' mitya iya nenñaas sundyañu bain iba bulu sundyade, timi. ²²Tsenmala naa 2.000 paki lushi kakemu ruku bain bene jitu tsandimi: Rukui, ñu inu 2.000 paki lushi kuwañu, iya kama 2.000 paki lushi malaayu. Enu mangade, timi. ²³Tsenñu yanu uudenguen chumu ruku tsandimi: Yuj ura' kiñuve, kidanda kityu ruku. Naa jayun juuñu bain kidanda kityu' ura' keñu' mitya, kayu pure' juunaa mawashkaanu tsuyu. Tsa' mitya iya nenñaas sundyañu bain iba bulu sundyade, timi.

²⁴Tsaaren 1.000 paki lushi kakemu ruku jamiya, yanu uudenguemu rukunu entsandimi: Rukui, naa ñuya tsamantsa feete' uudenguen chumu ruku juñuba iya entsa kerayu, ñuya tiba wajtyumujchiba puka kamu juve, tsenmin tiba waakityundala bain te'kamu juve. ²⁵Tsaafu' mitya, inu jeetenñu, ñu' lushi ka' jitu, tusha ne menakaayu. Enu entsanave ñu' lushi; mangade, timi. ²⁶Tsenñu yanu uudenguemu ruku tsandimi: ¡Ñu firu' chachi, lamu! Tsejtu iya, naa wajtyundala bain puka de-isa tyatyaimu ju', naa waakityundala bain te'kanu tyatyaimu rukuñuba uwain mishu juntsaa, ²⁷lushi uukaanu yasha in lushi ta'tuya, i entsai' maanmala seeware'ba manguchuve, timi. ²⁸Tsejtu jundaa pumu chachillanu tsandimi: 1.000 paki lushi demachi'ke', 10.000 paki lushi tanashu juntsanaa mangudei, timi. ²⁹Tsejtu tsandimi: Mu bain tsaanu aseeta julanuya Dios kayu aseetanguekarenmala mika ura' aseetanguenu detsuve; tsaaren aseeta jutyulanuya naa jayu aseeta judeefu bain, aseetanguen jutyungue shuikenu tsuve. ³⁰Tsa' mitya jui'ñuba ne uraa chachinuya, avindala tsamantsa yapijurunainsha ka' kelaadei. Jungaa deware' naa tejkuba depakaa kentsunu detsuve, timi.

Kumuinchi chachillanu Jesús kavitu kenu juve.

³¹Chachi Tiya' Nakayamu ya' keetala tsamantsa pi'lkelaa yataa, ya' anjeelaba maatu, tsamantsaa rei juuñuu ya' chunjuunu chunu tsuve. ³²Tsenmala nukaba chumu chachilla kumuinchi ya' ajuusha dewa'kara deinmala, main main devela' kalaanu tsuve, matyu animaa washkemu ruku tsaaya uvejalalu chibulaba devela' kalaren tsanguenu tsuve. ³³Tsejtu uveja juuñuulanuya ya' urandyasha ere', tsenmin chibu juuñuulanuya ya' jalandyasha eeketu, ³⁴Rei ya' urandyasha pumulanuya entsandinu tsuve: ¡In Apachi ura' imu chachillaya, jadel! Tsejtu Dios rei ju' chuinsha umaa entsa tu dekenu tinbunun ñullanu kuwanu dejuu tanamuwañañu ñuichi tirenu juntsa kadei. ³⁵Matyu ñullaya i panda iiintsuñu bain panda kumuwa deeve; pi iiintsuñu bain pi kumuwa deeve; kerajtunu chachi juu jañu bain inu mikamuwa deeve; ³⁶naa jali tajtuu neintsuñu bain inu jali kumuwa deeve; diluu tsunañu bain in junga ja' keemuwa deeve; naa peesu punañu bain inu ja' keemuwa deeve, tinu tsuve. ³⁷Tsandinmala, Dios naakesa tyañuba tsanguen chumu chachilla entsandi pake'meenu detsuve: Bale Ruku, ¿naamaa ñu panda ii nentsuñu, lala panda kumuwa deewa? ¿Naamaa pi ii nentsuñu ñunu pi kumuwa deewa? ³⁸¿Naamaa kerajtunu chachi juu jañuren ñunu mikamuwa deewa? ¿Naamaa jali tajtuu nentsuñu ñunu jali kumuwa deewa? ³⁹¿Naamaa diluu tsuñu, tsa jutyu'ba, peesu puñu lala ñunu ja' keemuwa deewa? ⁴⁰detinmala, Rei entsandinu tsuve: In naatala kayu baleñu' jutyuu jumunu tyee ura' juu deke' bain, uwaindiyu ñulla juntsanguitu inu tsanguiñuuve, tinu tsuve.

⁴¹Tsanditu bene Rei ya' jalandyasha uinamulanuya entsandinu tsuve: ¡Nulla kavitu i' kuipa viinuu chachillaya, inu baka' mijiidei! Dyabulu ya' anjeelaba

vinutsumi ke' chujtya naa-uwanuba manbetyu ñinbaasha vijidei. ⁴²Matyu ñullaya i panda iiintsuba panda kutyuwa deeve; pi iiintsuba pi kutyuwa deeve; ⁴³kerajtunu chachi juu nentsuba inu mikalaatyuwa deeve; jali tajtuu nentsuba inu jali kutyuwa deeve; diluu tsuna bain, naa peesu puna bain inu ja' keetyuwa deeve, tinu tsuve. ⁴⁴Tsenmala yala entsandi pake'meenu detsuve: Bale Ruku, ¿naamaa ñu panda ii nentsu, pi ii nentsu, ne kerajtunu chachi juu nentsu, ne jali tajtuu nentsu, ne diluu tsuna, ne peesu puna bain, lala ñunu tiba ke' kutyuwa deewa? tinu detsuve. ⁴⁵Tsa detinmala, Rei entsandinu tsuve: Nulla naa-uwanaa main tiba baleñu' jutyuu chachinu tyeeba uraa kityu ju' bain ura uwaitindiyu ñnulla juntsaatu inaa tsangui'ñnuve, tinu tsuve. ⁴⁶Tsa' mitya entsaa chachillaya naa-uwanuba taaju ken chuinha jinu detsuve, tsenmala Dios naakesa tyañuba tsanguen chumu chachillaya naa-uwanuba yaba ura' chunu ya' junga jinu detsuve, tinu tsuve, timi Jesús.

Jesúsnu naake' peesu kanu deju'ba palaa kila.

(*Marcos 14.1-2; Lucas 22.1-2; Juan 11.45-53*)

26 ¹Jesús ya' disipululanu tsandi depa' dyatu entsandimi: ²Entsa pai malusha Dapulla' livee kiñu fandangu juñuba ñnulla mideeve. Juntsa malunaa Chachi Tiya' Nakayamu balela' tyaapasha kuwa' kuusanu tu'vi' peyanu tsuve, timi.

³Juntsa malutala naa chachilla' mitya Diosnu kalen jimula' bale rukula bain, tsenmin judío bale rukula bain wa'diila, chachilla' mitya Diosnu kalen jimula' kayu aa bale ruku Caifás' yasha. ⁴Tsejtu naaketaa bibu' deke! Jesúsnu kuipa faawaatu ka' tu'nuu deju'ba juntsatala kuinda kila. ⁵Tsejturen entsa entsandila: Tsaaren entsa fandangu malutalaya tsanguityudaa, chachilla demija' tituba firu ki'nudetsu, tiitila.

Ma shinbu Jesúsnu pindyupi yuutsuumi.

(*Marcos 14.3-9; Juan 12.1-8*)

⁶Jesús Betaniasha pumi, manbityu bishpee chuu tiitinu ruku Simón' yasha. ⁷Tsenñu ma shinbu alabastru lemetanu tsamantsa bale pindyupi tyuwaa taji', Jesús panda finsha chunañu, juntsa pindyupi ya' mishpukanu yuutsungaami. ⁸Tsanguiñu keenatu ya' disipulula ajaa tse'tuwaatu entsandila: ¿Nenñungue ne tsangue' pindyupi dekepukemi? ⁹Matyu ati'banguituya, tsamantsa balenchi ke', juntsa lushi purelanu kuwa'banguinuuba tsanguemi, tila.

¹⁰Tsenñu Jesús mijatu entsandimi: ¿Ti' mityaa bulla pandu detiyu entsa shinbunu? Inu challa entsanguitu mikä ura' kive. ¹¹Matyu purelanuya naa-uwanuba ñnulla' kejtsapalaren tananu detsuve, tsaaren inuya ñnulla' kejtsapala naa-uwanuba tsana tanan dejutyuve. ¹²Entsa shinbu tsangue' in bulunu pindyupi yuutsuutu, iya menanuu juñu, mennun jutyungue pindyupi

mungue' tsuukiñunguive. ¹³Uwaindiyu nuka tusha Diosa' mika ura kuinda wandi' mijakaadekiñu bain, entsa shinbu tyee kiñuba juntsa kuinda bain tsaren dekiñu mere' yanu mandenga mandengakenu detsuve, timi Jesús.

Judas, Jesúsnu peesu kakaanu pami.

(*Marcos 14.10-11; Lucas 22.3-6*)

¹⁴12 disipulu jumulanu, main Judas Iscariote detiñu, chachilla' mitya Diosnu kalen jimula' bale rukulanu keejitu ¹⁵tsandimi: ¿Iya ñullanu Jesúsnu kakaanmala, tyee inu kunu dejuyu? timi.

Tsandiñu yala 30 paki lushi kuwanu shuwala. ¹⁶Tsa dekinmalan juntsa ajkeshaya Judas naaketaa Jesúsnu kakaanu ju'ba, tsaa mi'kes nenchi tene iimi.

Jesús kayu peyai'mujchi ya' disipululaba panda fimi.

(*Marcos 14.12-25; Lucas 22.7-23; Juan 13.21-30; 1~Corintios 11.23-26*)

¹⁷Fandangu ajke' malunchi pujkikarajtu pan fifikenu malunu, ura patiñuya, llupu kaa uveja tute tutekenu Dapulla' livee kiñu fandanguchi, Jesúsnu ya' disipulula kalen jitu tsandila: ¿Dapulla' livee kiñu fandanguchi finu panda, ñuchi nukaa kenu dejuwa? tila.

¹⁸Tsenñu Jesús pakatu tsandimi: Pebulusha defaajitu, iya challa ñullanu patinu juuwashu juntsa ruku' yasha jitu tsandidei: Mashturu tsandive: Yumaa inchi ura kalenave; ñu' yashaa ja', in disipululaba Dapulla' livee kiñu fandangu panda finu tsuyu, tive, tidei, timi.

¹⁹Tsenñu Jesús naatiñuba tsanguitu, ya' disipulula panda kila.

²⁰Tsejtu dekependu' kañu Jesús ya' 12 disipululaba panda finsha chudi' ²¹findu tsandimi: Uwaindiyu ñulla main inu firu' kekaanu wandi' peesu kakaanu tsuve, timi.

²²Tsandiñu, ya' disipulula mika dellakindiyatu, Jesúsnu main main entsandi pake'meela: Bale Ruku, ¿iyaa tsanguenu juwa? tiitila.

²³Tsenñu Jesús tsandimi: Firu' kekaanu wandi' inu kakaanu jumuya in finu pandasharen ta'pu' fimaajuntsave. ²⁴Chachi Tiya' Nakayamuya Diosa' Kiikanu naatiñuba uwain juntsai' puinu tsuve, jtsaaren Chachi Tiya' Nakayamunu firu' kekaanu wandi' kakaanuu jumu rukuya mika taaju i' puinu tsuve! Matyu tsanguinaaba jutuya, na kayatyuwaña kayu yachi uraaba junu juve.

²⁵Tsenñu tsangue' firu' kekaanu wandi' kakaanuu jumu Judas bain Jesúsnu pake'meetu: Mashturu, ¿iyaa tsanguenu juwa? timi.

Tsenñu: Naa tsandive, ti' pakami Jesús.

²⁶Tsangue' panda findu, Jesús pan kake', juntsan mitya Diosnu yuj urave ti' dedale', ya' disipululanu kuwatu tsandimi: Ka' fidei, entsa pan in buluve, timi.

²⁷Tsejtu bene binu pumu basu bain ka', juntsan mitya Diosnu yuj urave titu, ya' disipululanu kumi entsanditu: Kumuinchu ñulla entsa

kushdei,²⁸ matyu entsaa Dios chachillaba veta' veta' tsanguedaa tiñu jumu in asave, matyu pure' chachillanu ujcha manbitsaanu see-eranu jumu asa.²⁹ Uwaindiyu entsa binu ne jungajte kujchi kujchiki'mujchi, in Apa rei ju' chuinsa kasa binu ñuiba mangujchikenu tsuyu, timi.

Pedro Jesúsnu kerajtuyu tinu tsuve.

(*Marcos 14.26-31; Lucas 22.31-34; Juan 13.36-38*)

³⁰ Salmo beesa deke' dyatu, Ulibu chi chunu kuyisha jila.³¹ Tsejtu Jesús tsandimi: Entsa kepe ñulla in mytaren tyu'lekiñungue' ura' keenguityui tiyanu detsuve, matyu Diosa' Kiikanuren entsandive: *Uveja washkemu rukunu ta'kenu tsuyu, tsenmala uvejala tsaa na'baasa jiinu detsuve,*^g ti' pillave.³² Tsaaren iya peya' Dioschi mangujtatu, ñulla kayu mijindetyuren, iyaa Galileasha ajke' miji' punu tsuyu, timi.

³³ Tsenñu Pedro tsandimi: Naamika kumuinchu vejanlaya, ñunu keenguindandaa pensa detiyañu bain, iyaa tsa-in jutyuyu, timi.

³⁴ Tsenñu Jesús tsandimi: Uwaindiyu entsa kepe kayu wallapa utindyun, ñu inu kerajtuyu ti', pen bijee tsandinu tsuve, timi.

³⁵ Tsandiñu Pedro entsandimi: ¡Naamika ñuba bulu peyainuu juñuba, iyaa ñunu kerajtuyu tin jui'yu! timi. Tsenñu naaju disipulula bain tsarendila.

Jesús Getsemanísha Diosba kuinda kemi.

(*Marcos 14.32-42; Lucas 22.39-46*)

³⁶ Tsejtu bene Jesús yaiba Getsemaní tinu tenabi dejitu, ya' disipululanu tsandimi: Enu chudidei, iyaa aangu Diosba kuinda kenu jintsuyu, timi.

³⁷ Tsejtu Pedronu bain, Zebedeo' pai nalanu bain miya' jitu, mikä llakintse'tuware' ti ken tsandyatu ³⁸tsandimi: In tenbukasha tsamantsa llakindenganchin peyainui llakindenve. Nullaya enu shuwa', kastyumujchi iba buluren keenadei, timi.

³⁹ Tsanditu Jesús kayu ajkesha ji' teledi' ya' llashkapa tusha tyuikangue waike' ya' Apaba kuinda ketu tsandimi: In Apa, tsanguenuuba jutuya, entsa tsamantsa taaju i' pullainu juuwashu juntsanu tsaa iwaatyuka, livee kika, Apa; tsaaren iya naaju mutyañuba juntsaaya kityu', ñu naakenu tenñuba juntsaaya kide, Apa, timi.

⁴⁰ Tsejtu bene ya' disipulula' puinsha miji' dekasu'tsudena katatu, Pedronu tsandimi: ¿Naa ma ura juuñuba kastyumujchi iba bulu keenanu jutyuu?

⁴¹ Kastyumujchi dekeena' Diosba kuinda kiikidei, tsenmalaa ujcha lainuu pensa ja'i'nutsu. Nulla tiba ura' kiikenu pensaya judeeve, tsaaren juntsa pensa jaiba derajtuve, timi. ⁴² Kama bijee baka' miji' Diosba kuinda mantu entsandimi: In Apa, iya entsa tsamantsa taaju i' puinu juuwashu juntsanu, iya tsa-inbera inuu jushu juntsaya, ñuchi tyee kiñaa urañu bain tsanguika, timi. ⁴³ Tsejtu manen ya'

disipulula' puinsha miitu, matyu kasandyanchin kapuka chainguenu jutyuu ma jude' mitya kasu'tsudena mangatami.⁴⁴ Tsejtu tsa dena mashuike' miitu entsaba pen bijee Diosba kuinda kemi, tsejtu kaspele naati'ba juntsaren manbami.⁴⁵ Tsai' ya' disipulula' junga miitu tsandimi: ¿Chaiba ñullaa kasu'tsu' lekandetsuu? Yumaa Chachi Tiya' Nakayamu ujcha lamu chachilla' tyaapasha kuwanu ura jave.
⁴⁶ Mangujdei miidaa, inu firu' kekaanu wandi' kakaamu yumaa jantsuve, timi.

Jesúsnu peesu kala.

(Marcos 14.43-50; Lucas 22.47-53; Juan 18.2-11)

⁴⁷ Jesús tsandi' kayu pantsuren, Judas, ya' 12 disipululanu ya bain main jumu pure' chachilla miyaa faajimi, mantsalaya peeniya taa, tsenmala mantsalaya cha'li taa jila. Yalaya chachilla' mitya Diosnu kalen jimu bale rukula' era bain, judío bale rukula' era bain jimu chachillaa tsaila. ⁴⁸ Tsaaren Jesúsnu firu' kekaanu wandi' kakaamu ruku Judas, yaba bulu jimulanu entsanguenu tsuyu timuwaami: Iya munaa estiñu bain, juntsaa juntsanu juve; tsa' mitya juntsanaa peesu kadei, timuwaami. ⁴⁹ Tsandimu' mitya, Jesús' junga jei kalen jitu entsandimi: Mashturu, ¿naanayu? timi. Tsandimin Jesúsnu estikemi. ⁵⁰ Tsenñu Jesús tsandimi: Inchi ura' keranu chachi, ñu tyeenguenu ja'ba tsanguide, timi.

Tsandinmalan veela pumula Jesúsnu kalen ji' peesu kakila.

⁵¹ Tsa dekiñu junu Jesúsba bulu pumu main peeniya kalare', chachilla' mitya Diosnu kalen jimula' kayu aa bale rukuchi manda'i' taawasha kemu chachinu tsaa pungui daapukemi. ⁵² Tsenñu Jesús tsandimi: Ñu' peeniya manbukide, matyu mun peeniyachi vingue' bain peeniyachi peyamu deeve. ⁵³ In Apanu tsanguide ti' pa'ñuya ¿challaren 12 pullangue, tsamantsa anjee bulu tenen in mitya vinguikaanu eren jutyuve tenguen, ñunaa?⁵⁴ ¿Tsaaren tsangui'banguishu juntsaya, Diosa' Kiikanu tsaa i' puinuu juve ti' pillaashu juntsa, naa-itaa tsaa puimunga? timi.

⁵⁵ Tsejtu Jesús juntsa manbaate nemu chachillanu tsandimi: ¿Nenñu deiyu ne iya taamu rukaaba juñu kanu jan tsa-i' peeniya juula, cha'li juula bain taa ma jaila? Iyaa malumere aa eleshasha chudi' chachillanu mijakaren pupuna bain, ñullaa inu peesu katyuwa deeve. ⁵⁶ Tsaaren kumuinchí entsaa puimiya Diosa' mitya pamu rukula tsaa puinu tsuve ti' piikemuwa deefñu, tsaa puindu iive, timi.

Tsenmalan Jesús' disipulula juntsa uranu yanu maali pungue shuike' denepiya' jiila.

Jesúsnu balela' ajuusha ta'la.

(Marcos 14.53-65; Lucas 22.54-55, 63-71; Juan 18.12-14, 19-24)

⁵⁷ Tsangue' Jesúsnu peesu kamula chachilla' mitya Diosnu kalen jimula' kayu aa bale ruku Caifás' jungaa tajila, leichi mashturula bain, bale rukula bain

dewa'nainbi. ⁵⁸Tsenñu Pedro baatala suree jitu, chachilla' mitya Diosnu kalen jimula' kayu aa bale ruku' ya veeta juusha vi', aa elesha washkemu chachillaba bulu ne chunami, Jesúsnu tsangue' ka' detajitu, tyee dekiñuba mijachi tyatu.

⁵⁹Tsenñu chachilla' mitya Diosnu kalen jimula' bale rukula bain, naa kumuinchi kavitu kenchi kayu aa bale rukula bain anbutituren tsaave ti' Jesúsnu kuipa faawaanu mi'kenchin juula tsangue' Jesúsnu tu'kaakenuu kuipa punu. ⁶⁰Tsejturen anbukuinda ketun uwain tsandive timu chachilla ma pure' wakukaatu bain, ti kuipaba katai'la. Tsaaren ma de-iinsha pallu faatu ⁶¹entsandila: Entsa ruku entsandiwa: Iya Diosa' pupunanu ya desenaa-eeturen, pen malu insha juntsangue mannu tsuyu, tiwa, tila.

⁶²Tsenñu chachilla' mitya Diosnu kalen jimula' kayu aa bale ruku kuypa' uiditu Jesúsnu tsandimi: ¿Tiba pakakenuu jutyuu? ¿Ti naaju deti entsandi' ñunu kuipa pu' pantsula? timi.

⁶³Tsandiñuren Jesús pakaiñu, chachilla' mitya Diosnu kalen jimula' kayu aa bale ruku tsandimi: ¡Uwain ñu Dioschi Mi'ke' Kayamu, Diosa' Na ju' bain, chumu Diosa' mumunu paka' uwain tsaañundiyu ti' lalanu wainka! timi.

⁶⁴Tsenñu Jesús tsandimi: Naa tsandive. Entsa bain ñullanu tsandinu tenve: Entsa ajkeshaya Chachi Tiya' Nakayamunu tsamantsa pude Diosa' urandyasha chuna katanu detsuve,^h tsenmin ñivish jandala majaintsu ñulla katanu detsuve,ⁱ timi.

⁶⁵Tsandinmalan chachilla' mitya Diosnu kalen jimula' kayu aa bale ruku Diosnu firu' pave ti' keewaanu ya' jali kiyuuchitike' entsandimi: Diosnu kentsure' ma pative. ¿Tyeenguenaa kayu uwain ma tsandive titimu chachilla mi'kenu dejعوا? Nullaren challa enu tsandi' Diosnu kentsure' pañuba demeenave. ⁶⁶¿Naa detiyu ñullaa? timi. Tsenñu yala pakatu: Tsaave, tutainuu kuipa ma juuve, tila. ⁶⁷Tsandilaren kajuutala inbi dekitsure', dekati', naa kajuutala pinballachi bain deke' ⁶⁸entsa entsandila: Ñu, Dioschi Mi'ke' Kayamuya, challa maa tsangue' ñunu keñuba wainka, titila.

Pedro: Jesúsnu kerajtuyu, timi.

(Marcos 14.66-72; Lucas 22.54-62; Juan 18.15-18, 25-27)

⁶⁹Tsanguindetsu, Pedroya ya kelunu avindaa baisha chudi' chunaren yasha taawasha kemu panna main yanu kalen jitu tsandimi: ¿Ñu bain Galileasha chumu Jesúsba bulu neneimutyuika? timi.

⁷⁰Tsandiñu muba demeenaren, tsa jutyuve ti', Pedro entsandimi: Ñu ti pantsuñuba mijtuyu, timi.

⁷¹Tsejtu bene ya juukapa keesha jiñu, yasha taawasha kemu kama panna katatu, junu pumu chachillanu tsandimi: Entsa ruku, Nazaretsha chumu Jesúsba nentsuwa, timi.

⁷²Tsenñu manen Pedro tsa jutyuve ti', Diosa' mumunu paka' ura uwain tsa jutyuve titu tsandimi: Iyaa juntsa rukunu kerajtuyu, timi.

⁷³Tsenñu wajtutalan jundala pumu chachilla bain Pedro' junga kallen dejitu tsandila: Naati' tsa jutyuve tinuba jutyuve, uwain ñu bain yaiba nemuve; ñu' palaanun ne mijaikeeve, tila.

⁷⁴Tsa detiñu Pedro Diosa' mumunu paka', tsa jutyuve ti' jungajte tsandi', matyu anbutishu juntsaa, yanu Dios firu' kisa ti' entsandimi: Iyaa juntsa rukunu kerajtuyu, timi.

Tsandinmalan juntsa uranu wallapa main ui'mi. ⁷⁵Tsenñu Pedro mandengami yanu Jesús entsandi pamuwañañu: Kayu wallapa utindyuren, inu kerajtuyu ti', pen bijee ñu tsandinu tsuve, timuwañañu. Tsejtu Pedro junu malu' miji' avindala lutu mikä llakindya' waami.

Jesús Pilato' ajuusha

(Marcos 15.1; Lucas 23.1-2; Juan 18.28-32)

27 ¹Yumaa dechañañu chachilla' mitya Diosnu kallen jimula' balela bain kumuinchí, naa judío bale rukula bain, naati depataa Jesúsnu tu'kaanu ju'ba tsai shuwala. ²Tsejtu Jesúsnu telaa romanola' uñi Pilato' junga taji' kuwala.

Judas peyami.

³Jesúsnu firu' kekaanu wandi' kakaamu Judas, tsangue' kakaañañu ma tutekenu dejuñuba mijatu, tsanguityuuba jui'wañaña tyá pensa mantu, ya' kañu 30 paki lushi jumu chachilla' mitya Diosnu kallen jimula' balelanu bain, naa judío balelanu bain mandají' kuimi. ⁴Tsejtu tsandimi: Ti kuipaba jetyu rukunun tsangue' kakare' ma tu'kaakentsu' mitya, pure' ujcha layu, timi.

Tsandiñu yala tsandila: Tsaañu bain laachiya nejuuve. Juntsaa ñaa mijanu tsuve, tila.

⁵Tsenñu Judas juntsa lushi aa elesha ura juusha detya'kepuke' miitu, maali kutunu chuwa pu' eedi' peyami.

⁶Chachilla' mitya Diosnu kallen jimula' bale rukula juntsa lushi mande'katu tsandila: Entsa lushi pemula' asa mayiiñuuve. Tsa' mitya naake' ufeenda lushi pupukinsha pun tsaa keeve, tila.

⁷Tsandi' dyatu, Tu piyama kenu tena momu puu tu jumaa ati'kanu shuwala juntsa lusinchí, tsejtaa vee mujtu chulla ja' nendu depeyanmala, mene menekenu tena tirenu. ⁸Tsa' mityaa juntsa ati'kaya tu entsa piiñuun tinbunun As tu mumuve. ⁹Entsaiñaa Diosa' mitya pamu Jeremías naatimuwañañuba tsaa puimi; entsandimuaami: Israel chachillaren juntsanu tsantsa balengureke' tsangue deshuikiñu jumu 30 paki lushi dekave. ¹⁰Tsangue' juntsa lusinchí tu piyama kenu tu tena de-ati'kave, Bale Ruku inu juntsanguenu uudenguiñu tsanguetu!

Pilato kavitu ke' Jesúsnu pake'meemi.
(Marcos 15.2-5; Lucas 23.3-5; Juan 18.33-38)

¹¹ Jesú uñi' ajuusha takami, tsenñu uñi entsandi pake'meemi: ¿Naa judíola' reiyu? timi.

Tsenñu Jesús pakatu: Naa tsandintsuve, timi.

¹² Tsenmin naa chachilla' mitya Diosnu kalen jimula' bale rukula bain, naa judío bale rukula bain Jesúsnu kuipa pu' papatindetsun, yalanu jaiba pakatyu jujuumi. ¹³ Tsenñu, Pilato tsandimi: ¿Nunu kuipa pu' tituba pandetsuba ñuya merendyuu? timi.

¹⁴ Tsenñun Jesús naa manbalaaba pakai'ñu, uñi mikä keenbashi' dyami.

Jesúsnu tu'nu shuwala.

(Marcos 15.6-20; Lucas 23.13-25; Juan 18.38—19.16)

¹⁵ Naa-uwanu bain romanola' uñiya Dapulla tinu fandangu kenu malunchi, naaju peesu pumunaa chachilla livee ke' me-e'laasa detiñuba, juntsanu livee ke' me-e'laalaakemumi. ¹⁶ Juntsa tinbunu naa muchiba dekeraa main daj ruku peesu pumi, ya' momu Jesús Barrabás. ¹⁷ Tsejtu chachilla dewa'diñu, Pilato tsandimi: ¿Munaa mandyaike' me-eenu juwa? ¿Jesús Barrabásnuu? ¿Jesús, Dioschi Mi'ke' Kayamu tiitidetishu juntsanuu? timi.

¹⁸ Tsaaren Jesucristonu tsangue' ya' junga deta'tu, kishtyanchin ne tsa dekiñuba mijá' mityaa tsandimi.

¹⁹ Tsejtu Pilato kavitu kensha tsandin churen, ya' shinbu entsandi kuinda eemi: Aantsa rukunu tibanguityude, ti kuipaba jutyuve, matyu ya' mityaren iya kepe tsamantsa firu' kipinchi tene i' chayayu, titi-eemi.

²⁰ Tsandiñuren chachilla' mitya Diosnu kalen jimula' bale rukula, judío bale rukulaba junu wa'namu chachillanu, matyu Barrabásnaa mandyaizikare!, Jesúsnaa tu'kaanu pa'nú pensa ma dekikaakila.

²¹ Tsenñu manen uñi pake'meetu tsandimi: ¿Entsa pallu jumulanu naajunaa mandyaike' me-eesa pensa deeyu? timi. Tsenñu yala pakatu: Barrabásnaa mandyaike' me-eede, tila.

²² Tsenñu Pilato tsandimi: Tsaaya, ¿Jesús, Dioschi Mi'ke' Kayamu tiitidetishu juntsanuya, tyeenguenujtuwa? timi.

Tsenñu kumuinchí pakatu entsandila: ¡Kuusanu tu'vi! tutasa! tila.

²³ Tsa detiñu Pilato tsandimi: Tsen, ¿tyee firu' ken entsa ruku? timi.

Tsandiñuren chachilla ui'tun kayu utindi' entsa entsandila: ¡Kuusanu tu'vi! tutasa! tiitila.

²⁴ Tsenñu Pilato ne tsandindu tiba inu' jui'ñu, tsenmin chachilla kayu tituba ke' ne jiindetsuñu' mitya, pi taakaatu, muba dekeenaren ya' tyaapa

manbitsaandu tsandimi: Tsangue' entsa rukunu detu'ñu bain, iyaa ti kuipaba kan jutyuyu; ñullaa kuipanu detsuve, timi.

²⁵Tsandiñu kumuinchi chachilla pakatu tsandila: Naa entsangue' tu'kare'ba, kuipa juñuya laa bain, naa lalanu sera' jamu kaila bain kuipanu detsuyu, tila.

²⁶Tsenñu Pilato yala naadetiñuba tsanguitu, Barrabásnu me-e'lare', Jesúsnuya aste kikare', kuusanu tu'pu' tu'nu uudenguemi.

²⁷Tsenñu uñi' suutadula Jesúsnu katu romano uñi' yasha tajitu, kumuinchi suutadulanu Jesúsn' keesha demika' wakukaala. ²⁸Tsejtu ya' pana jaliya debe'tu main yamuraraa jallee vikaala. ²⁹Tsejtu pu chuwa tene desala' puke' ma mishmunderu ke' pu'kaala ya' mishunu. Tsenmin ya' urandyaaapasha tsuta juuñuu ñañi cha'li main chungaapula. Tsejtu firu ke' uukapu' ya' ajuusha teledii' entsa entsandila: Ura' chude, judíola' rei, tiitila.

³⁰Tsandi' inbi dekitsure', yanu kuñu ñañi tsutachi mishutala vili vilikila. ³¹Tsangue' firu ke', de-uukapu' dyatu, yanu vikaañu yamurara jali demanbeke', ya' jallee manbande', kuusanu tu'punu tajila.

Jesús kuusanu tu'vimi.

(Marcos 15.21-32; Lucas 23.26-43; Juan 19.17-27)

³²Tsejtu junu demalu' miindu Cirenesha chumu Simónnu dekatatu, Jesúsnu tu'punu kuusa deranchi nande' eekila.

³³Tsejtu ma tena, Gólgota tishu juntsaa, Ujkun Mishu tena tinunu dejitu, ³⁴Jesúsnu sangalaba yandaa binu dekuñu, kujchi' keetu, kujchindyai'mi.

³⁵Tsejtu suutadula kuusanu detu'pu' uikaatu, Jesúsn' jali munaa tyulla lunuuñuba tsa tsangue deke' veela. ³⁶Tsangue' dyatu juntsa keesha chuna' washnala.

³⁷Tsejtu ti' mityaa tsai' tutañuba mijakaanu, ta'panu piikike' Jesúsn' mishkai'sha mai'tela; tsenñu junu entsa pillami: ENTS A JESÚSVE, JUDÍOLA' REI.

³⁸Tsenmin uñila' uudennu meedityu' chachillanu masmi' kemishti kemishtikemu chachillanu bain pallu kuusanu tu'pu' uikaala, mainnuya Jesúsn' urandyaa keesha, kamainnuya ya' jalandyaa keesha tu'pu' uikaakila. ³⁹Tsenñu jundala pulla' jijiimula, Jesúsnu kentsure' depa' balejtu kure' yala' mishpuka lu'tesai jijiit ⁴⁰entsa entsandila: Diosa' pupunanu yanu desene' pen malunuren jeke vera mannuuyu timu rukuya, ¡maali livee ide! ¡Ura Diosa' Natuya, aantsa kuusanu manbaijde! tiitila.

⁴¹Tsenñu naa chachilla' mitya Diosnu kalen jimula' bale rukula bain, naa Moisés' wandya lei mashturula bain, naa judío balela bain, tsaren firu' pantsula entsanditu: ⁴²Veelanuya livee keturen maaliya livee inu jutyuve. Ya Israel chachilla' reituya, ¡challaren kuusanu manbaijsa, tsenmala yanu keengueno detsuyu! ⁴³Yaa uwain Diosya tsanguemuve tyá' yanu keenguemüñu' mitya, challa Diosren yanu estyamutuya livee kisa; matyu entsaa, ¿yaa Diosa' Nayu timu jutyuu? tiitila.

⁴⁴Tsenmala naa Jesúsba kuusanu tu'vimu chachilla bain tsarendi'
kentsure' papatila.

Jesús peyami.

(*Marcos 15.33-41; Lucas 23.44-49; Juan 19.28-30*)

⁴⁵Pajta katyu uratala tu kuraa dishpajtya' tsaa tsanatu, kepenusha
pen ura inshaa madanguemi. ⁴⁶Tsenñu entsa ura juutala Jesús daran uti'
entsandimi: *Elí, Elí, ¿lemá sabactani?* timi; tsandishu juntsaa, Dios, in
Dios, *¿nenenunguiyu* inu maali tirekemi?^k titu.

⁴⁷Tsenñu mantsa junu pumula tsandiñu demeetu entsandila: Entsaya
Diosa' mitya pamu ruku Elfasnu mikandundive, tila.

⁴⁸Tsenmalan main yangachi jei ji', shivi binunu kuwa keraachi tsu'pu'
kushkakaaketu, ñañi cha'linu llu'puke', Jesús' junga uslaami kujchisa
tyatu. ⁴⁹Tsenñun veelaya entsa entsandila: ¡Tsanguityude, keenadaa,
Elías la'kaja'ba iñu meedaa! tiitila.

⁵⁰Tsenñu Jesús manen daran ma-util' dyamin, ya' aama Diosnu kuwa' peyami.
⁵¹Tsenmala juntsa uwanun aa elesha ura juusha, Dioschin juu jumu sukunu
daayananamu aa jali kai'sha kiyuu tse'kemin tusha pajanbera kiyutse'ke' tsaa
manba manba-iimi. Tsenmin naa tu bain dejulluke', aa shupuka jelekenuula
bain deleetsetakila. ⁵²Tsenñu naa ujkun tujuula bain demajuru deiñu,
Diosnu keenguen chumu peyamulaya pure' manguitaila. ⁵³Tsejtu Jesús peya'
manguitañu, juntsala yala' ujkun tujuusha demafale' Dioschin juu Jerusalén
pebulusha demiiñu, pure' chachilla yalanu mangataakila.

⁵⁴Tsenñu tsangue' kala kiñu, tsenmin naa ti bain de-i' puiñu keenatu,
Jesúsnu washna' keenamu suutadula' ama ya' chachillaba tsamantsai
wapanandu entsandila: ¡Uwain entsaya Diosa' Nawaañuve! tila.

⁵⁵Junu supula bain pure' puna' baatala ne ke-eenala. Juntsala Galileabi Jesúsnu
bendala deja' Jesúschi tiiñuba kivete kivetekemu shinbulaa tsanala. ⁵⁶Juntsa
shinbulu' kejtsapala María Magdalena bain, naa Santiagochi, tsenmin Joséchi bain
yala' ama jumu María bain, tsenmin Zebedeo' nala' ama bain junu pula.

Jesús menami.

(*Marcos 15.42-47; Lucas 23.50-56; Juan 19.38-42*)

⁵⁷Yumaa dekependu' kainsha main taruku jimi, Arimateasha chumu
José, matyu ya bain Jesús' disipulu jumu. ⁵⁸Juntsa ruku Pilato' junga
ji', Jesús' ujkun bulu pa'ñu, Pilato kuwakaami. ⁵⁹Tsenñu José katu
tiba mayijtu naraa linu manbaalichi pijteke' ⁶⁰ya' kasa ujkun tujuu,
lanbakisha vishkaraa ujkun tujuusha pukiimi. Tsanguitu ujkun tujuu
juukapanu aa shupuka di'kaakare' miimi. ⁶¹Tsanguendetsu junu ujkun
tujuu juukapa bejtala María Magdalena, kama Maríaba chudi' chunala.

Suutadula Jesú's' mennanu ujkun tujuusha washdila.

⁶²Juntsa ayunchi, lekanu malunu, chachilla' mitya Diosnu kelen jimula' bale rukula, fariseo chachillaba Pilatonu keejitu ⁶³entsandila: Ruku, lala demandengayu juntsa anbumu ruku kayu peyai'mujchi chuumala: Pen malusha mangujnu tsuyu, timuwaañuba. ⁶⁴Tsa' mitya juntsa pen malu pullaindyuya ujkun tujuusha suutadu washkaade. Tsandenna ya' disipulularen ya' ujkun bulu mangalaaji': ¡Mangujñuve! ti'bandinu dejuve chachillanu. Tsangui'ba dekenmalaa, entsa bene' anbukuindaa, ajke' anbukuindanuba pullake kayu na'baasa detirenu juve, tila.

⁶⁵Tsa detiñu Pilato tsandimi: Enu ma bulu suutadu entsa denave; ka' ji', ñullaren ma ji-i', juntsa ujkun tujuunu naake washkaanuu juñuba tsanguidei, timi.

⁶⁶Tsenñu yala dejitu, juntsa ujkun juukapanu di'namu shupukanu dejukaañuba mijanu señas putu, suutadulanu washkaala.

Jesús peyaturen mangujtami.

(Marcos 16.1-8; Lucas 24.1-12; Juan 20.1-10)

28 ¹Saaduma lekanu malu depuiñu, juntsa ayunchi, duminguma, semana ajke' malunu defijurukinsha María Magdalena, kama Maríaba juntsa ujkun tujuusha keenu jila. ²Tsaaren Bale Rukuchi ma anjee selusha pajañu, tsamantsa daran kala kemi. Tsai' anjee pajatu, ujkun tujuusha ji', junu di'namu aa shupuka vee mujtu mandyulere' junu jandala chudiñumi. ³Juntsa anjee kuidya pi'keñu keekiñuumi, tsenmin ya' jaliya aa kuyitala tsumu isha pukanu keekiñuu fikujchuchuumi. ⁴Tsenñu junu uinamu suutadulaya jelanchin dejulluke', matyu pemu tsun tsaila. ⁵Anjee juntsa shinbulanu tsandimi: Jeetyatyudei, iya miyu naa ñullaya kuusanu tu'vi' peyaishu juntsa Jesúsnu mi'kes nendetsuñuba. ⁶Yaa enu putyuve; naatimuwa ju'ba juntsa-i' yumaa mangujtave. ¡Jade-ii, yanu tsuununu ja' keekidei! ⁷Tsa' mitya jei demiji' ya' disipululanu yumaa mangujta' yaa ajkesha puu, Galileasha ajke' miinu tsuve; jungaa mangatanu detsuve, detii. Entsa iya ñullanu wainnu ju' mityandiyu, timi.

⁸Tsenñu juntsa shinbula junu ujkun mennanunu jei demalu' miila. Tsejtu naa wapanaa deju' bain, tsaren sundyandetsu' mitya, jei demiji', juntsa kuinda manjintsula ya' disipululanu. ⁹Tsai' miindetsun, Jesú yalanu fale' katawatu ura' dejusa timi. Tsenñu yala Jesú neepanu amangue', deteedi' Jesúsnu aawa kure' keewaala. ¹⁰Tsa deiñu Jesú tsandimi: Jeetyatyudei, inu keranguemu in naatalalanan Galileashaa ji', jungaa inu mangatanu detsuve, tidei, timi.

Washnamu suutadulanu anbutikaanu lushi kuwala.

¹¹Tsa-i' juntsa shinbula miindetsun, ujkun tujuunu washnamu mantsa suutadula bain pebulusha demiit, titi-i' puiñuba chachilla' mitya Diosnu

kalen jimula' bale rukulanu tsandi kuinda kiila. ¹²Tsenñu chachilla' mitya Diosnu kalen jimula' bale rukula, judíola' balelaba wa'dila, tyee kenu ju'ba mijanu. Tsejtu juntsa suutadulanu lushi pure' kuwakila, ¹³entsandidei titu: Lala kasu'tsunu uwanu ya' disipulula kepe deja' ya' ujkun bulu tsaa tara dekive, detii. ¹⁴Tsenmin tsandenna entsa kuinda uñi' jungaaba chujiñu bain, lalaa mijanu detsuyu naakenu ju'ba, tsaaren ñullanuya tiba ikaren dejutyuyu, tila.

¹⁵Tsenñu juntsa suutadula lushi dekatu, yalanu naati depañuba tsandila. Tsenñaa naa entsa piikenu uwanu bain juntsa suutadula' anbukuindaa judío chachiitala ken chuchunala.

Jesús' mitya kuinda kes nenu eramula tyeengueno deeñuba
(Marcos 16.14-18; Lucas 24.36-49; Juan 20.19-23)

¹⁶Tsenñu 11 disipulula Galileasha jila, Jesús nutsa kuyishaa jidei timuuñuba junga. ¹⁷Tsejtu Jesúsnu demangatatu, naa mantsalaya Jesúsren tsaañanga tya tyaindu bain, teedi' aawa kure' keewaala. ¹⁸Tsenñu Jesús yala' keesha jitu tsandimi: Diosya inu naa selusha bain, naa tusha bain tsaren de-uudenguen chunuu tireve. ¹⁹Tsa' mitya nukaba dejí' naaju chachillanu bain in disipulu tiredei, in Apa' mitya bain, ya' Na' mitya bain, naa Espíritu Santo' mitya bain mungaakaakendu. ²⁰Tsenmin iya ñullanu tyee ken chudei tiñuba juntsa meengueno mijakaadei. Tsenmala iyaa, malumere entsa tu de-inbera ñuibaren bulu punu tsuyu, timi.